

DEFTERE KUUDE SAHAABAABE BEN

Fii Yentineede Isaa Almasiihu on

¹ Ko an yo Tawaafilu, mi yewtuno ka deftere an aranere fii kala ko Iisaa nangannoo wadugol e jannugol, ² haa e jalaande yentineede makko, bawto o yamirde *sahaabaabe be o subinoo ben immorde e *Ruuuhu Seniido on, ³ dun ko ben be o hollitii himo wuuri bawto o wareede, be o wadsani seedeeji dhuudsudi fii ummutal makko ngal. O feenani be e nder balde cappande nay, himo haalana be fii *laamu Alla ngun.

⁴ Nande goo, ko o wondi e maßbe, o yamirno be wota be woddito *Yerusalaam, kono yo be habbo fodaari Baabaajo on, o wi'i be: «Dun ko ndin ndi mi wowlani on fii mun. ⁵ Ko fii Yaayaa kapun ko ndiyan lootiraynood, kono onon e nder balde nii ko Ruuhu Seniido on lootirtedon.»

⁶ Nde tawnoo hibe mottondiri takko makko, be landii mo, be wi'i: «Joomi, hara ko e on saa'i jodfsintintaa laamu *Isra'iila ngun?»

⁷ O jaabii be, o wi'i: «Wonaa onon haani andude fewndooji e saa'iji di Baabaajo on todfori bawgal mun ngal e mun din. ⁸ Kono onon on hebay bawgal nde Ruuhu Seniido on ari e mon, wonon seedeebe an Yerusalaam e diiwal *Yahuuda ngal fow e diiwal *Samariiya ngal fow haa ka kattude leyde.»

Deftere Kuude Sahaabaafe Ben 1:9ii Deftere Kuude Sahaabaafe Ben 1:16

⁹ Bay o gaynii be wowlande d'un, wa fewndo ko be ndaarata mo, o yentinaa, onsay duulere wirni mo e gite mabbe.

¹⁰ Ko be tiggiti ka kammu, fewndo ko o yentata, worbe dido borniibe daneeji feepani be, wi'i be: ¹¹ «Ko onon yo be Jaliilu, ko hondun daridon, hidon ndaara nguu kammu? Iisaa oo yentinaado ka kammu e hakkunde mon artiroay wano yiirudon o yentiniraama ka kammu nii.»

¹² Onsay be yiltitii Yerusalaam be iwi e ngon fello wi'eteengo Fello *Zaytuuni woddsitorngo Yerusalaam yero sagara yaadu happaandu e *palaande fowteteende nden.^a ¹³ Bay wonii be hewtitii, be naatiroyi ka suudu dow-dowru ndu be woni weerude e mun ndun. Tawi ben ko Petruusu, e Yuuhanna e Yaaquuba e Andaraawu, kajun e Filiipu e Tooma e Bartolomaawu e Matta e Yaaquuba mo Alfaa e Sim'uunu tawdaado e fedde *Zelotiibe ben, e Yahuuda mo Yaaquuba. ¹⁴ Be fow e nder nanondiral maabbe, be duumii e toragol Alla, toroda e rewbe ben wondude e Mariyama yumma Iisaa e neene-gootooobe makko ben kanko Iisaa.

Fii no Matiyaasa Suboraa

¹⁵ E d'en balde d'on, Petruusu immii, o darii hakkunde musibbe ben. Tawi ben moobinoobe d'on ko wa be teemedere e noogayo. O wi'i ben: ¹⁶ «Musibbe, bee ko windanoo kon wada, dungle ko ko Ruuhu Seniido on longinnoo Daawuuda

^a **1:12** 1.12 Ko woni «*sagara yaadu happaandu e palaande fowteteende nden*» ko wa kiloo gooto leydi, yaareeedo wa minitaaji sappoo e jowi.

Deftere Kuude Sahaabaabe Ben 1:17iii Deftere Kuude Sahaabaabe Ben 1:26

kon, o *hiitii fii oo wi'eteedo Yudaasi ardinoodo bee nangunoobe Iisaa. ¹⁷ On no tawdanoo e men, awa kadi himo marnoo gefbal e dee golle men.»

¹⁸ (Yudaasi hendorii ngesa mban njoddi janfa mun kan, ko d'on fii makko lanniri hippagol, fecco e hakkunde, nder reedu makko ndun fow lancitii. ¹⁹ Hakkee ko jeyaabe Yerusalaam ben fow andunoo fii d'un, be inni mban ngesa e haala mabbe ‹Hakel-Dama›, ko woni firo d'un ko Ngesa Yiyan.)^b

²⁰ «E hin-le no windii ka deftere Zabuura:
«Yo galle on den caabu,

 hara hay gooto hodataa d'on.»^c

«No windii kadi:

«Yo goddo lonto mo ka ardagol.»^d

²¹ Kanko Petruusu o wi'i kadi: «Ko dun wadi, bee goddo e bee wondunoobe e men fewndo ko jindideten e Iisaa Joomi on, ²² gila ko Yaaya lootunoo mo haa nande o yentinaa hakkunde men, heboo ko wonda e men seeditoo fii ummutal makko ngal.»

²³ Onsay be banni yimbe dido: goddo on no wi'ee Yuusufu, d'un ko Barsabaa jammaado Yustuusa, oya on no wi'ee Matiyaasa. ²⁴ Onsay be torii, be wi'i: «Yaa an Joomiraado Andudo berde yimbe fow, banginan men ko hombo e bee dido subidaa ²⁵ fii ko lontoo Yudaasi e golle e sahaabankaaku mun, bay kanko Yudaasi o sortike, o yahii ka o muuyanaa d'on.» ²⁶ Be wadi urba hakkunde ben dido, urba on hawri e

b 1:19 1.19 Mat. 27.3-10 c 1:20 1.20 Zab. 69.25 d 1:20
1.20 Zab. 109.8

Deftere Kuude Sahaabaabe Ben 2:1iv Deftere Kuude Sahaabaabe Ben 2:11

Matiyaasa, on tawtinaa sahaabaabe ben sappoo e go'o.

2

Fii Arugol Ruuhu Seniido on

¹ Nde jalaande juldeere wi'eteende *Pentakosta hewtunoo, tawi be fow hibe wondi nokkun gootun. ² Tun nde wootere, hawa wa hendu tiifundu iwri ka kammu ari, hebbini suudu ka be woni don. ³ Onsay wa dende yiite feepani be, de sendondiri, de woni e hoore mo kala e mabbe. ⁴ Be fow be heewi *Ruuhu Seniido on, be nangani wowlugol e *haalaaji goo, mo bee e ko Ruuhu on longini fun.

⁵ Tawi wa nden pande *Yahuudiyankooibe rewoobe Alla iwrube e leyde aduna on fow no Yerusalaam. ⁶ E nder ko hawa kan wadata kon, jamaa moobinoodo don on jiibii sabu ko mo kala e mabbe nanaynood ben no wowla e haala mun kan tigi kon. ⁷ Dun jaldini be haa feyyiti, e hoore hibe wi'a: «Hara bee yimbe wonbe wowlude doo fow hinaa be diiwal Jaliilu? ⁸ Ko honno nanirden bee no wowla e haala ka muynuden kan tigi? ⁹ Dun ko enen bee Fartiyankoobe e Maadiyankoobe e Elaamiyankoobe e bee hodube Mesopotamii e ka diiwal Yahuuda e be Kapadoosi ben e be Pontii ben e be *Aazii ben, ¹⁰ e be Firgii ben e be Pamfilii ben e be Misira ben e bee jeyaabe e ndii leydi Libii kawtirbe e Sirenii e iwrube Roomu ben, ¹¹ dun ko Yahuudiyankooibe ben e naatube e diina Yahuudiyanke ben e jeyaabe Kereeti ben e Aarabeebe ben, enen doo fow en nanii hibe

Deftere Kuude Sahaabaafe Ben 2:12v Deftere Kuude Sahaabaafe Ben 2:20

wowla e haala mo kala e men fii kuude Alla mawde den!» ¹² Tawi dfun no njaldini be fota be fow haa hibe jibii, be nangi wi'indirgol: «Ko hondun du'un holli?»

¹³ Kono wobbe no awmotonoo be, wi'a: «Bee ko yarube haa mandili!»

Fii Waaju Petruusu Aranu ngun

¹⁴ Ontuma Petruusu immodi e *sahaabaabe ben sappoo e go'o, o ewnii jamaa on, o wi'i be: «Ko onon yo Yahuudiyankeeb e kala hodufdo Yerusalaam, heditee kongudi an din, andon dfundoo. ¹⁵ Ko fii hinaa ko sikkudon kon, bee wonaa mandilube nii, ko walluhaa on nii. ¹⁶ E hino ko annabi Yuu'iila wi'unoo kon, himo wi'i: ¹⁷ «Alla daalii:

Ka balde sakkitore

mi tippinay Ruuhu an on e hoore kala tagaado haa heewa.

Onsay bibbe mon worbe e rewbe haaloyay ko Alla longini dfun,
sukaabe mon ben yi'oya fenjinande,
mawbe mon ben hoydoya koydi.»

¹⁸ «Kanko Alla o daalii kadi:
Ko non woniri e den nalaade don,
mi tippinay Ruuhu an on e hoore
jiyaabe an ben worbe e rewbe,
be haala ko be longinaa.

¹⁹ Mi wadfa kadi kaawakeeji ka kammu dow,
e maandeeji ka hoore leydi,
dfun hara ko yiyan e yiite e duggal curki.

²⁰ Naange ngen wayloo nibe,
lewru ndun kadi wayloo yiyan,

Deftere Kuude Sahaabaabe Ben 2:21vi Deftere Kuude Sahaabaabe Ben 2:28

dun ko ado jalaande Joomiraado on hewtude,
dun ko nden jalaande mawnde teddunde.

²¹ Onsay kala jantotoodo innde Joomiraado on dandoyte.»^d

²² Kanko Petruusu o wi'i kadi: «Ko onon yo *Isra'iilayankeebe, heditee dii kongudi an! Oo gorko wi'eteedo Iisaa, oo jeyaado Naasirata, on mo Allaahu on banginiri yeeso mon kaawakeeji moyyi e kuude e maandeeji, kon ko Alla warri e makko e hakkunde mon, wano andirdon non tigi, ²³ dun ko on wadaado e joge tippude e ebboore Alla nden e gandal makko adiingal ngal kanko Alla, warirdon mo wattugol mo e juude heeferbe ben, ben wariri mo fempugol wenga.

²⁴ Allaahu on immintinii mo, o sortii mo e nder ndin muuseendi mayde, ko fii hari gasataa ka nguli mayde kin jogoo mo ton. ²⁵ Ko fii hari Daawuuda wi'irii nii fii makko, woo:

«Mi yi'ay Joomiraado on saa'i woo yeeso an,
 ko fii hari himo ka sengo jaamo an
 fii wota mi diwnu.

²⁶ Ko dun wadi si bernde an nden no heewi weltaare,
 denngal an ngal no e nder welo-welo,
 hay bandu an ndun fowtoto e nder tanyinaare.

²⁷ Ko fii a accoytaa wonkii an kin ka wonunde maybe,
 awa kadi a jabataa *Seniido maa on laatoo noldo.

²⁸ A andinii lan laawi ngurndan din,

^d **2:21** 2.21 Yul. 3.1-5

Deftere Kuude Sahaabaabe Ben 2:29vii Deftere Kuude Sahaabaabe Ben 2:37

a hebbinay lan weltaare yeeso maa.»^e

²⁹ Kanko Petruusu o wi'i kadi: «Musibbe, newnanee lan mi yewta on no laabiri fii Daawuuda oo baabiraawo meeden, on maynoodo surraa, mo tawata yenaande mun no woodaa haa jooni hakkunde men. ³⁰ Nde tawnoo ko o annabaajo, himo andi kadi wonde Allaahu on woondanii mo woondoore wonde o joddinay goddo e jurrinya makko on ka jullere laamu makko. ³¹ O *hiitino fii immintinegol *Almasiihu on, on mo accoytaake ka wonunde maybe ben, d'un ko on mo bandu mun laatoyaako jolayndu. ³² Iisaa on non, Allaahu on immintinii mo, men fow ko men seedee d'un. ³³ Alla bantirii mo ka sengo mun jaamo, o hendike e juude Baabaajo on ko fodanoo kon, d'un ko Ruuhu Seniido on, kanko kadi o tippinii d'un, wano wondfon yiirude nii, e no wondfon nanirde nii. ³⁴ Fii kala Daawuuda yahaali ka kammu, kono kanko tigi o wi'i:

«Joomiraado on daalanii Joomi an on:

Joodfor ka sengo an jaamo,

³⁵ haa mi wadsa aybe maa ben ka ley teppe maa.»^f

³⁶ Kanko Petruusu o wi'i kadi: «Awa yo *bolondaaji Isra'iila din fow andu e nder pellital wonde Allaahu on wadii Iisaa, oo mo fempunodon, Almasiihu e Joomi.»

Fii Mofftal Aranal ngal

³⁷ Bay be nanii d'un, d'un naati e berde maabbe den. Onsay be wi'i Petruusu e beya sahaabaabe: «Musibbe, ko honfunk men haani wadufude?»

e **2:28** 2.28 Zab. 16.8-11

f **2:35** 2.35 Zab. 110.1

³⁸ Petruusu wi'i be: «Tuubee, mo kala e mon kadi *lootoo maande kisiyee e innde Iisaa Almasiihu on, fii yaafuyee junuubaaji mon din. Onsay on hebay dokkal Ruuhu Seniido on. ³⁹ Ko fii fodaari ndin ko fii mon e fii bibbe mon ben e fii kala woddiido, d'un ko kala ben be Alla Joomiraado men on noddoyta.»

⁴⁰ Awa ko kongudi duududi goo kadi o seeditorani be, e himo waajotonoo be kadi, wi'a: «Dandee hoore mon e nguu jamaanu boyliingu.» ⁴¹ Ben jabube kongol makko ngol, lootaa maande kisiyee. Nden nande ko wa guluuje tato yimbe beyditii e mabbe.

⁴² Onsay be duumii e janndeeji ben sahaabaabe, e mottondirgol fii jokkere endan e naamidugol e toragol Alla. ⁴³ Njalaw hebi mo kala e mabbe. Tawi sahaabaabe ben no wadaynood kaawakeeji moyyi e maandeeji heewudi. ⁴⁴ Onsay gomdinnoobe ben fow wontidi, be hawti piiji din fow. ⁴⁵ Be yeeyi keyeeji mabbe din e ko wonani be kon, be senditi dun hakkunde mabbe, mo kala e ko hatonjini kon. ⁴⁶ Tawi nande woo e nder wakkilaare mabbe e nanondiral hibe wontidi, hibe ka *juulirde mawnde, awa kadi be naamidayno ka nder cuudi, be naamida e nder welo-welo e bernde laabunde, ⁴⁷ be manta Alla, be hebayno kadi sulfu jamaa on fow. Joomiraado on kadi no beydiraynood *moftal mabbe ngal nande woo ben wonaabe dandeede.

3

Fii no Jukkunnaajo Nawndiraa ka Dambugal

Deftere Kuude Sahaabaabe Ben 3:1ix Deftere Kuude Sahaabaabe Ben 3:12

Juulirde Mawnde

¹ Nande goo, tawi Petruusu e Yuuhanna no yahude ka *juulirde mawnde ka waqutu juleteedo e saa'i sappoo e jowabo on. ² Dun hawrondiri aaden jibindinaado e boofoyaagal no addeeede joddinee ka dambugal juulirde mawnde wi'eteengal Dambegal Fotungal, fii toragol naatoobe ben ka juulirde, wano woowiran-noo mo non kanko jukkunnaajo on nande woo. ³ No o yiirunoo Petruusu e Yuuhanna no e fii naatugol, o torii yo be okkor mo. ⁴ Kono Petruusu e Yuuhanna tenyini mo, be wi'i: «Ndaarii men!» ⁵ Kanko kadi o tenyini be, himo tanyinino hebirgol be goddsun.

⁶ Kono Petruusu wi'i mo: «Mi maraa kaalisi maa kañje, kono non mi okkorte ko mi jogii kon. Immo, waawaa yahude e innde Iisaa Almasiihu on, oo jeyaado Naasirata!» ⁷ Onsay kanko Petruusu o jogori mo jungo makko jaamo ngon, o immini. Tun koyde on ñen e kolbule mun ñen sattiti. ⁸ O hawtii kisan, o nangani yaadu, o naatidi e mabbe ka juulirde mawnde e hoore himo yaha hoccoo, manta Alla. ⁹ Jamaa on fow yi'i himo yaha manta Alla. ¹⁰ Bay be anditii wonde ko kanko joodotonoo toroo ka dambugal juulirde mawnde wi'eteengal Fotungal, be ñaldfi ñun, be haawii fii kon ko o wadanaa.

Fii Waaju Petruusu Dimmu ngun

¹¹ Kono tawi on jukkunnaajo alaa seedude e Petruusu e Yuuhanna. Jamaa on fow dogiri ka be woniri ton, ñun ko ka tungarru wi'eteendu *Tungarru Sulaymaana, e hoore hibe ñaldfi. ¹² Bay

Deftere Kuude Sahaabaafe Ben 3:13x Deftere Kuude Sahaabaafe Ben 3:22

Petruusu yi'ii dun, o wi'i jamaa on: «Ko onon yo *Isra'iilayankeebe, ko fii hondun njaalandon fii dun? E ko fii hondun ndaarirton men nii, wa si ko doole amen maa dewal amen men imminiri oo neddo, o waawi yahude? ¹³ Awa kadi on Alla Ibraahiima e Issaqa e Yaaquuba, dfun ko on Alla baabiraabe men ben, o mawnini-in on Jiyaado makko, dfun ko Iisaa, on mo hendinnodson Pilaatu lando on, yeddudson, dfun ko on mo o aadinoo accitugol. ¹⁴ Kono onon yeddudson on *Seniido Feewudo, toridon sulfu fii yo on accitane warnoodo yimbe goo, ¹⁵ wardon on wond'o dayyere ngurndan dan. Kono Allaahu on immintinii mo e hakkunde maybe ben. Ko men seedee dfun. ¹⁶ Ko tippude e gomdingol innde makko nden kanko Iisaa, wadi si oo neddo sattiti. Ko e immorde e innde Iisaa nden e gomdingol e mayre on wadi si oo neddo yedaa cellal timmungal yeeso mon on fow.

¹⁷ «Jooni non yo musibbe, mido andi, onon e hooreebe mon ben, ko angal andude warrunodson dfun. ¹⁸ Kono ko non Allaahu on laatiniri kon ko o longinnoo annabaabe ben fow ko adii dfun, dfun ko wonde *Almasiihu makko on no haanunoo tampude. ¹⁹ Jooni non, tuubee, ruttdodon fii yo junuubaaji mon din monte, ²⁰ fii no Joomiraado on yedira on saa'iji fowtere immorde e makko, e fii no o additirana on on Almasiihu mo fodanodson, dfun ko Iisaa. ²¹ Himo haani wonude ka kammu ton haa tuma Allaahu on heydintini ko o daalirnoo annabaabe makko laabube ben kon fow gila law. ²² Muusaa wi'uno: «Alla Joomiraado mon on yaltinanoyay on annabaajo wa'udo wa an min e hakkunde

Deftere Kuude Sahaabaabe Ben 3:23xi Deftere Kuude Sahaabaabe Ben 4:6

musibbe mon ben. Ko yo on hedoyo kala ko o wi'oyi on. ²³ Kono kala on mo hedoyaaki on annabaajo, o suutete e hakkunde jamaa on.»

²⁴ Kanko Petruusu o wi'i kadi: «Annabaabe *hiitinoobe ben fow, gila e Samu'iila haa e hikkiibe e makko ben, hari hiitinoke fii dee nalaade doo. ²⁵ Ko onon woni bibbe annabaabe ben e *ahadi ndi Allaahu on yettannoo baabiraabe men ben, ka o daalannoo Ibraahiima wonde: ‹Beynguureeji aduna on fow barkinte sabu jurriya maa on.›g ²⁶ Ko fii mon onon taho Allaahu on addirnoo oo Jiyaado makko, mo o immintini e hakkunde maybe ben, fii ko barkinira on, sendugol mo kala e mon e wadugol ko boni.»

4

*Fii no Petruusu e Yuuhanna Addiraa yeeso
Mawbe ben*

¹ Wa fewndo ko Petruusu e Yuuhanna yew-tata d'un jamaa on, *yottinoobe sadaka ben e hooreejo aynoobe *juulirde mawnde nden e *Sadduusiyaabe ben ari. ² Ko fii hari be haabii ko ben woni waajaade jamaa on kon e ko ben woni banginde kon wonde ko e Iisaa ummutal maybe ben woni. ³ Be fawi be juudse. Bay hari nibbii, be soki be haa bimbi nden nande. ⁴ Kono buy e nanunoobe din kongudi mabbe gomdfini, adadu ben yimbe gomdinbe ko wa be guluuje njowo.

⁵ Bimbi nden nande yeesoobe Yahuudiyan-keebe ben e mawbe mabbe ben e jannoobe fii Sariya ben mottondiri Yerusalaam, ⁶ wondude e

Hannaana, dun ko yottinoowo mawdo sadaka on, e Qayaafa e Yaaya e Iskandar, e beya jeyaabe e gorol yottinoowo mawdo sadaka on. ⁷ Be addi Petruusu e Yuuhanna hakkunde maabbe, be landii be, be wi'i: «Hara ko mbawdi hondi maa innde honde wadifirdon dun?»

⁸ Onsay Petruusu heewudo *Ruuuhu Seniido on wi'i be: «Ko onon yo yeesoobe jamaa e mawbe, ⁹ bay hande meden landiteede fii moyyere nde men wadani aaden jukkunnaajo, e noone no o ndikkiniraa, ¹⁰ awa andee fota, jamaa *Isra'iila on fow kadi anda, ko e innde Iisaa Almasiihu on, oo jeyaado Naasirata, dun ko on mo fempunodon, Alla immintini mo e hakkunde maybe ben, ko sabu on oo neddo selliniraa, o darii yeeso mon doo. ¹¹ Ko Iisaa on woni: «Hayre nde onon mahooibe ben hawkunodon nden wontii hittunde ka sobbundu. ¹² Ko fii kisiyee hebortaa goddo goo si wonaa Iisaa Almasiihu on, sabu hay gooto okkaaka innde goo ka ley kammu doo, nde waaweten dadfirde sabu mun si wonaa nde makko nden.»

¹³ Bay be yi'ii pellital Petruusu e Yuuhanna ngal, dun naldini be. Be ndaari be tawi bee ko be yinkoy koy jangaa, be anditiri be ko be wondaynoo e Iisaa kon. ¹⁴ Nde tawnoo pawndaado on no darii takko maabbe, be tawi alaa fus ko be jaaboo. ¹⁵ Be yamiri yo ben yaltine, be accana be mbatirdu ndun. Onsay be diisondiri hakkunde maabbe, be wi'i: ¹⁶ «Ko hondun wadeten bee? Ko fii no henani kala hoodudo Yerusalaam wonde bee wadii kaawake

Deftere Kuude Sahaabaabe Ben 4:17xiii Deftere Kuude Sahaabaabe Ben 4:26

moyyo tiidsudo, en waawataa-le yeddude dun.
¹⁷ Jooni non, fii wota d'fun lollu buri nii e hakkunde jamaa on, haden be, sattinanen be wota be wowlan hay gooto nden innde hande kadi.»

¹⁸ Onsay be nulitani Petruusu e Yuuhanna, be tonjani be few waajagol maa janna e innde Iisaa. ¹⁹ Kono Petruusu e Yuuhanna jaabii be, wi'i: «Hara no feewi yeeso Alla ka men doftoo on, men acca Alla? ²⁰ Naawanee hoore mon dundon, ko fii men waawataa ronkude wowlude ko men yi'irnoo gite amen d'en kon e ko men nanirnoo noppo amen din kon.»

²¹ Be beydi be sattinande fii d'fun, kono bay be hebaali feere no be donkinira be, sabu ko jamaa on fow wonnoo mawninde Alla fii kon ko wadi d'fon, be acciti be. ²² Tawi on neddo sellinaado, mo kaawake moyyo on wadaa e hoore mun, burnii duubi cappande nay.

Fii no Gomdinbe ben Torori Alla

²³ Bay Petruusu e Yuuhanna accitaama, be yaari ka dimmoobe maabbe ben, be fillitanii ben kala ko hooreeb'e yottinoob'e sadaka ben e mawbe ben wi'i be kon. ²⁴ Bay ben nanii ko be wi'i kon, be hawtiti, be ewnii Alla, be wi'i: «Ko an yo Joomiraado Tagudo leydi e kammu e baharu e kala ko woni e mun, ²⁵ ko an daalirnoo Ruuhu Seniido on, longindaa oo jiyaado maa, d'un ko Daawuuda oo baabiraawo amen d'fundfoo:
'Ko fii hondun leyzi din monondiranta,

e ko hondun jamaaji din joganii dii mijooji
mehi?

²⁶ Lambe aduna on no dartodi,

hikkondirbe e mabbe ben no wontidi,
dartii Joomiraado on e *Almasiihu makko
on.ⁱ

²⁷ «Awa yaa an Alla, ka haqiqiqa, e nder ndee saare doo, oo wi'eteedo *Heroodu e oo wi'eteedo Pilaatu Pontii, be wontiduno e be wonaa Yahuudiyanke ben, wondude e Isra'ilayankeeben, be dartii oo Kurkantoodo ma Seniido, d'un ko Iisaa, on mo subidaa. ²⁸ Be wadiri d'un faale maa on e bawgal maa ngal, fii timmingol kodduruyee maa on. ²⁹ Jooni non, yaa an Joomiraado, wattan yiili fii bee jokkube men, newnanaa kadi jiyaabe maa ben fejjinirgol daaluyeeji maa din pellital timmungal. ³⁰ Fontu sookewo maa ngon fii no pawndule e maandeeji e kaawakeeji moyyi wadira e innde Kurkantoodo ma Seniido on, d'un ko Iisaa.»

³¹ Bay be gaynii toraade, nokkuure nde be wonnoo e mun nden dimbii, be fow be heewi Ruuhu Seniido on, be woni e fejjinirgol daaluyee Alla on pellital.

Fii Moftal Gomdinbe ben

³² Gomdinbe ben fow wonti bernde wootere e miijo wooto, tawi hay gooto e maßbe wi'ataa ko jeyi kon ko halal mun, tawi ko be kafu e fow. ³³ Tawi *sahaabaabe ben no seeditora bawgal tiifungal fii ummutal Iisaa Joomi on, moyyere tiifunde kadi woni e hoore mabbe be fow. ³⁴ Tawi baaso alaa hakkunde maßbe, ko fii kala marnoodo ngesa maa suudu yeeyitayno dun, adda coggu ko yeeyi kon, ³⁵ watta e juude

ⁱ **4:26** 4.25-26. Zab. 2.1-2

Deftere Kuude Sahaabaabe Ben 4:36xv Deftere Kuude Sahaabaabe Ben 5:8

sahaabaabe ben. Dun senditee, mo kala hendoo ko handi kon.

³⁶ Yuusufu kadi, d'un ko on mo sahaabaabe ben jammi Barnabaasi (ko woni firo d'un ko «wakkilinoowo»), on ko *Lewiyankeejo mo Siipuru, ³⁷ o yeeyi ngesa himo marnoo, o addi mbuudi din, o watti e juude sahaabaabe ben.

5

Fii ko Hebi Hanaaniyya e Safirata kon

¹ Onsay gorko goo kadi wi'eteedo Hanaaniyya e beyngu mun Safirata yeeyi ngesa hibe marnoo.

² E nder haldigal makko e beyngu makko, o mari feccere coggu ko yeeyaa kon, o yetti ndeya feccere o watti e juude *sahaabaabe ben.

³ Onsay Petruusu wi'i mo: «Hanaaniyya, ko honno Ibuliisa naatiri ka bernde maa haa ka fennanaa *Ruuuhu Seniido on, maraa feccere coggu ngesa mban. ⁴ Ado a yeeyude mba, wonaa an jeyunoo mba? E bay a yeeyii mba, wonaa an jeyunoo coggu mabba on? Ko fii hond'un non wadandaa ka bernde maa sifa ngal kuugal? Awa hinaa yimbe ben fenandaa, kono ko Alla.»

⁵ Nde Hanaaniyya nanirnoodin kongudi, o yani, o maayi. Tun kulol njanol hebi ben hedinoobe don fow. ⁶ Onsay sukaabe ben immii wadi kasannge e makko, be nabi mo, be surroyi.

⁷ Bawto d'un, bay wa saa'iiji tati feyyii, beyngu makko ari e hoore o andaali kon ko wadi.

⁸ Onsay Petruusu wi'i mo kanko debbo on: «Yeeto lan si tawii ko nguu coggu doo yeeyud'on ngesa mban.»

Debbo on jaabii mo, wi'i: «Eyyo, ko nguu coggu doo.»

⁹ Petruusu wi'i mo fahin: «Ko fii hondsun hal-dandon ndarndagol Ruuhu Joomiraado on? Awa e hino surroybe moodi maa ben ka dambugal daa. Be nabete an kadi.»

¹⁰ Don kisan o yani e ley koyde Petruusu, o maayi. Wa ko sukaabe ben naatata, be tawi kanko debbo on kadi o maayii. Be nabi mo, be surroyi takko moodi makko. ¹¹ Kulol moolanaangol kadi hebi *moftal ngal fow e kala nanunoobe fii d'un.

Fii Kaawakeeji Moyyi di Sahaabaabe ben Wadi

¹² Tawi sahaabaabe ben no wadude maandeeji e kaawakeeji moyyi d'uudufi hakkunde jamaa on. Hari kambe gomdinbe ben fow hibe mot-tondiri e nder nanondiral mabbe ka *Tungarru Sulaymaana. ¹³ Tawi jamaa on no mantude be fota, kono hay gooto e mabbe suusataano be badaade. ¹⁴ Tawi jande woo wonbe gomdinde Joomi on no beydaade fota, hara ko worbe e rewbe. ¹⁵ Awa kadi nawnuube no addetenoo ka sera ballanje, wallinee e buutuuji maa e gate, fii nde Petruusu no feyya, hay si ko yo d'owdi makko ndin hawru e goddo e mabbe. ¹⁶ Lappi lappi yimbe no wuggotonoo iwa e deya ca'e heedude e Yerusalaam, be addora nawnuube ben e be jinna tampini, ben fow sellinaa.

Fii no Sahaabaabe ben Naawiraa

¹⁷ Onsay *yottinoowo mawdo sadaka on e kala wondunoobe e makko, d'un ko ndee fedde

Deftere Kuude Sahaabaabe Ben 5:18xvii Deftere Kuude Sahaabaabe Ben 5:28

bee *Sadduusiyaabe, be hawtodi e nawliigu timmungu. ¹⁸ Be fawi sahaabaabe ben juude, be soki be. ¹⁹ Kono e nder on jemma, malaa'ikaajo Joomiraado on udditi baafe kaso ngon, o yaltini be, o wi'i be: ²⁰ «Yahee wonoyon ka *juulirde mawnde, fejninanon jamaa on kala kongudi fii dan ngurndan kesan.»

²¹ Bay be nanii dfun, no weetirnoo, be naatoyi ka juulirde mawnde be woni e waajagol.

Onsay yottinoowo mawdo sadaka on e wondibbe mun ben hewti, be nodditi dental fewjoobe ben, e dental mawbe *Banii-Isra'iila'en ben fow, be immini ko yahana sahaabaabe ben ka kaso. ²² Bay ben suufaabe hewtii, laatii be tawaali beya ka kaso. Be yiltitii be hunitii be, be wi'i: ²³ «Men yahuno, men tawi kaso ngon no sokiraan no holnori, ayninaabe dame den kadi mo bee e ka woni. Kono bay men udditii, men tawaali hay gooto nder ton!» ²⁴ Nde hooreejo aynoobe juulirde nden e hooreebe yottinoobe sadaka ben nanirnoo din kongudi, be jibii fii ben e ko honno fii d'un sakkitoroya.

²⁵ Tun goddo ari, wi'i be: «E hino yimbe be sokunodon ka kaso ben ka waajotoo jamaa on ka juulirde mawnde too!»

²⁶ Onsay hooreejo aynoobe ben e suufaabe mun ben yahani be, addi e baawo doolugol be, sabu hibe hulunoo wota jamaa on fidir be kaaye.

²⁷ Bay be addii be, be darni be yeeso dental fewjoobe ben. Onsay yottinoowo mawdo sadaka on landori be nii, wi'i: ²⁸ «Hidon andi hari men hadiino on few waajorgol ndee innde! Jooni

non e hino on lannii lollinde waajuuji mon din
Yerusalaam. E hoore dun hidon faalaa fawude
kii wonkii oo neddo e hoore amen!»

²⁹ Onsay Petruusu e sahaabaabe ben jaabii
be, wi'i: «Ko Alla doftetee edii yimbe ben.

³⁰ On Alla baabiraabe men ben immintinii lisa,
on mo warirdon sempugol e leggal, wenga.

³¹ Allaahu on bantirii mo ka sengo mun jaamo,
wadii mo Ardotoodo e Dandoowo fii okkugol
*Isra'iila'en feere no be tuubira e no be yaafora-
nee junubaaji. ³² Menen e Ruuhu Seniido mo
Allaahu on yedi ben doftiibe mo, ko men seedee
dun.»

³³ Bay ben nanii ko ben sahaabaabe wi'i kon,
be hibbii haa be faalaa be warude. ³⁴ Kono
Fariisiyaajo jannoowo fii Sariya on, wi'eteedo
Gamaliyiila, mo jamaa on fow hoolii, hawtii
ka nder dental, yamiri yo ben sahaabaabe yal-
tine ton taho. ³⁵ Onsay o wi'i: «Ko onon yo

Isra'iilayankeeb, wattanee yiila e ko miijidon
wadugol bee kon. ³⁶ Ko fii hidon andi neebaali
ko Teyodaasu, waditiido ko teddudo, immii, mo
wa yimbe teemedde nayo iwtirnoo baawo mun.
Kanko Teyodaasu o waraa, doftinoobe mo ben
fow lancaa. E hoore dun hay huunde nantaaka.

³⁷ Bay feyyii e on, wi'eteedo Yudaasi, jeyaado
Jaliilu, immii ka fewndo windito. O dabbi
yimbe ko iwtira baawo makko, on kadi mulaa,
doftinoobe mo ben fow kadi saakitaa. ³⁸ Jooni
min mi wi'ay on, tertee bee yimbe, acciton be,
be yaha. Si tawii dee ebbooje maa dee kuude ko
e neddanke'en iwi, de bonoyay. ³⁹ Si tawii non
ko e Alla iwri, haray on waawataa de bonnude.

Reenee fii wota on wonu habidoobe e Alla!»

⁴⁰ Be fow be iwtiri e baawo ko o wi'i kon. Onsay be nodditi sahaabaabe ben, be focci be, be hadfi be wowlugol innde Iisaa, be acciti be.

⁴¹ Kambe kadi be yalti ka hakkunde dental e hoore hibe weltii ko tawi kon hibe foddi e aybineede fii innde Iisaa nden. ⁴² Tawi be haabataano waajagol janna ka juulirde mawnde e ka cuudi fii Kibaaru Moyyo Iisaa Almasiihu on.

6

Fii no Taalibaabe ben Toddornoo Yeesoobe ko Wallitoo be

¹ Nde tawnoo taalibaabe ben no beydaade tun e den balde don, Yahuudiyankeebé wowloobé haala Gereeki wonbe hakkunde mabbe ben woni e ḥurjurtugol beya Yahuudiyankeebé, sabu ko be welsindii wadangol keynguube mabbe ben ko ben handi jande woo kon. ² Onsay *sahaabaabe ben sappoo e dido nodditi taalibaabe ben no be fotata fodde, be wi'i ben: «Haanaa ka acciten daaluyee Alla on fii sendugol jaameteeji tun.

³ Ko dfun wadi, yo musibbe, subee hakkunde mon yimbe njeecido, hara ko holniibe, heewubé Ruuhu Allaahu on e faamu, ko halfinen dee golle. ⁴ Dun, menen men duumoto e toragol e kurkanagol daaluyee on.»

⁵ Din kongudi weli be no be fotata fodde. Onsay be subii oo wi'eteedo Astefaana, on ko neddo heewudo gomfinal e *Ruuhu Seniido on, e Filiipu e Porokoor e Nikanuura e Timuuna e Parmeena e Nikolaasi mo ka wi'eteedon

Deftere Kuude Sahaabaabe Ben 6:6xx Deftere Kuude Sahaabaabe Ben 6:15

Antiyoosi-Sirii, on ko naatunoodo e diina Yahuudiyanke. ⁶ Onsay be weebitani be sahaabaabe ben, ben *fawi juude mun den e hoore mabbe, du'anii be.

⁷ Tawi daaluyee Alla on no layude tun, adadu taalibaabe ben no beydaade fota e nder Yerusalaam. E hoore dun jamaa *yottinoobe sadaka dhuufudo no doftaade gomfinal ngal.

Fii no Astefaana Nangiraa

⁸ Tawi Astefaana, on heewudo sulfu e bawde, no wadaynoodo kaawakeeji moyyi mawdi e maandeeji e hakkunde jamaa on. ⁹ Onsay wobbe be Sirenii e be Aleksandiri e bee be Silisii e be *Aazii, wonnoobe ka juulirde wi'eteende Juulirde Rindinaabe, be woni e yeddondirgol e Astefaana. ¹⁰ Kono tawi be alaa kutu dartagol faamu makko ngun e kongudi ci Ruuhu Allaahu on longinaynoodo mo din.

¹¹ Onsay be yeeni wobbe yo wi'u: «Men nanirii mo kongudi hoynudi Muusaa e Alla!» ¹² Ko nii be yuuniri jamaa on e mawbe ben e jannoobe fii Sariya on, ben ari nangiri Astefaana doole, be nabi mo ka dental fewjoobe ben. ¹³ Tawi hibe ebbi wobbe ko seeditoo fenaande, ben wi'i: «Oo neddo no jokki aybingol nokkuure hormorde nden e Sariya on. ¹⁴ Ko fii men nanii himo wi'a wonde, Iisaa, oo jeyaado Naasirata, lancay ndee nokkuure, o wayla kadi naamuuji ci Muusaa wadani en din.»

¹⁵ Onsay ben wonnoobe ka dental don ndaari mo kanko Astefaana, tawi yeeso makko ngon wa'itii wa yeeso malaa'ikaajo.

7

Fii Yewtere Astefaana nden

¹ Onsay *yottinoowo mawdø sadaka on landii mo, wi'i: «Hara dfun ko non woniri?»

² Astefaana jaabii, wi'i: «Ko onon yo musibbe an e baabiraabe an, heditee! Alla Jom Mangural on feepanno Ibraahiima ben men fewndo ko o wonnoo Mesopotamii, dun ko ado o hodoyde Haraana. ³ O daalanno mo, o wi'i: «Yaltu ka leydi maa e ka bolondaa maa, yahaa haa e leydi ndi mi holloyte.»j

⁴ Kanko Astefaana o wi'i kadi: «Onsay o yalti e ndin leydi ben Kaldiyankeebe, o hodsoyi Haraana. Bay ben makko faatike, Allaahu on addi mo kanko Ibraahiima haa e ndii leydi ndi wondon e mun jooni. ⁵ E hoore dfun o yedaali mo ndondi woo e ndii leydi, hay non yero ka o tippa koengal. Kono o fodi mo okkugol mo ndi, ndi wona halal makko kanko e jurriya makko aroyoowo baawo makko on. Wa fewndo ko Alla daalani mo fun, hari o maraa biddo. ⁶ Allaahu on daalani mo kadi wondema jurriya makko on aroyay nde daakoyii e leydi jananiri, wonbe e ndin leydi kurkoya be, tampina e nder duubi teemedde nay. ⁷ Kono o daalani mo kadi, o wi'i: «Ko min naawata on jamaa kurkoydo be. Bawto dñun, be yaltoya ton, be rewoyammi e ndee nokkuure doo.»^k ⁸ E hoore dfun Allaahu on yettodi e makko *ahadi ndi maande mun woni *sunninegol. Ko e nder dñun Ibraahiima dapi

j **7:3** 7.3 Fud. 12.1 k **7:7** 7.6-7 Fud. 15.13-14, e Egg. 3.12

Issaaqa, o sunnini mo ka palaande jeetatabere. Issaaqa wadiri non Yaaquuba, Yaaquuba kadi wadiri non e maamiraabe men ben, dun ko bibbe makko ben sappoo e dido.

⁹ «Ben maamiraabe men nawli Yuusufu, be yeeyi mo fii nabegol *Misira. ¹⁰ Kono tawi Alla no wondi e makko, o sorti mo e nder din tampereeji makko fow, Alla okki mo sulfu e faamu yeeso Fir'awna. On lando Misira wadi mo ardotoodo leydi Misira ndin, e ka galle makko kanko lando on. ¹¹ Bawto dfun, heege wadi e nder leydi Misira ndin fow haa hewtoyi *Kanaana, tampere nden tiidi, tawi ben maamiraabe men alaa hebude ko jaama. ¹² Yaaquuba nani wonde jaametee no woodi Misira. Ka laawol aranol, o immini faybe makko ben, d'un ko maamiraabe men ben. ¹³ Ka laawol d'immol, Yuusufu andintinii ben-gootoobe mun ben, ko onsay Fir'awna andi iwdi Yuusufu ndin. ¹⁴ Onsay Yuusufu immini ko yahana ben makko Yaaquuba e beynguure mun nden fow, tawi ben no yonunoo cappande njeedido e njowo. ¹⁵ Kanko Yaaquuba o yahi Misira. Ko don kanko e ben maamiraabe men be faatii. ¹⁶ Be nabaa Sakiima, be wattinoya ka berde de Ibraahiima ittunoo kaalisi soodi Sakiima don e juude bibbe Hamuura ben.

¹⁷ «Nde tawnoo saa'i on badike ka Allaahu on hunna ko o fodunoo Ibraahiima kon, tawi jamaa makko wondo Misira on, no burtude tun d'uudfude, ¹⁸ haa nde godso mo andaano Yuusufu laamii Misira. ¹⁹ On lando dayni lejol men ngol, o tampini maamiraabe men ben haa o hawkini be bibbe maabbe ben fii wota ben wuuru. ²⁰ Ko fewndo on saa'i don Muusaa

Deftere Kuude Sahaabaabe Ben 7:21xxiii Deftere Kuude Sahaabaabe Ben 7:32

jibinaa, tawi himo labaa yeeso Alla. O muyninnaa lebbi tati ka galle ben makko. ²¹ Bay o accaama ka yaasi, jiwu Fir'awna on hoccii mo, ne'iri mo wa biddo mun. ²² Onsay Muusaa jannaa gande Misirayankoobe ben fow, o woni tiida-kongudi e kuude.

²³ «Bay wonii o timminii duubi cappande nay, o miijii e bernde makko fii yewtoyagol musibbe makko ben, d'un ko *Banii-Isra'iila'en. ²⁴ O yi'i goddo e ben musibbe makko no tampinee. O ari dandugol mo, o yottanii mo, o waru Misirayankoojo on. ²⁵ Tawi himo sikka musibbe makko ben faamay wonde Allaahu on yedii be kisiyee tippude e sookeeje makko den, kono kambe be faamaali d'un. ²⁶ Bimbi nden pande, o yaltiti e hakkunde wobbe e ben musibbe makko ka piirata, o woni e moyyintingol hakkunde maabbe, o wi'i be: ‹Ko onon woni musibbe, ko fii hond'un mo kala e mon no tampina oya?›

²⁷ «Kono wonnoodo tampinde jokondo mun on wiggii Muusaa, wi'i: ‹Ko hombo wadu-maa lando e jaawoowo e hoore amen? ²⁸ Kaa a faalaan warude, wano warirdaa Misirayankoojo on non hanki?› ²⁹ Sabu ngol kongol, Muusaa dogi, yahi daakoyii e ndii leydi wi'eteendi Midiyaani, o dani d'on biibbe dido.

³⁰ «Duubi cappande nay bawto d'un, malaa'ikaajo feepani mo e loyngol yiite ka pitahun woni sumude ka wulaa fello *Sinaayi. ³¹ Bay o yi'ii d'un, kanko Muusaa o naldii fii kon ko o yi'i. Nde tawnoo himo badaade fii tenyingol, o nani Joomiraado on no wi'a: ³² ‹Ko min woni Alla Joomiraado baabiraabe maa ben,

Alla Ibraahiima e Issaaqa e Yaaquuba.» Onsay Muusaa diwni, tawi suusataa ndaarirde ton.

³³ «Joomiraado on daalani mo kadi, wi'i: «Solu pade maa den, ko fii ndee nokkuure nde wondfaa e mun ko nokkuure hormorde.» ³⁴ O daalani mo kadi, o wi'i: «Mi yi'ii tampere jamaa maa wondo Misira on, mi nanii woytaango mabbe ngon, mi jippike fii jattingol be.» O daalani mo kanko Muusaa, o wi'i: «Mido imminde ma Misira.»

³⁵ Kanko Astefaana o wi'i kadi: «Ko Muusaa on mo be hayfinnoo be wi'i: «ko hombo wadumaa lando maa jaawooowo?», ko on Alla immini tippude e ballal malaa'ikaajo feenannoodo mo ka pitahun on fii wonugol lando e sottoowo. ³⁶ Ko on yaltini be e hoore wadfugol kaawakeeji e maandeeji e nder leydi Misira, haa nabani ka *Baharu Bodeejo e ka wulaa e nder duubi cappande nay.

³⁷ Ko Muusaa wi'unoo Banii-Isra'iila'en wonder: «Alla yaltinanoyay on annabaajo wa'udo wa an min e hakkunde musiibbe mon ben.»^m ³⁸ Fewndo ko jamaa on mottondirnoo ka wulaa, ko kanko wondunoo e malaa'ikaajo yewtaynoodo mo on ka fello Sinaayi, wondude kadi e maamiraabe men ben. Ko kanko kadi Alla yedi daaluyeeji ngurndan din fii hewtingol en di. ³⁹ Kono tawi maamiraabe men ben faalaaka mo doftaade, be bugitii mo, tawi berde mabbe ko Misira fewti. ⁴⁰ Be wi'i *Haaruuna: «Moyyinan men allaaji ko ardoor men. Ko fii men andaa ko hebi Muusaa oo yaltindo men leydi Misira.» ⁴¹ E nder den balde don be moyyini nandolla ga'un nagge,

Deftere Kuude Sahaabaabe Ben 7:42xxv Deftere Kuude Sahaabaabe Ben 7:49

be addani ndun nandollaaru sadaka, be weltori kon ko be moyyiniri juude mabbé. ⁴² Onsay Allaahu on hucci be, o accidi be e rewugol koode ñen ka kammu, wano windori non ka deftere annabaabe ben, ka o daali ñon:

«Ko onon yo bolondaa *Isra'iila,
fewndo hirsaynodon wadon sadakaaji ka
wulaa
e ñeder duubi cappande nay,
hara ko min wadanaynodon ñun?

⁴³ Kono bay on rewii oo allaajo wi'eteedo Mu-
luuka,
on rewii kadi ndee hoodere oo allaajo mon
wi'eteedo Ronfa,

ñin nandollaaji ñi moyyindon fii ko rewon,
min kadi mi bugoto on toonin *Baabiila.»ⁿ

⁴⁴ «Tawi maamiraabe men ben no wondi e
*rewirdu ndu seeditoore nden woni e mun ndun
ka wulaa ton, wano yewtidaynoodo e Muusaa
on yamirirnoo mo yo ndu moyyinire non, e sifa
no o hollirnoo mo non kadi. ⁴⁵ Bay maamiraabe
men hikkiibe e bendon ben yettitii ndu, be yaadi
e mayru, tippude e yamiroore Yaasuwa, e ndii
leydi ñii ley yi ñi Alla bugitinoo yeeso mabbé,
ndu lutti ñon haa hewti e Daawuuda, ⁴⁶ on
mo Allaahu on yedi sulfu, o torii ka o darnana
Alla Yaaquuba on suudu, ⁴⁷ kono ko Sulaymaana
wonnoo ko darnani mo suudu.

⁴⁸ E hin-le Jom Bural on hodataa e ko godso
mahiri juude, wano annabaajo on holliri non
wonde, Alla daali:

⁴⁹ «Ko kammu ngun woni jullere laamu an nden,

Deftere Kuude Sahaabaabe Ben 7:50xxvi Deftere Kuude Sahaabaabe Ben 7:60

leydi ndin wonanimmi ka mi tippa.»
Joomiraado on daaluno:
«Ko suudu hondu darnanton mi,
maa ko nokkuure honde wonantammi
fowtorde?»

⁵⁰ E hara hinaa bawgal an mi warri d'fun fow?ⁿ
⁵¹ «Ko onon yo yimbe yoora-hooreebe, be berde
mun e be noppo mun uddi, onon non ko on
dartotoobe soono woo *Ruuhu Seniido on, wano
baabiraabe mon ben dartoraynoo non! ⁵² E hara,
ko hombo e annabaabe ben wonnoo mo baabi-
raabe mon ben bittinaano? Hay be warno ben
adinoobe *hiitaade fii arugol Feewudo on, on mo
janfidon wardon, ⁵³ d'fun ko onon be huutoraali
Sariya mo malaa'iikaabe ben hewtinnoo on on!»

Fii Piyeede Astefaana

⁵⁴ Bay ben nanii d'un, berde mabbe den sokii,
be niatindiri niiye mabbe den, monee makko
kanko Astefaana. ⁵⁵ Kono kanko Astefaana o
burti heewude Ruuhu Seniido on, o tiggiti ka
kammu, o yi'i annoora Alla on, o yi'i kadi Iisaa no
darii ka sengo jaamo Alla. ⁵⁶ Kanko Astefaana,
o wi'i: «Mi yi'ii kammu ngun no udditii. E hino
ka *Bii-Aaden on darii ka sengo jaamo Alla!»

⁵⁷ Onsay be fow be uddi noppo, be sonki e
makko, be wubbani mo. ⁵⁸ Be radii mo haa ka
baawo saare, be wariri mo kaaye. Seedeebe ben
acci conci mun din e ley koyde suka no wi'ee
Saawulu.

⁵⁹ Wa fewndo ko be fidata mo kanko Astefaana
kaaye, tawi himo tororde nii, wi'a: «Ko an yo
Joomi an Iisaa, jabbo wonkii an kin!» ⁶⁰ Onsay o

ⁿ 7:50 7.49-50 Isa. 66.1-2

Deftere Kuude Sahaabaabe Ben 8:1xxvii Deftere Kuude Sahaabaabe Ben 8:8

jicci kadi, o ewnii ko tiidi, o wi'i: «Joomi, wota a faw oo junuubu e hoore bee!» No o gaynirnoo wowlude dun, o timmi.

8

¹ Tawi Saawulu no wonani fii mayde Astefaana nden.

Fii no Saawulu cukkori Moftal ngal

Nden nande jokkere mawnde hebi dental gomdinbe wongal ngal Yerusalaam haa be fow be saakitii be yaari e ngal diiwal Yahuuda e Samariiya, si wonaa *sahaabaabe ben. ² Onsay yimbe be dewal ben surri Astefaana, be fesi mo kadi fota. ³ Tawi Saawulu kajun ko lancaynoodo *moftal gomdinbe ben, ko fii himo naataynoo e cuudi fii wippitugol gomdinbe ben, worbe e rewbe, o feroo ka kaso. ⁴ Ko ben saakitanoobe yahaynoo nokkeeli fow waajoo fii Kibaaru Moyyo on.

Fii no Kibaaru Mooyo on Lolliri Samariiya

⁵ Filiipu kadi yahi e saare jeyaande e diiwal *Samariiya, o waajii d' on fii *Almasiihu on.

⁶ Bay jamaa on nanii ko Filiipu yewtata kon, be yi'ii kadi maandeeji d'i o woni wadude d'in, be habbitii e kongudi d'i o woni yewtude din. ⁷ Sabu tawde jinnaaji no yaltaynoo e yimbe c'uudube be d'i wonnoo e mun, e hoore hidhi haaca ko tiidi, awa kadi maaya-banduubbe buy e boofooibe sellinaama. ⁸ Onsay welo-welo moolanaango wadi e nden saare.

⁹ Kono tawi ado d'un, gorko wi'eteedo Sim'uunu no e nden saare, wadaynoodo mbilankaaku ηaldina jamaa Samariiya on, waditiido ko teddudo. ¹⁰ Hari be fow, gila e tosooko on haa e burdo mawnude on, hibe habbii e makko, hibe wi'a: «Oo ko bawgal Alla wi'eteengal Mawngal ngal!» ¹¹ Tawi hibe habbinoo e makko sabu tawde gila neebii himo ηaldiniraynood be mbilankaakuji makko. ¹² Kono bay be hoolike Filiipu on fejjinando be innde Iisaa Almasiihu on e Kibaaru Moyyo fii *laamu Alla ngun, onsay worbe e rewbe *lootaa maande kisiyee. ¹³ Sim'uunu kadi gomdini. Bay o lootaama maande kisiyee, tawi o seedataa e Filiipu. O wattii yi'ude maandeeji mawdi e kaawakeeji moyyi ka wadata, o ηaldi fii d'un.

¹⁴ Nde bee sahaabaabe wonbe Yerusalem nanirnoo wonde hodube Samariiya ben jabii daaluyee Alla on, be imminani be Petruusu e Yuuhanna. ¹⁵ Ben ari ka mabbe, be toranii be fii yo be hebu *Ruuhu Seniido on. ¹⁶ Ko fii hari Ruuhu Allaahu on jippaaki e hoore hay gooto e mabbe taho, hari ko maande kisiyee tun be lootaa e innde Iisaa Joomi on. ¹⁷ Onsay Petruusu e Yuuhanna *fawi juude mun den e hoore mabbe, ben hebi Ruuhu Seniido on.

¹⁸ Bay Sim'uunu ndaarii tawii ko nde sahaabaabe ben fawunoo juude mun den e hoore mabbe si be okkaa Ruuhu Allaahu on, onsay o addani be mbuudi, o wi'i be: ¹⁹ «Yedee lan min kadi ngal bawgal, fii yo tawu kala mo mi fawi juude an den e hoore mun hebay Ruuhu Seniido on!»

²⁰ Kono Petruusu wi'i mo: «Yo kaalisiji maa dfin halkodu e maa, bay hida sikka dokkal Alla ngal ko kaalisi heborta! ²¹ Ko fii a alaa gebal, a alaa ndondi e nder d'un, bay bernde maa nden laabaa yeeso Alla. ²² Tuubu fii dii mijooji bondi wondi ka bernde maa, torodaa Joomiraado on no di yaaforee si no gasa. ²³ Ko fii mi yi'ii hida tumbii e nder hahhannde, hida humondiri e angal peewal.»

²⁴ Onsay Sim'uunu jaabii, wi'i: «Onon tigi toranee lan Joomiraado on fii kon ko wi'udfon wota hewtan.»

²⁵ Bay ben dido be sahaabaabe ben immin-noo gaynii fejninde daaluyee Joomiraado on e seeditanagol mo, be yiltitii Yerusalaam. E nder yiltitagol maßbe ton, be waajii fii Kibaaru Moyyo on e nder kodooli Samariyankeebe duudufudi.

*Fii ko Wadi kon hakkunde Filiipu e Nuunaado
mo Ecopii on*

²⁶ Malaa'ikaajo Joomiraado on feepani Filiipu, wi'i mo: «Immo jokkaa laawol iwungol Yerusalaam yaari Gaaza, d'un ko ngol ka sengo ley, yaarungol ngol ka wulaa.» ²⁷ Onsay o immii o yahi, o haccii gorko *nuunaado mo Ecopii toowa ndarndeejo e nder laamateeri ndi debbo wi'eteedo Kandaas laamii e mun Ecopii. Tawi ko on gorko halfinaa ngaluuji on debbo fow, tawi on no arnoo Yerusalaam fii rewugol Alla. ²⁸ Ko on yiltitotoo Ecopii, tawi himo joodii e hoore *giri-giriwal makko ngal pucci poodata, himo jangora deftere annabi Isaaya nden. ²⁹ Onsay

Deftere Kuude Sahaabaabe Ben 8:30xxx Deftere Kuude Sahaabaabe Ben 8:36-37

Ruuuh Allaahu on yamiri Filiipu, wi'i: «Wuggo, hewtitodaa oo mo giri-giriwal.»

30 Onsay Filiipu dogi. Bay o badike on mo Ecopii, o nani on no janga deftere annabi Isaaya nden. O landii mo, o wi'i: «Hara hisa faamude koo ko wondaa jangude?»

31 On gorko jaabii, wi'i: «Ko honno mi faamirta si goddo sifanaaki lan?» Onsay o noddi Filiipu yo o yawu, o joodoo takko makko.

32 Tawi ko oo aaya doo o wonnoodaa jangude:
«Himo d'owiraa wa baalii hirsoyteengii,
hara o udditaali hunduko,
wa baalun mbobidankun tayoowo kun
leefbi.

33 E nder ko o hayfinaa kon, be fanni mo goonga.
Hara non ko hombo fillitotoo fii jamaanu
makko ngun?
Ko fii ngurndan makko san tayaama ka
hoore leydi.»¹¹

34 Bay kanko nuunaado on o gaynii jangude dun,
onsay o wi'i Filiipu: «Mi torike ma, andinan ko
hombo oo annabaajo wowli fii mun, si ko kanko
tigi maa si ko goddo goo?» **35** Onsay Filiipu yetti
haala kan, o fuddorani mo on aaya mo o jangi,
o fejjinani mo Kibaaru Moyyo Iisaa on.

36-37 E nder yaadu mabbe ndun, be yi'oyi ka
ndiyan woni. Onsay nuunaado on wi'i: «E

Deftere Kuude Sahaabaabe Ben 8:38xxi Deftere Kuude Sahaabaabe Ben 9:4

hino ndiyan, ko hondun hadatammi *looteede maande kisiyee?»p

³⁸ Onsay on nuunaado yamiri yo giri-giriwal ngal darne, o ukkodi e Filiipu ka ndiyan, on looti mo d'on maande kisiyee. ³⁹ Bay be yawii ka ndiyan, Ruuhu Joomiraado on jillii Filiipu, nuunaado on yiitaali mo hande kadi. O jokkiti laawol makko e hoore himo weltii. ⁴⁰ Filiipu kapun taw tun no Asduuda. Gila d'on o waajii fii Kibaaru Moyyo on e ca'e de o rewi e mun d'en fow haa o hewti Seezariya.

9

*Fii no Saawulu Gomdiniri
(Sah. 22.6-16, 26.12-18)*

¹ Kono tawi Saawulu kapun no wadi ka wonkii mun kambirangol taalibaabe Joomi on mayde. Kanko Saawulu o yahi ka *yottinoowo mawdo sadaka on, ² o wi'i on yo o windu bataake haa e dee juulirde Yahuudiyankheebe wonde Damaasi, fii no o andira si tawii no woodi ton worbe maa rewbe jokkube laawol Iisaa ngol, o yaha o habboya be, o adda Yerusalem.

³ Bawto d'un, bay o yahii haa o badike Damaasi, tun nde wootere ndaygu iwri ka kammu ari, hundi mo. ⁴ O yani kisan ka leydi, o nani hawa no wi'a mo: «Saawulu, Saawulu, ko fii hondun wondaa mi cukkanade?»

p 8:36-37 8.37 Bindi goo no beyditi d'un ka lannoode aaya on:
*Onsay Filiipu wi'i mo: «Si tawii hid'a gomdini ittiri bernde maa nden fow, haray no gasa.» Onsay nuunaado on wi'i: «Mido gomdini wonde Iisaa Almasiihu on ko *Bidsa Alla.»*

⁵ On jaabii, o wi'i: «Ko an hombo nii, yaa an Joomi an?»

Onsay kanko Joomi on o jaabii mo, o wi'i: «Ko min woni Iisaa on mo wondaa cukkaade. ⁶ Immo naataa e ndee saare doo, ben yeetoto ma ko haanudaa wadude.»

⁷ Tawi ben be o yaadaynoo no darii mbobidi hakkee kulol. Hibe nanaynoo kadi kan hawa, kono be alaa yi'ude hay gooto. ⁸ Onsay Saawulu immii ka leydi. Fii kala gite makko d'en no ud-ditinoo, kono tawi o alaano yi'ude hay huunde. Be dowiri mo juude makko d'en haa Damaasi. ⁹ O woniri non balde tati o yi'aali, e hoore d'un o jaamaa, o yaraa.

¹⁰ Kono tawi taalibaajo no Damaasi d'on wi'eteedo Hanaaniyya. Joomi on fejnjinani mo, wi'i: «Hanaaniyya!»

O jaabii: «Naamu, yaa an Joomi!»
¹¹ Kanko Joomi on o wi'i mo: «Immo yahaa e ngal d'atal wi'eteengal Feewungal, landodfaa fii oo wi'eteedo Saawulu mo Tarsiisu wondo ka galle Yahuuda, himo toraade don. ¹² E nder ko o torotoo kon, o fejnjinanaa, o yi'i goddo no wi'ee Hanaaniyya, on no naata *fawa juude mun d'en e hoore makko fii yo o wuntu.»

¹³ Hanaaniyya jaabii, wi'i: «Joomi an, mi nanirii buy no wi'a wonde on neddo wadii boneeji d'uudufi e hoore laabube maa ben Yerusalaam. ¹⁴ Awa doo kadi hooreebe yotti-noobe sadaka ben no newnani mo habbugol kala jantotoodo innde maa nden.»

¹⁵ Kono Joomi on wi'i mo: «Yahu, ko fii on neddo ko aala mo mi subii fii ko lollina innde

an nden yeeso be wonaa Yahuudiyanke ben e lambe ben e yeoso *Banii-Isra'iila'en. ¹⁶ Awa kadi mi hollay mo ko ittiri haa honto o tampirta innde an nden.»

¹⁷ Onsay Hanaaniya yahi. Bay o hewtii e ndun suudu ka on woni d'on, o fawi juude makko d'en e hoore Saawulu, o wi'i: «Ko an yo Saawulu musidfo an, ko Joomi Iisaa, on feepando ma ka laawol fewndo arataa, woni ko imminimmi fii yo a wuntu, awa kadi fii yo a heewu *Ruuhu Seniido on.» ¹⁸ Don kisan ko wa'itata wa kobolle iwi ka gite makko, saami, o wunti, o immii, o *lootaa maande kisiyee. ¹⁹ Bawto d'un bay o jaamii, o hetti doole makko den.

Fii no Saawulu Seeditorani Iisaa Almasiihu on

O wontidi e taalibaabe wonnoobe Damaasi d'on ben e nder balde. ²⁰ O fuddii kisan waajaade fii Iisaa ka juulirde, o wi'a jakko ko oo nun woni *Bidfo Alla on. ²¹ Nanunoobe d'un ben fow naldii fota, be wi'i: «Hinaa oo giddanaynood mulugol ben jantotoobe ndee innde Yerusalem? Hinaa ko addunoo mo kadi ko fii nangugol ben wonnoobe jantaade nde, naba be yeoso hooreebe yottinoobe sadaka ben?»

²² Tawi kanko Saawulu himo burtude tun beydaade, himo naldiniraynood Yahuudiykeebe wonnoobe Damaasi ben e dow banginirangol be pellital wonde ko Iisaa woni *Almasiihu on. ²³ Bay wontii d'on haa neebii, Yahuudiykeebe ben diisondiri fii warugol mo. ²⁴ Kono Saawulu humpitii fii kan janfa maabbe. Tawi ben no aynunoo dame d'en jemma e palorma fii no be warira mo. ²⁵ Onsay

taalibaabe ben yettiri mo jemma, tumbi e nder debeere, be yawtini mo maadi ndin.

²⁶ Bay kanko Saawulu o hewtii Yerusalem, o dabb'i no o wontidira e taalibaabe ben, kono tawi fow no hulunoo mo, awa kadi hari be hoolaaki o wontii taalibaajo. ²⁷ Onsay Barnabaasi yetti mo, nabi takko *sahaabaabe ben. O sifanii be ko honno kanko Saawulu o yiidiri e Joomi on fewndo o yahata Damaasi e ko hondun Joomi on yewti mo e ko pellital hongal o waajori Damaasi e innde Iisaa. ²⁸ Gila d'un, tawi o hayloday e mabbe Yerusalem, o yewtira kadi pellital e innde Joomi on. ²⁹ Tawi himo yewtidaynood kadi, yeddondira e Yahuudiyankeeb'e wowloobe haala Gereeki ben, kono tawi ben kadi no dabbude no warira mo. ³⁰ Bay kambe sibbe wonbe e laawol gootol ben be humpitike d'un, be nawri mo Seezariiya, be itti mo don kadi, be nabi mo Tarsiisu.

³¹ Tawi buttu no wonani *moftal ngal e nder dee leyde doo fow, d'un ko dee diiwe Yahuuda e Jaliilu e Samariiya. Tawi hibe mawnude e nder gomfinal ngal, awa kadi hibe wuuri e nder yankinaare Joomiraado on, hibe beydorde kadi ballal Ruuhu Seniido on.

Fii no Iiniiya Ndikkiri e fii Wurniteede Taabiita

³² E nder ko Petruusu jindata e nokkeeli din fow kon, o yahi ka bee gomfinbe hodfube Lidaa.

³³ O tawi don godso, maaya-banduujo, no waalii e danki gila duubi jeetati, on no wi'ee Iiniiya.

³⁴ Kanko Petruusu o wi'i mo: «Iiniiya, Iisaa Almasiihu on sellinii ma! Immo an tigi, weyyitaa danki maa kin!» O immii kisan. ³⁵ Bay hodube

Lidaa ben e bee ka hollaande Saruuna fow yi'ii d'un, be gomdfini Joomi on.

³⁶ Tawi kadi debbo okkaynoodo fota, wada kuude moyye, no hodunoo Jaffaa, on no wi'ee Taabiita. (Ko woni firo d'un e haala Gereeki ko Dorkaas.) ³⁷ On debbo nawni e den balde d'on, o maayi. Bay be gaynii fewnude mo, be nabi mo, be wallinoyi e nder suudu goo ka koore dow. ³⁸ Nde tawnoo Lidaa e Jaffaa woddondiraa, awa kadi hari taalibaabe ben andii wonde Petruusu no Lidaa d'on, be immini yimbe dido ko yahana mo, wi'a: «Yandi men torike ma arugol tinna, hara a neebaali.»

³⁹ Onsay Petruusu immii, yaadi e mabbe. Bay o hewtii, be yawni mo ka koore e ndun suudu. Rewbe keynguuube ben fow badii mo no wulla, e hoore hibe holla mo dolokkaaji e burmusuuji di kanko Dorkaas o moyyinaynoo wa fewndo ko o wondi e mabbe.

⁴⁰ Onsay kanko Petruusu o yaltini be fow ka yaasi, o jicci, o torii. Bawto d'un o fewtiti furee on, o wi'i: «Taabiita, immo!» Onsay kanko Taabiita o udditi gite den, o yi'i Petruusu, o immii, o joofii. ⁴¹ Kanko Petruusu o nangi mo jungo ngon, o immini, o noddi gomdinbe ben e keynguuube ben, o wattii mo e juude mabbe e hoore ko o wurdo. ⁴² Dun andii e nder Jaffaa fow, buy gomdfini Joomi on. ⁴³ Kanko Petruusu o weeri Jaffaa don seeda ka garankeejo no wi'ee Sim'uunu.

10

Fii no Korneliyyusu Gomdiniri

¹ Tawi godđo no Seezariiya dōn kadi wi'eteedo Korneliyuusu, on ko yeesoojo goo e nder dental suufaaabe wi'eteengal dental be Italii. ² Tawi on ko dewo, kanko e yimbe suudu makko ndun fow hibe hulaynoo Alla, awa kadi himo wallaynoo miskinbe fota, duumoo e toragol Alla. ³ Fewndo ka baawo fanaa, o fejjinanaa, o yi'i ko laabi poy, malaa'ikaajo Alla no naata ka makko. On malaa'ikaajo noddi mo, wi'i: «Korneliyuusu!»

⁴ Kanko Korneliyuusu o punnii mo e hoore himo huli. O wi'i malaa'ikaajo on: «Ko hondun wadi Koohoojo?»

Kapun malaa'ikaajo on wi'i mo: «Torndeeji maa din e dokke de okkordaa miskinbe ben yentinaama fii ko anditee yeeso Alla. ⁵ Jooni immin wobbe ko yaha Jaffaa addanoye godđo no ton no wi'ee Sim'uunu jammaado Petruusu. ⁶ Himo weeri ka garankeejo wi'eteedo kadi Sim'uunu, on no hodi ka daande baharu.»

⁷ Nde on malaa'ikaajo yewtudo mo d'un yahirnoo, kanko Korneliyuusu o noddi kisan kurkaaduube makko d'ido e suufaajo dewo Alla goo tawanoodo e ben be o halfinaa. ⁸ Bay o gaynii be sifanaade d'un fow, o immini be Jaffaa.

Fii ko Petruusu Fejjinanaa kon

⁹ Bimbi nden nande nde tawnoo hibe ka laawol, awa kadi be badike saare nden, Petruusu kadi yawi ka fowtorde hoore suudu tumbere nalorma fii toragol Alla. ¹⁰ O weelaa, o faalaa ko o naama. Wa fewndo ko o defantee, o fejjinanaa godđun, ¹¹ o yi'i kammu ngun no udditii, o haynii huunde nanditaynde e sollewol

fontiingol njanol jogaangol e cobbi din nay no tippoo waaloo ka hoore leydi. ¹² Tawi no e maggol kulle yaarayde koyde nay den fow e kala kulle daasotoode ka hoore leydi e colli wiirooji din fow. ¹³ O nani hawa no wi'a mo: «Petruusu! Immo waraa, jaamaa!»

¹⁴ Kono kanko Petruusu o wi'i: «Oo'o Joomiraadso! Ko fii mi jaamaali haa hande ko tuuni maa ko laabaa!»

¹⁵ Ka dímmun o nani hawa kan no wi'a mo: «Wota a jogor ko Allaahu on laððini kon wa ko tuuni.» ¹⁶ Dun wadiri non haa laabi tati. Bawto dun, nden huunde yentinaa kisan ka kammu.

¹⁷ Wa fewndo ko kanko Petruusu o jibii fii ko o fejjinanaa kon, tawi e hino yimbe ka dambugal, dun ko bee be Korneliyuusu immini, humpitiibe fii nduu suudu Sim'uunu. ¹⁸ Be noddi, be landii si ko doo oo wi'eteedo Sim'uunu jammaado Petruusu weeri.

¹⁹ Fewndo ko Petruusu miijotoo fii ko o fejjinanaa kon, Ruuhu Allaahu on wi'i mo: «E hino yimbe tato ka landotoo fii maa. ²⁰ Immo tippodaa, yaadaa e mabbe, hara a sikkitaaki, ko fii ko min immini be.»

²¹ Onsay kanko Petruusu o tippii, o wi'i be: «E hino lan. Ko min wondon landaade fii mun. Ko fii hondun addi on doo?»

²² Be jaabii mo, be wi'i: «Ko hooreejo dental suufaaabe wi'eteedo Korneliyuusu, aaden feewudo, huloowo Alla, mo jamaa Yahuudiyanke fow joganii kongol moyyol, woni ko malaa'ikaajo laabudo andini wonde yo o adde ka suudu makko fii hedagol kongudi maa din.» ²³ Onsay kanko Petruusu o werni be.

Bimbi nden nande, o immii, o yaadi e mabbe. Sibbe goo be Jaffaa dowti mo. ²⁴ Bimbiti nden nande o hewtoyi Seezariiya, tawi kanko Korneliyuusu himo habbii be, tawi himo nodditi sibbe makko ben e yibbe makko hibbube ben ka makko. ²⁵ Bay kanko Petruusu o hewtii, Korneliyuusu yahi jabbagol mo, yani ka ley koyde makko, o sujjani mo. ²⁶ Kono kanko Petruusu o banti mo, o wi'i: «Immo, min kadi ko mi neddo!»

²⁷ E nder ko o yewtidata e makko kon, bay be naatii, be tawi yimbe buy no moobii ton. ²⁸ Onsay kanko Petruusu o wi'i be: «Hidon andi Yahuudiyankeejoo no tojanaa ka takkondira e mo wonaa Yahuudiyanke maa ka on naata ka makko. Kono min, Alla holpii lan, haanaa ka goddo wi'a hay gooto no tuuni maa laabaa. ²⁹ Ko dun wadi, bay on imminii ko yahanammi, mi arii e hoore mi sattinaali. Jooni non mi landike on, ko fii hondun addirdon mi?»

³⁰ Korneliyuusu wi'i mo: «Hari mido toroo Alla ka suudu an ka baawo fanaa, mi yi'i gorko borniido conci jalbudi no darii yeeso an, gila dun wadii nii baldse nay. ³¹ On wi'immi: ‹Korneliyuusu, torndeeji maa din jabaama, Alla kadi maanditike dokke de okkordaa miskinbe ben. ³² Jooni immin ko yaha Jaffaa, addane oo wi'eteedo Sim'uunu jammaado Petruusu. On no weeri e suudu garankeejo no wi'ee kadi Sim'uunu ka daande baharu.› ³³ Don kisan mi immini ko yahane, an kadi a moyyinii ko ardaa kon. Jooni non, men fow meden doo yeeso Alla fii hedagol ko Joomiraado on yamir-maa kon

fow.»

³⁴ Onsay Petruusu yetti haala kan, wi'i: «Ka haqiiqa mi faamii d'un, fow no fota yeeso Alla.

³⁵ È nder ley yi d'in fow, kala huludo mo, jokki peewal, o jabanay ontigi. ³⁶ O tippinanii *Banii-Isra'iila'en daaluyee on, fii ko fejjinana be Kibaaru Mooyo wondudo e buttu on, rewrude e Iisaa Almasiihu on, on Joomi yimbe ben fow.

³⁷ Onon tigi hidon andi ko feyyunoo kon Jaliilu, haa hewtoyi diwal Yahuuda ngal fow, bawto *lootagol maande tuubuubuyee ko Yaaya waajinoor fii mun kon. ³⁸ E ko honno Allaahu on yediri Iisaa, oo jeyaado Naasirata, *Ruuhu Seniido on wondude e bawgal, d'un ko on yahaynoodo hen fow, wada moyyere, sellina be jinna nangunoo fow, sabu tawde Alla no wondunoo e makko.

³⁹ «Ko men seedee kadi ko o wadi kon fow e nder ndii leydi Yahuudiyankeebé haa nañbani Yerusalaam. Be wariri mo fempugol mo e leggal, wenga. ⁴⁰ Allaahu on immintini mo ka nalaande tammere, o newnani mo kadi hollitagol, ⁴¹ hinaa non e yimbe ben fow, kono e seedeebé be Allaahu on subinoo aranun ben, d'un ko menen bee jaamidube e makko, yaridi bawto immintineede makko e hakkunde maybe ben. ⁴² Kanko Iisaa o yamiri men waajagol jamaa on, fellintinana be wonde Allaahu on toddike mo kanko tigi naawoowo wurbe e maybe. ⁴³ Awa kadi annabaabe ben fow seeditaninooke mo wonde kala gomdfindo mo hebay yaafuyee junuubaaji e innde makko.»

⁴⁴ Nde tawnoo Petruusu no waajaade fii d'un, Ruuhu Seniido on tippii e ben wonnoobe

hedaade ngol kongol don fow. ⁴⁵ Gomdinnoobe sunninaa ben fow, d'un ko bee be Petruusu ardi, nald'i fii ko be wonaa Yahuudiyanke ben okkaa kon Ruuhu Seniido on. ⁴⁶ Ko fii hari hibe nanaynoo hibe wowla e *haalaaji janani, manta Alla.

Onsay Petruusu yetti haala kan, wi'i: ⁴⁷ «E hara en salanto bee hebube Ruuhu Seniido on ndiyan ko be lootora maande kisiyee wano hebirden non enen kadi?» ⁴⁸ Onsay o yamiri yo be loote maande kisiyee e innde Iisaa Almasiihu on. Kambe kadi be torii mo wondugol e maßbe e nder balde.

11

Fii no Petruusu Siforani Gomdinbe ben Yerusalem

¹ Sahaabaabe* wonbe ka diiwal Yahuuda ben e be be wondi e laawol gootol ben, nani wonde be wonaa Yahuudiyanke ben jabii daaluyee Alla on. ² Bay kanko Petruusu o yahii Yerusalem, gomdinbe sunninaa ben banniti mo, feli, be wi'i: ³ «A naatii ka be *sunninaaka ben, awa kadi a naamidii e maßbe!»

⁴ Onsay Petruusu nangi be sifanagol fii dun, ⁵ o wi'i: «Fewndo ko mi woni ka saare Jaffaa, hari mido toroo Alla, mi fenjinanaa godfun. E nder d'un, mi yi'i huunde nanditaynde e sollewol fontiingol njanol jogaangol e coðbi din nay no tippoo tawammi. ⁶ Bay mi ndaarii d'un, mi tenyinii, mi yi'i ton kulle yaarayde koyde nay den ka hoore leydi e kulle buruure den e kulle daasotoode den e colli wiirrooji din. ⁷ Mi nani

hawa no wi'ammi: «Petruusu, immo waraa, naamaa!»⁸ Kono mi wi'i: «Oo'o Joomiraado! Ko fii haa hande ko tuuni maa ko laabaa naataali ka hunduko an!»⁹ Ka dímmun hawa kan fillitii ka kammu, wi'immi: «Wota a jogor ko Allaahu on labbini kon wa ko tuuni.»¹⁰ Dun warri non haa laabi tati, onsay fow yentinaa ka kammu.

¹¹ «Tun mi yi'i yimbe tato imminaabe e an iwrube Seezariiya no ara ka suudu ka men woni d'on. ¹² Ruuhu Allaahu on yamirimmi yaadugole maßbe, hara mi sikkitaaki. Ko bee musibbe d'oo njeegoo d'owtimmi haa men naatoyi ka galle Korneliyuusu. ¹³ On sifanii men ko honno o yiiri malaa'ikaajo on no darii ka suudu makko, e ko o wi'i mo: «Immin ko yahana oo wi'eteedo Sim'uunu jammaado Petruusu wondo on Jaffaa. ¹⁴ On yeetoto ma kongudi d'i dadirtaa din, an e beynguure maa nden fow.»

¹⁵ «Bay min kadi mi nanganii yewtugol, *Ruuhu Seniido on tippii e wonbe d'on ben wano o tippornoo non e men ka fuddsoode. ¹⁶ Onsay mi anditi ngol daalol ngol Joomi on wi'unoo wonde: «Yaayaa kapun ko ndiy'an lootiraynood, kono onon ko Ruuhu Seniido on lootirtedfon.» ¹⁷ Bay Allaahu on yedii be kambe kadi ko o yedunoo en kon, enen bee gomdinbe Iisaa Almasiihu Joomi on, hari ko mi hombo haa ka mi dartoo Alla?»

¹⁸ Bay gomdinbe sunninaa ben nanii dun, be fanki, be mantii Alla, e hoore hibe wi'a: «Allaahu on yedii be wonaa Yahuudiyanke ben tuubuubuyee fii no be hebira ngurndan!»

Fii no Moftal ngal Sinciraa ka saare Antiyoosi-Sirii

Deftere Kuude Sahaabaabe Ben 11:19xliiDeftere Kuude Sahaabaabe Ben 11:29

19 Saakitinoobe ben sabu bittineede bawto waregol Astefaana, be yahi haa Fenisii e ka suriire Siipuru e haa Antiyooosi-Sirii. Tawi be alaa banginande hay gooto daaluyee on si wonaa Yahuudiyankeebe ben. **20** Hebii ton e hakkunde ben saakitinoobe, be Siipuru e be Sirenii, arbe Antiyooosi-Sirii, yewti bee *Gereekiyankeebi, fenjinani be fii Kibaaru Mooyo Iisaa Joomi on. **21** Tawi jungo Joomiraado on no e hoore mabbe, yimbe buy gomdini, jaabi Joomi on.

22 Nde *moftal ngal Yerusalem humpitinoofun, ben kadi immini Barnabaasi ko yaha Antiyooosi-Sirii. **23** Bay o hewtii, o yi'ii moyyere Alla nden, o weltii, o wakkilini be fow catorgol e Joomi on bernde tabitunde, **24** ko fii hari on ko aaden moyyo heewudo gomdfinal e Ruuhu Seniido on. Konu yimbe d'uudfungu jokki Joomi on.

25 Onsay Barnabaasi yaari Tarsiisu fii yahangol Saawulu. **26** Bay o tawii mo, o ardi e makko Antiyooosi-Sirii. E nder hitaande fow hibe tawdeede e tumbondire moftal ngal, e hoore fun hibe jannude jamaa yimbe d'uudube. (Ko Antiyooosi-Sirii don taalibaabe ben attaa noddeede *Almasiyyaabe.)

27 E nder den balde don, haaloofe ko Alla longini fun iwi Yerusalem, ari Antiyooosi-Sirii. **28** Goddo e ben no wi'ee Agabuusi, on immii *hiitii tippude e Ruuhu Allaahu on, o wi'i wonde heege moolanaange waday e aduna on fow. (Dun wadi-le e fewndo laamu Kuloodiyuusu.) **29** Taalibaabe ben anniyii wonde mo bee e maßbe wallitoto musibbe mabbe wonbe ben ka diiwal

Yahuuda embere taaqa mabbe on. ³⁰ Be wadi dfun, be watti e juude Barnabaasi e Saawulu yo ben nabu, jonna ardotoobe moftal ngal ben.

12

Fii no Yaaquuba Wariraa e no Petruusu Sokiraa

¹ Ko e fewndo on saa'i, oo lando wi'eteedo *Heroodu nangi wobbe e *moftal ngal fii lettugol be. ² O wariri Yaaquuba kaafa, d'un ko oo kotiraawo Yuuhanna. ³ Nde o ndaarunoo o tawi dun no wela Yahuudiyankeeben, o nangi Petruusu kadi. Dun hawrondiri e *Juldeere Bireedi de Aldaa e Lewen nden. ⁴ Bay o nangii mo, o ferii mo ka kaso, o itti mojobe nay ko ayna mo, mojobere kala suufaabe nayo. Hari e mijo makko ko si *Juldeere Yawtaneede nden feyyii o jaawa mo yeeso jamaa on. ⁵ Ko kanko Petruusu o woni ka kaso, moftal ngal duumii e toranagol mo Alla.

⁶ Weetaynoo Heroodu jaawa mo, e on jemma mun, tawi kanko Petruusu himo jolkaa jolokooje didi, daanii hakkunde suufaabe dido, tawi aynoobe kaso ngon no dartori ka dambugal. ⁷ Onsay malaa'ikaajo Joomiraado on feenani mo, ka o wonnoo d'on ndaygi. O findiniri mo kanko Petruusu mbabbugol mo ka becce, o wi'i mo, «Immo tinna!» Jolokooje wonnoodfe ka juude makko den yani.

⁸ Malaa'ikaajo on wi'i mo kadi: «Habbu duhol maa ngol, wattodaa paade maa d'en.» O wadi dfun. Malaa'ikaajo on wi'i mo: «Waano burmusu maa on, jokkaa mi.» ⁹ Petruusu yalti, jokki

mo, tawi o andaa si ballal malaa'ikaajo on ko goonga, tawi himo sikka ko fejninannde tun o hebi. ¹⁰ Bay be feyyii ayninaabe yeeso ben e hikkube don ben, haa be hewtii ka baafal njandi feyyeteengal si yahee ka saare, onsay ngal udditanii hoore maggal yeeso mabbe, be yalti, be yaadi haa e laawol. Tun malaa'ikaajo on seedi e makko.

¹¹ Kanko Petruusu o hetti non hakkil, o wi'i: «Jooni non, ka haqiiqa, mi andii wonde Joomiraado on imminii malaa'ikaajo mun on, o sortii lan e juude Heroodu e kala ko jamaa Yahuudiyankeeben tijjinoo e hoore an.»

¹² Bay o faamii ko wadi kon, o yahi ka galle Mariyama yumma Yuuhanna jammaado Markusa, ka wobbe moobinoo no toroo. ¹³ Bay o hoddfike baafal ngal ka naatirgal, jiwo kurkaadu-jo no wi'ee Rodaasi badoyii fii andugol ko hombo. ¹⁴ Bay o anditii hawa Petruusu kan, hakkee ko o weltii, doo yo o udditu baafal ngal, o yahi taho, o andinoyi beya wonde Petruusu no ka naatirgal.

¹⁵ Ben wi'i mo: «A feetii!» Kono o wi'i ko goonga. Ben wi'i: «Awa ko malaa'ikaajo makko on!»

¹⁶ Kono tawi Petruusu no jokki tun hoddfagol. Bay be udditoyii, be yi'ii mo, be yaldsi fota. ¹⁷ O fankiniri be yeangol be juude makko den, o sifanii be ko honno Joomiraado on yaltiniri mo ka kas. O yamiri be, o wi'i: «Andinee dun Yaaquuba e musidal ngal.» Onsay o yalti don, o yaari nokku goo.

¹⁸ Bay weetii, jiiboldu tiifundu wadi e hakkunde suufaafe ben, be woni e landondirgol ko honto Petruusu woni. ¹⁹ Heroodu kadi dabbitti mo, kono o yi'aali mo. O landii suufaafe ben, o yamiri yo be ware. Onsay kanko Heroodu o iwi ka diiwal Yahuuda don, o yaari Seezariiya fii wonugol ton.

Fii no Heroodu Maayiri

²⁰ Tawi kanko Heroodu himo habidi e Tiiriyankoobe ben e Siduunayankoobe ben. Be ari be tawi mo e nder nanondiral mabbe. Bay be hettii Balastuusa oo dankotoodo kaybonru lando on, be torii buttu, sabu tawde ko leydi on lando tambitinoo leydi mabbe ndin. ²¹ Bay jalaande nde be haldunoo nden hewtii, kanko Heroodu o bornii conci makko laamu din, o joodii ka jullere makko laamu, o yewti be kambe jamaa on. ²² Jamaa on nangi ewnagol wi'a: «Kaa hawa ko hito allaajo nii, hinaa hawa neddo!» ²³ Don kisan malaa'ikaajo Joomiraado on libi nawnaare e makko, sabu tawde o jonnitaali Alla mangural ngal, o yilmi, o maayi.

²⁴ Kono daaluyee Alla on burti yaajude.

²⁵ Bay Barnabaasi e Saawulu gaynii golle mun den Yerusalaam, be yiltitii Antiyoosi-Sirii, be nabori Yuuhanna oo jammaado Markuusa.

13

Fii no Ruuhu Seniido on Subori Barnabaasi e Saawulu

¹ Tawi haaloobe ko Alla longini fun e jannoobe no e nder *moftal wongal ngal Antiyoosi-Sirii,

ben-le ko Barnabaasi e Sim'uunu jammaado Baleejo, e Lukiyuusi, oo mo Sirenii, e Saawulu e Manayiina, dun ko oo ne'idaado e *Heroodu lando diwal ngal. ² E nder ko be rewaynoo Joomiraado on kon, be hoora, *Ruuhu Seniido on wi'i be: «Wad'anee lan Barnabaasi e Saawulu feere fii golle de mi noddiri be den.» ³ Bay be gaynii hoorude toroo, be *fawi juude mabbe den e hoore Barnabaasi e Saawulu, be nuli be.

Fii no Barnabaasi e Saawulu Yaari ka Suriire Siipuru

⁴ Ben be Ruuhu Seniido on immini, dun ko Barnabaasi e Saawulu, be yahi Seluusi, be bakii don e laana ndiyan fii yahugol Siipuru. ⁵ Bay be hewtii Saalamini, be feppini daaluyee Alla on ka juulirde Yahuudiyankneebe ben. Tawi hibe wondi e oo wi'eteedo Yuuhanna jammaado Markuusa fii ko wallitoo be.

⁶ Bawto dun, bay be tayitoyii ndee surire fow haa be hewtoyii Paafuusa, be tawi don mbileejo goo, tawi on ko Yahuudiyankneejo waditiido annabaajo, tawi on no wi'ee Bar-Jisaa.

⁷ Tawi himo wondi e on addaado lamminaag gal diwal, dun ko oo wi'eteedo Sargisu Puulusa, tawi on lando ko jooma-hakkiljo. On lando noddi Barnabaasi e Saawulu bay himo faalanoo nanude daaluyee Alla on. ⁸ Kono oo wi'eteedo Elimäasi, dun ko mbileejo on, (ko fii ko non innde makko nden firiraa), o dartii be, tawi himo dabbude fii no o bonnira gomdfinal lando on. ⁹ Onsay Saawulu, himo wi'ee kadi Puulusa, heewudo Ruuhu Seniido on, tenyini on mbileejo, o wi'i: ¹⁰ «Ko an yo heewudo kala noone yoyer

e bonki, biddo Ibuliisa, gano kala peewal, a accataa bonnugol laawi feewudi Joomiraado on? **11** Jooni non hedo! Joomiraado on fawete jungo, wumaa, wona e saa'i mo a yi'ataa naange ngen.» Don kisan nibbitani mo, niwre tiifunde yani e makko, o woni e memugol, tawi himo dabbfa wobbe ko dowa mo. **12** Bay on lando yi'ii kon ko wadi, o ḥaldī fii jannde Joomi on, o gomdini.

Fii no Puulusa e Barnabaasi Waajori ka Saare Antiyoosi-Pisidii

13 Bay kanko Puulusa e wondibbe makko ben be iwii Paafuusa, be bakii don e laana ndiyan fii yahugol Pergii, d'un ko e nder ndii leydi wi'eteendi Pamfilii. Bay be hewtii don, Yuuhanna jammaado Markuusa on seedi don e mabbe, o yiltitii Yerusalaam. **14** Bay be iwii Pergii, be jokkitii laawol mabbe haa be hewti ka saare Antiyoosi-Pisidii. Be naati don e nder juulirde, be joodii, d'un hawri e *nalaande fowteteende, d'un ko e *aseweere nden. **15** Bay fii Sariya on e fii annabaabe ben gaynaama jangeede, yeesoobe juulirde nden immini wobbe e mabbe ko wi'a be: «Musibbe, si tawii hidon mari kongudi wakkilinaydi jamaa on, haray yewtee.»

16 Onsay kanko Puulusa o immii, o townani be jungo, o wi'i: «Ko onon yo *Banii-Isra'iila'en e onon bee hulooibe Alla, heditee! **17** Alla oo jamaa Isra'iilayankeebe subike baabiraabe men ben, on Yanjudo kadi oo jamaa fewndo ko be woni tuqarankeebe e nder ndii leydi *Misira, o yaltiniri be ton kadi sookewo makko dolnungo

ngon. ¹⁸ O mujjanii be kadi wa telen duubi cappande nay ka wulaa. ¹⁹ Onsay bay o mulii ley yi jeedidi e nder ndii leydi *Kanaana, o yedi baabiraabe men ben laral leydi ben ndin. ²⁰ Dun fow wadi e nder duubi teemedde nay e cappande jowi.

«Bawto d'un o addani be hooreebe, haa e fewndo annabi Samu'iila. ²¹ Bawto d'un be torii hebugol lando. Onsay Alla addani be Saawulu bidso Kiisi on, jeyaado e oo bolondaa *Buniyamiinu, ko laamoo be e nder duubi cap-pande nay. ²² Bay o follii ondon, o lamminani be Daawuuda, d'un ko on mo o seeditornoo d'undoo, o daali: ‹Mi taw Daawuuda mo Yassaa'u ko neddo waalaniido lan e bernde, timminoowo faaleeji ar din fow.›q

²³ Kanko Puulusa o wi'i kadi: «Ko tippude e fodoore makko nden kanko Alla wadi si Iisaa jibinaa e nder bolondaa Daawuuda on, fii ko wonana Isra'iila'en dandoowo. ²⁴ Ado o arude, hari Yaayaa waajike jamaa Isra'iilayankeebe ben fow fii *lootagol maande tuubuubuyee. ²⁵ Fewndo kanko Yaayaa o timminaynoo golle makko den, o wi'uno: ‹Hinaa min woni on mo sikkufon, kono on no ara baawo an doo, on mo mi hewtaa hay firtugol boggi padé mun!›

²⁶ Kanko Puulusa o wi'i kadi: «Ko onon yo musibbe an, bibbe bolondaa Ibraahiima, e hulooibe Alla wonbe hakkunde mon, ko haa e men enen ngol daalol kisiyee addaa. ²⁷ Ko fii yimbe Yerusalaam ben e lambe mun ben andaali ko hombo woni Iisaa, awa kadi be faamaali kongudi

Deftere Kuude Sahaabaabe Ben 13:28xlixDeftere Kuude Sahaabaabe Ben 13:37

annabaabe wonaadji jangeede din asewe kala,
be laatiniri di jaawugol mo. ²⁸ E hoore be
hebaali hujja happando mo wareede, kono be
torii Pilaatu yo o waru mo. ²⁹ Be laatiniri nii
ko windinoo kon fii makko. Onsay be tippini
mo ka *leggal altindiraangal, be wallini mo e
nder qaburu. ³⁰ Kono Allaahu on immintini mo
e hakkunde maybe ben. ³¹ Ben yaadaynoobe e
makko gila Jaliilu haa Yerusalaam, yi'itike mo e
nder balcse buy, ben ko seedeebe makko jooni
yeeso jamaa on.

³²⁻³³ «Menen, meden fejjinande on wonde:
Alla hunnii ko o fodunoo baabiraabe men ñen
kon e faybe mabbe ben, dñun ko enen. O hunniri
dun immintingol Iisaa, tippude e ko windii kon
ka beytol dimmol Zabuura, ka o wi'i don:
<Ko an woni Biddo an on,
hande a wonii mo an.›^r

³⁴ «Kon ko Alla immintini Iisaa e hakkunde
maybe ben, hara o luttaali ka jolu, ko dñun o
daalunoo, o wi'i:

«Mi yeday on barkiji laabudi holniidi
di mi fodunoo Daawuuda dñin.»^s

³⁵ Kanko Puulusa o wi'i: «E hoore dñun, no wi'aa
nokku goo kadi:

«Yaa an Alla, a jabataa Seniido maa on laatoo
noldo.»^t

³⁶ Puulusa wi'i fahin: «Kono nde Daawuuda
wadfunoo faaleeji Alla dñin e nder jamaanu
makko ngun, o maayuno, o tawtinaa baabiraabe
makko ben, o poli. ³⁷ Kono on mo Allaahu on
immintini laataaki noldo.

^r 13:32-33 13.33 Zab. 2.7 ^s 13:34 13.34 Isa. 55.3 ^t 13:35

13.35 Zab. 16.10

Deftere Kuude Sahaabaabe Ben 13:38lDeftere Kuude Sahaabaabe Ben 13:46

38 «Ko onon non, yo musibbe amen, andee dey ko sabu makko kanko Iisaa fejjiniranadon yaafuyee junuubaaji din. 39 Kala on hoolido mo jogorte feewudo e hoore kala ko on waawetanooke jogoreede feewudo e nder Sariya Muusaa on. 40 Ko d'un wadi si men wi'ay on, reenee fii wota ko wi'aa kon ka defte annabaabe ben hawru e mon, d'un-le ko dundoo:

41 ›Ndaaree onon bee yawitiibe,
wonee ηaldube, mulon!

Ko fii e fewndo mon,
mi waday kuugal ngal on sikkataano
hay si on sifanaama!› »u

42 Bay Puulusa e Barnabaasi fokkitii yaltude ka juulirde d'on, be saatinaa e aseweere aroore nden, dun ko palaande fowteteende nden, fii yewtugol fii d'un. 43 Bay mottondiral ngal lannii, Yahuudiyankeebé buy e naatube e diina Yahuudiyanke buy jokki Puulusa e Barnabaasi, be yewtidi e mabbe. Onsay Puulusa e Barnabaasi wakkilini be fii tabitugol, habbitoo e moyyere Alla nden.

44 E aseweere hikkunde d'on nden, fayda saare nden fow mottondiri fii hedagol daaluyee Joomiraado on. 45 Bay Yahuudiyankeebé ben yi'ii on jamaa, be nawli, be yeddi ko Puulusa yewtaynoo kon, be hoyni mo.

46 Onsay Puulusa e Barnabaasi yewtiri pellital, wi'i be: «Hari ko e mon taho daaluyee Allaahu on haananoo yottineede. Kono bay on bugitike, awa kadi on wadaali hoore mon handube e *ngurndan poomayankejan dan, men yaaray ka

Deftere Kuude Sahaabaabe Ben 13:47li Deftere Kuude Sahaabaabe Ben 14:3

be wonaa Yahuudiyanke ben. ⁴⁷ Ko fii, ko nii Joomiraado on yamiriri men, o daali:
«Mi subike on fii yo on wonan leyyi din ndaygu,
e nabugol kisiyee on haa ka kattudi leyde.»
»W

⁴⁸ Bay be wonaa Yahuudiyanke ben nanii dun, be weltii, be mantii daaluyee Joomiraado on, tawnoobe no muuyanaa ngurndan poomayankejan dan ben fow gomdini.

⁴⁹ Tawi daaluyee Joomiraado on no layude e nder leydi ndin fow. ⁵⁰ Kono Yahuudiyankkeebe ben yuuni e mabbe rewbe teddinaabe rewoofe Alla, e mokobaabe saare nden, ben wadi jokke e hoore Puulusa e Barnabaasi, be radii be ka diiwal mabbe. ⁵¹ Ko dun wadi si Puulusa e Barnabaasi honki mbullaari padé mun den e Yahuudiyankkeebe wonbe ton ben, be yaari Ikonim. ⁵² Fii kala dun wadii, tawi taalibaabe wonbe Antiyoosi-Pisidii ben kan no heewi weltaare e Ruuhu Seniido on.

14

Fii Yaadu Puulusa e Barnabaasi ndun Ikonim

¹ Bay Puulusa e Barnabaasi hewtii Ikonim, be naatiri ka juulirde Yahuudiyankkeebe ben. Noone no be yewtiri non wadi haa Yahuudiyankkeebe duudube e *Gereekyankeebe gomdini. ² Kono Yahuudiyankkeebe be gomdinaali dun ben yuuni be wonaa Yahuudiyanke ben fii yo ben wadu gomdinbe ben bone. ³ Kono laatii, be woni Ikonim ko neebi, tawi hibe yewtiraynoo pellital fii Joomiraado on, on Seeditantoodo

Deftere Kuude Sahaabaabe Ben 14:4lii Deftere Kuude Sahaabaabe Ben 14:13

daaluyee mun sulfu on, himo newnannoo be wadirgol juude mabbe d'en maandeeji e kaawakeeji moyyi yi'otoodi. ⁴ Onsay yimbe saare nden senditii, wobbe wontidi e Yahuudiyankeeben, wobbe kadi wontidi e *sahaabaabe ben.

⁵⁻⁶ Bay Puulusa e Barnabaasi humpitike wonde Yahuudiyankeeben e be wonaa Yahuudiyankeben wondude e yeesoobe mabbe ben immanike be e feragol be kaaye, be tawi yo be yahu, be fattoyoo e dee ca'e jeyaad e ndii leydi wi'eteendi Likayonii, d'un ko Listaara e Derbata, e ca'e heedude d'on d'en, ⁷ be woni e waajagol ton fii Kibaaru Mooyo on.

Fii no Puulusa Imminiri Maaya-Koydeejo on Listaara

⁸ Tawi maaya-koydeejo no Listaara d'on, hebidaado e boofoyaagal, mo yahaali haa hande, ⁹ tawi on no hedii ko Puulusa yewtaynood kon. Puulusa tenyini mo, ndaari tawi himo mari gomfinal sellinayngal mo. ¹⁰ Onsay kanko Puulusa o ewnii, o wi'i: «Immo darodaa e hoore koyde maa d'en!» Tun o hawtii nde wootere, o nangi jindugol.

¹¹ Bay be yi'ii kon ko Puulusa wadi, jamaa on ewnii e haala Likayonii, be wi'i: «Allaabe be mbaadi nedfanke tippike e men!» ¹² Be inni Barnabaasi Zafsa, Puulusa kapun Hermiisi, bay ko kanko joginoo kongol ngoly. ¹³ Onsay oo wadoowo sadakaaji fii nduu allaaru mabbe

Y **14:12** 14.12 Ndee innde wi'eteende «Zafsa» e haala Gereeki ko innde allaajo mabbe. «Hermiisi» on kadi ko yewtoowo kongudi on allaajo mabbe.

Deftere Kuude Sahaabaabe Ben 14:14lili Deftere Kuude Sahaabaabe Ben 14:21

wi'eteendu Zafsa, wondu ka yeeso saare, addi ga'i e *meetelli telen ka dambude saare, tawi kanko e jamaa on hibe woniri wadangol Puulusa e Barnabaasi sadaka.

¹⁴ Bay sahaabaabe ben nanii d'un, d'un ko Barnabaasi e Puulusa, be seeki dolokkaaji maßbe d'in, be wubbi, be ukkitoyii e hakkunde jamaa on e hoore hibe sonkana yimbe ben, wi'a: ¹⁵ «Ko hondun wadanton d'un? Menen kadi ko men yimbe wano mo'on! Meden waajorde on wa Kibaaru Moyyo fii ittugol on e dii piiji mehi, ruttodon e Alla Wuurudo on, on Tagudo kammu e leydi e baharu e kala ko woni e mun. ¹⁶ E dii jamaanuuji feyyudi, o accuno leyyi d'in fow jokki faaleeji mun, ¹⁷ e hoore o accaali seeditorol moyyere nde o wadata nden, d'un ko yedugol on ndiyan saayoojan iwrude ka kammu e saa'iji moyyooji fii demal, e timminangol on neemaaji e hebbingol berde mon d'en welo-welo.» ¹⁸ Fii kala be yewtirii non, ko karahan be waawiri hadirde ben yimbe wadangol be sadakaaji.

¹⁹ Onsay Yahuudiyankeebi iwri Antiyoosi-Pisidii e Ikonim, be murtini jamaa on, be hawtiti, be fidi Puulusa kaaye haa be sikki o maayii, be daasi mo, be nabi ka baawo saare. ²⁰ Kono taalibaabe ben hundi mo, o immii, o naatiti ka saare. Bimbi nden nande kanko Puulusa e Barnabaasi be yahi Derbata.

Fii Yiltitagol Puulusa e Barnabaasi Antiyoosi-Sirii

²¹ Bay Puulusa e Barnabaasi waajike fii Kibaaru Moyyo on e nden saare haa be hebii taalibaabe duudube, onsay be yiltitii e dee ca'e

doo, d'un ko Listaara e Ikonim e Antiyooosi-Pisidii. ²² Be wallitii taalibaabe ñen fii tiidingol berde mabbe den, be wakkilini be e duumagol e gomdfinal ngal, be wi'i be: «Ko e nder tampereeji buy naateten ka *laamu Alla!» ²³ Be tod'sanii *moftal kala ko wonana d'un ardotoobe. Bay be gaynii hoorude toroo, be halfini be Joomiraado mo be gomdfini on.

²⁴ Bawto d'un, be tayitoyi ngal diiwal Pisidii, be yahi Pamfilii. ²⁵ Bay be waajike fii daaluyee Alla on ka saare Pergii, onsay be yahi Atalii. ²⁶ Be bakii don e laana fii yiltitagol Antiyooosi-Sirii, ka be yettanoo d'on be halfinnaa sulfu Alla on fii dee golle de be ari e laatinde doo. ²⁷ Bay be hewtii, be mottindiri moftal ngal, be fillitanii be ko Alla wadini be kon fow, e ko honno o udditirani be wonaa Yahuudiyanke ben dambugal gomdfinal ngal. ²⁸ Onsay be wontidi e taalibaabe ben d'on ko neebi.

15

Fii Yewtere nden Yerusalem

¹ Onsay wobbe iwri ka diiwal Yahuuda ari e jannugol musibbe ñen, wi'a: «Si on sunninaaka tippude e aada Muusaa on, haray on waawetaake dandeede.» ² Bay yeddondiral njanal e yewtere tiidunde wonii hakkunde mabbe e Puulusa e Barnabaasi fii d'un, onsay musibbe ñen aadii yo Puulusa e Barnabaasi e wobbe goo hakkunde mabbe yaadu Yerusalem, be tawoya *sahaabaabe ñen e ardotoobe *moftal ngal fii nden huunde. ³ Bay moftal ngal wattii be e laawol, be yahi be tayitoyi Fenisii e Samariiya,

Deftere Kuude Sahaabaabe Ben 15:4lv Deftere Kuude Sahaabaabe Ben 15:13

e hoore hibe fillitanoo ben musibbe wonbe e den ca'e, be fensita ko honno be wonaa Yahuudiyanke ben jabiri laawol ngol. Dun wonani musibbe ben fow weltaare njande. ⁴ Bay be hewtii Yerusalaam, moftal ngal e sahaabaabe ben e ardotoobe moftal ngal tolni be, kambe kadi be fillitanii ben ko Allaahu on wadini be kon fow.

⁵ Onsay wobbe e fedde *Fariisiyaabe gomdinbe ben hawtii, wi'i: «No haani ka be wonaa Yahuudiyanke ben sunninee, be yamiree doftagol Sariya Muusaa on.»

⁶ Onsay sahaabaabe ben e ardotoobe moftal ngal yiitidi fii ndaarangol ndun muraadu. ⁷ Bay yeddondiral ngal tiidii hakkunde maabbe, onsay Petruusu hawtii, wi'i be: «Musibbe, hidon andi wonde, gila ka nalaade arane, Allaahu on subino lan e hakkunde mon fii no be wonaa Yahuudiyanke ben nanira daaluyee Kibaaru Moyyo on, be gomdina. ⁸ Alla, on Andudo ko woni e berde, o seeditoranike be yedugol be *Ruuhu Seniido on wano men non. ⁹ O wadaali hay fus ko serti hakkunde men e maabbe, ko fii ko gomfinal maabbe ngal o labbiniri berde maabbe den. ¹⁰ Jooni non, ko hondun ndarndoranton Alla rondugol taalibaabe ben dongal ngal enen tigi e baabiraabe men ben en waawaali townude? ¹¹ Kono ko moyyere Iisaa Joomi on tanyinorden dandeede, kambe kadi-le wano non.»

¹² Onsay mbatu ngun fow deyyiti, be hedii Barnabaasi e Puulusa, ben fillitanii be kala maandeeji e kaawakeeji moyyi di Allaahu on wadini be e hakkunde be wonaa Yahuudiyanke ben. ¹³ Bay be gaynii yewtude, Yaaquuba kadi

Deftere Kuude Sahaabaabe Ben 15:14vi Deftere Kuude Sahaabaabe Ben 15:22

yetti haala kan, wi'i: «Hedee lan yo musibbe an! ¹⁴ En nanii ko Sim'uunu Petruusu fillitanii en kon, ko honno Allaahu on haajiraa e be wonaa Yahuudiyanke ben gila ka fuddoode, o yetti jamaa e hakkunde mabbe ko wona e innde makko. ¹⁵ Kongudi annabaabe ben no fotti e dun-le, ko fii no windii:

¹⁶ «Bawto d'un mi artoyay,
mi banta suudu laamu Daawuuda ya-nunoondun,

mi banta kadi ko yirbi kon, mi fewna,
¹⁷ fii no yimbe heddiibe ben dabbira Joomiraado on,

e kala leyyi di innde an nden jantaa e mun.

¹⁸ Ko Joomiraado on daali d'un,
on Wadunoodo d'ii piiji andanoodi gila ko booyi.» »y

¹⁹ Yaaquuba wi'i kadi: «Ko d'un wadi si mi miijii wonde moyyaa ka sincanen ben be wonaa Yahuudiyanke tuubanbe Alla satteende. ²⁰ Kono windanen be tun, wi'en be yo be tertuun-intinorgol sanamuji e jinaa e naamugol jiibe e yiiyan. ²¹ Ko fii, gila e diya jamaanuuji feyyudi, Muusaa no mari yimbe e saare kala ko waajoo fii makko, bay hidien jangude fii d'un e aseweere kala ka juulirde.»

*Batakuru Nabanaandu Gomdinbe ben
Antiyoosi-Sirii*

²² Onsay sahaabaabe ben e ardotoobe moftal ngal e moftal ngal fow ndaari tawi no moyyi ka be suba wobbe e hakkunde mabbe, be wattida

Deftere Kuude Sahaabaabe Ben 15:23lviiDeftere Kuufe Sahaabaabe Ben 15:32

be e Puulusa e Barnabaasi fii ko yaha Antyoosi-Sirii. Onsay be subii Yahuuda, jammaado Barsabaa, e Silaasi, tawi ben dido ko be be musibbe ben teddini fota. ²³ Be wattidi be e batakuru ndu tawata ko dundoo windii ton:

«Menen bee musibbe mon, dun ko sahaabaabe ben e ardotoobe moftal ngal, men salminii on onon bee musibbe amen wonbe e hakkunde bee be wonaa Yahuudiyanke, hodube Antyoosi-Sirii e Silisii.

²⁴ «Men nanii wonde wobbe e amen jiibirooyii on kongudi mabbe haa be aaninii wonkiji mon din, ben-le wonaa menen yamiri be dun. ²⁵ Men taw no moyyi, e nder nanondiral amen, ka men suboo wobbe, men immindinana on be e bee yibbe amen, dun ko Barnabaasi e Puulusa, ²⁶ dun ko bee weebitube ngurndan mun dan fii innde Iisaa Almasihu Joomi men on haa takko mayde. ²⁷ Ko men imminiri Yahuuda e Silaasi, ko ko yewta on e hunduko fii ko woni kon ka batakuru. ²⁸ Ko fii menen e Ruuhu Seniido on men taw no moyyi ka men ronka on fawude dongal goo, si hinaa dii haanudi doo: ²⁹ dun non ko yo on tertoo tebbeeli sakkanaadi sanamuji e yiiyan e mummunteeji jiibudi e jinaa. Si on reenike e dun, haray on wadii ko moyyi. Yo jam wonu e mon!»

³⁰ Onsay kambe imminaabe ben be waynii, be yahi Antyoosi-Sirii, be wattoyi batakuru ndun e juude mbatu moobiingu don ngun. ³¹ Bay batakuru ndun jangaama, be weltori kon ko be wakkilinaa. ³² Nde tawnoo Yahuuda e Silaasi ko haaloobe ko Alla longini dun, be beydi wakkilinde musibbe ben, be tiidiniri be kadi

kongudi buy. ³³ Bay be neebidii e mabbe seeda, musibbe ben newnitani be ruttagol ka imminnoobe be ben e dow buttu. ³⁴ Kono Silaasi kajun tawi luttugol mo ton no moyyi. ³⁵ Puulusa kadi e Barnabaasi lutti kodaade Antiyooosi-Sirii don e jannugol fejnindina e yimbe buy fii daaluyee Joomiraado on.

Fii Datal Puulusa Dimmal ngal Aazii

³⁶ Balde seeda bawto cfun, Puulusa wi'i Barnabaasi: «Yiltitoden, ndartoyen musibbe ben e nder ca'e de waajiden fii daaluyee Joomiraado on e mun den fow, fii andugol ko honno be fewndori.» ³⁷ Tawi Barnabaasi no faalaa yo be yaadu e Yuuhanna jammaado Markuusa. ³⁸ Kono Puulusa ndaari tawi haanaa ka be yaada e on yiltinoodo baawo mabbe gila Pamfilii, salii be cowntude ka golleeji mabbe. ³⁹ Hakkee yeddondiral ngal tiidii hakkunde mabbe, be sakkitori seedugol. Onsay Barnabaasi yetti Markuusa, be bakii don e laana ndiyan fii yahugol Siipuru. ⁴⁰ Puulusa kajun subii Silaasi ko o yaada, bawto musibbe ben halfinde mo kanko Puulusa sulfu Joomiraado on. ⁴¹ Onsay be yahi, be tayitoyi Sirii e Silisii, e hoore hibe tiidina motfe den.

16

Fii Ruttagol Puulusa ngol Derbata e Listaara

¹ Kanko Puulusa o hewtoyi kadi Derbata e Listaara, o tawi no don taalibaajo wi'eteedo Timotee. Tawi on yumma mun ko Yahuudiyankoojo gomfindo, kono ben makko ko *Gereekiyankoojo. ² Tawi musibbe be Listaara

Deftere Kuude Sahaabaabe Ben 16:3lix Deftere Kuude Sahaabaabe Ben 16:12

e be Ikoniiim ben no joganii mo kanko Timotee kongol moyyol. ³ Tawi Puulusa no faalaanaborde mo. Onsay o yetti mo, o sunnini sabu Yahuudiyankeebi wonbe e din nokkeeli d'en ben, ko fii hari fow no andi wonde ben makko kanko Timotee ko Gereekiyankeeojo. ⁴ Tawi kanko Puulusa e Timotee, hibe hollitude e nder ca'e de be rewi e mun d'en, pehe de *sahaabaabe ben e ardotoobe *moftal ngal Yerusalem yetti d'en fii yo de huutore. ⁵ Tawi mofte d'en no tiisude tun e nder gomfinal ngal, awa kadi hibe beydaade duudugol nande woo nande.

Fii Ruttagol Puulusa ngol Firgii e Galaasi

⁶ Nde tawnoo *Ruuhu Seniido on newnanaali be fejninoygol daaluyee on e nder *Aazii on, be yahi be tayitoyi Firgii wondude e leydi Galaasi ndin. ⁷ Bay be hewtii takko Misii, be etii fii yahugol Bitinii, kono laatii Ruuhu Issaa on newnanaali be. ⁸ Onsay be tayitiri Misii don, be yahi Turuwaasi. ⁹ E nder jemma on, kanko Puulusa o yi'i e nder koydol, goddo mo Masedonii no darii no jeeja mo, wi'a: «Rewu Masedonii gaa, faabodaa men!» ¹⁰ Bawto ngol koydol Puulusa, men dabbi kisan feere no men hewtira Masedonii, sabu meden felliti ko Alla noddi men ton, fii yo men waajo fii Kibaaru Mooyo on.

Fii no Linda Gomdiniri ka Saare Filipii

¹¹ Bawto d'un, men bakii Turuwaasi don e laana ndiyan, men sutori Samotiraasi. Bimbi nden nande kadi men sutori Neyapolii. ¹² Bay men iwii d'un, men yahi Filipii, d'un ko saare

wonde e diiwal aranal ngal ka leydi Masedonii, jeyaande e ley laamu Roomu, men woni Filipii don e nder balde.

¹³ Nande *nalaande fowteteende nden, d'un ko *aseweere nden, men yahi e binde caangol, d'un ko ka baawo saare, ka men tanyininoor don wonnoo ka juuletee. Bay men joodiske, men yewti rewbe moobinoobe don ben. ¹⁴ Tawi no e ben debbo rewoowo Alla, on no wi'ee Linda, jeyaado e ndee saare wi'eteende Saayatiira, yeeyoowo gaara baka. Tawi himo hedinoor, Joomiraafdo on kadi udditi bernde makko nden fii yo o wonan ko Puulusa yewtaynoo kon. ¹⁵ Bay o *lootidaama e beynguure makko nden maande kisiyee, o saatini men e hoore himo wi'a: «Si tawii hidon jogori lan wa gomfindo Joomi on, haray naatee ka suudu an, weeron ka beynguure an doo.» O jeeji men e d'un haa men jabi.

Fii no Puulusa e Silaasi Jogoraa ka Kaso

¹⁶ Bawto d'un, ko men yahata ka juuletee don, kordso mo jinnawii *hiitinoowii nangi, ari fotti e amen, tawi kon ko o hiitonoo no okkoraynoo jeybe mo ben jawle buy. ¹⁷ O woni e jokkugol men, menen e Puulusa, e hoore himo ewnoo, wi'a: «Bee yimbe ko kurkaadi Alla Jom Bural on, awa hibe fejninandee on laawol kisiyee on!»

¹⁸ O wadi d'un e nder balde buy. Bay Puulusa haabii d'un, o yeeyitii, o wi'i ngin jinnawii: «Mi yamirii ma e innde Iisaa Almasiihu on, yaltu e oo debbo!» Jinnawii ngin yalti e makko e on saa'i tigi.

19 Bay jeybe kurkaadu ndun tawii ka be tanyininoo hebugol don bonii, be nangi Puulusa e Silaasi, be poodi be, be addi yeeso hooreebe ben ka nokkuure fottirde. **20** Onsay be addi be ka jaawoobe ben, be wi'i: «Bee yimbe ko Yahuudiyankeebé, hibe jiibude saare men nden, **21** be janna naamuuji ci en newnanaaka jabugol maa wadugol, enen bee jeyaabe e laamateeri Roomu!»

22 Jamaa on kadi immanii be kambe cfido. Bay jaawoobe ben wadii haa be bortii be dolokkaaji din, be yamiri yo be luubor be bedi. **23** Bay be gaynii be luubaade, be bugii be ka kaso. Be yamiri aynudo kaso on yo o jogo be, o ayna fota. **24** On yamiraado d'un bugii be ka nder kaso ndernderwo, o dumbi be ka koyde.

25 Bay wonii tumbere jemma, Puulusa e Silaasi woni e toragol Alla, beytana mo. Tawi kasooobe ben no hedii be. **26** Tun, nde wootere leydi ndin dimbii ko tiidi, didoodi kaso ngon yergi. E on saa'i tigi baafe kaso ngon fow udditii, jolokooje de kasooobe ben jolkanoo den kadi jolkitii. **27** Aynudo kaso ngon fini. Bay o yi'ii baafe kaso ngon udditike, o sorti kaafa makkó kan fii wartagol, ko fii hari himo sikka kasooobe ben dogii. **28** Kono Puulusa ewnii mo e hawa tiidsuka, wi'i: «Wota a wadito bone woo! Men fow meden doo!»

29 Onsay kanko aynudo kaso ngon o torii ndaygu, o wubbi o naati, o yani yeeso Puulusa e Silaasi e hoore himo diwna. **30** Onsay o yaltini be ka yaasi, o wi'i: «Koohoobe, ko hondun mi wadata fii yo mi dande?»

Deftere Kuude Sahaabaabe Ben 16:31lxiiDeftere Kuude Sahaabaabe Ben 16:40

³¹ Be jaabii mo, be wi'i: «Gomdin Iisaa Joomion, dfun a dandete, an e beynguure maa nden.»

³² Onsay be fenjindinani mo e kala wondo ka suudu makko daaluyee Joomiraado on. ³³ Kanko kadi o yetti be e on saa'i tigi e nder on jemma, o lootani be barmeeji mafbbe din. E on saa'i tigi kanko kadi o *lootaa maande kisiyee, kanko e yimbe suudu makko ndun fow. ³⁴ O werni be ka suudu makko, o bannani be naametee, o weltodi e beynguure makko nden fow fii ko be gomdfini Alla kon.

³⁵ Bay weetii, naawoobe ben immini mbatulaabe mun ben ko yaha wi'a aynudo kaso on: «Accitu ben yimbe.»

³⁶ Onsay aynudo kaso on fillitanii Puulusa kon ko be wi'i, o wi'i mo: «Naawoobe ben imminii wobbe ko wi'ammi yo mi accitu on. Jooni yaltee, yahon e hoore buttu.»

³⁷ Kono Puulusa wi'i ben mbatulaabe: «Bay be foccii men ka tumbere mbatu e baawo jaaawugol men, menen bee jeyaabe e laamateeri Roomu, e hoore dfun be bugike men ka kaso, e hara jooni be yaltinay men ka kene e dow gundoo? Waawaa wonude! Kambe tigi yo be aru, be yaltina men!» ³⁸ Onsay ben mbatulaabe yahi hollitoyi dfun naawoobe ben. Ben huli bay be andii ben ko jeyaabe e laamateeri Roomu. ³⁹ Onsay ben ari, be jeeji be, be acciti be, be torii be kadi yaltugol saare nden. ⁴⁰ Bay be yaltii ka kaso, be naatiri ka oo debbo wi'eteedo Linda, be yiidi e musibbe ben, be wakkilini be. Onsay be yahi.

17

Fii Yaadu Puulusa ndun Tesalonii

¹ Be rewoyi Amfipolii e Apolonii, be hewti Tesalonii ka Yahuudiyankeeben mari juulirde don. ² Puulusa naati don wano woowirani mo non, o wondi e mabbe e nder aseweje tati, himo yewtidude e mabbe fii ko bindi din wi'i kon. ³ O sifii, o weebiti wonde *Almasiihu on no haanunoo tampude e immintineede kadi e hakkunde maybe ben, o wi'i be: «Iisaa oo mo mi woni on wowlande fii mun, ko on woni Almasiihu on.» ⁴ Wobbe e mabbe hoolii d'fun, be tawti Puulusa e Silaasi, e hoore dun *Gereekiyankeeben d'uudube rewoobe Alla, e rewbe buy jeyaabe e burbe teddude ben kadi hoolii.

⁵ Kono Yahuudiyankeeben nawli d'fun, be yetti wobbe e bonbe wonbe ka fottirde ben, be wattidi e mabbe, be wadi haa sonko wadi e nder saare nden e haa yimbe ben dilliri hen fow. Be yahi ka suudu oo wi'eteedo Yaasuunu fii dabbitugol Puulusa e Silaasi be adda be e yeeso jamaa on. ⁶ Laatii be tawaali be ton. Onsay be poodi Yaasuunu e musibbe goo, be addi be yeeso hooreebe saare nden, e hoore hibe sonka, wi'a: «Bee jiibube aduna on fow arii doo kadi, ⁷ Yaasuunu wernii be! Be fow hibe dartaade yamirooje lando mawdo Roomu on, e hoore hibe wi'a lando goo no woodi wi'eteedo Iisaa.» ⁸ Din kongudi jibi jamaa on e jaawoobe ben. ⁹ Laatii be accitude Yaasuunu e beya woo nde be yobunoo alamaani.

Fii Yaadu Puulusa ndun Biriyata

10 E on jemma kisan musibbe ben watti Puulusa e Silaasi e laawol Biriyata. Bay ben hewtoyii, be naatiri ka juulirde Yahuudiyankeeben. **11** Tawi berde ben den no buri be Tesalonii ben udditaade. Be jabiri daaluyee on hepaare tiifunde e hoore hibe taskotonoo nande woo bindi din fii andugol ko be wi'aa kon si ko non woniri. **12** Onsay buy e hakkunde mabbe gomdfini, be gomdfindini e rewbe Gereekiyankeeben teddube e worbe Gereekiyankeeben duudube.

13 Kono nde Yahuudiyankeeben be Tesalonii ben andunoo wonde Puulusa no fejjinde kadi daaluyee Alla on Biriyata, ben kadi ari, be memmini jamaa on, be jiibindiri. **14** Kisan, musibbe gomdfinbe ben wadi feere no Puulusa yaara ka daande baharu, kono Silaasi e Timotee kajun lutti don. **15** Ben wonnoobe dowtude Puulusa, be ardi mo haa Atiina. Onsay ben yiltitii, bay be yamiraama wi'ugol Silaasi e Timotee wonde yo ben tawtoy mo ko yaawi.

Fii Arugol Puulusa ngol Atiina

16 Nde tawnoo Puulusa no habpii beya Atiina, tawi bernde makko nden no aani fota kon ko o yi'aynoo saare nden no jokki sanamuuj. **17** Onsay o yewtidi e Yahuudiyankeeben ben e rewoobe Alla ben ka juulirde e yimbe fottaynoobe ben ka nokkuure fottirde nden, dun non tawi ko nande woo. **18** Faamube goo e nder fedde Epikuriibe ben e fedde Sitoyikiibe ben nangi e yewtidugol e makko. Onsay wobbe e maabbe wi'i: «Ko hondun oo wowloowo faalaa wowlude?»

Tawi wobbe e mabbe no wi'a: «Himo wa'i wa waajotoodo fii allaabé jananbe goo.» Tawi dun fow ko fii himo waajaade fii lisaa e kibaaru mun moyyo on e fii ummutal ngal. ¹⁹ Onsay be yetti mo, be nabi ka mbatirde wi'eteende Areyopaasi, be wi'i mo: «A waaway men andinde ko hondun woni ndee jannde heyre nde wondaa wowlude fii mun? ²⁰ Ko fii hisa wadude e noppi amen piiji di men woowaa nanude, meden faalaa andude ko hondun woni dun.» ²¹ Tawi be Atiina ben fow e hobbe wondunoobe e mabbe ben ko jokkunoo woo ko wowlugol maa hedagol piiji hesi.

²² Onsay Puulusa darii ka tumbo mbatirde, o wi'i: «Ko onon yo be Atiina, mi ndaarii e cende den fow, mi tawii ko on be diina fota. ²³ Awa kadi e nder ko mi feyyata kon, mi yi'ii kala ko rewoton, e hay mi yi'ii *layyorde ka dundoo windii: <Ko ko allaajo mo andaaka.› Dun ko on mo wondon teddinde, mo tawata on andaa, mi woni on feppinande. ²⁴ Dun ko on Alla tagudo aduna on e kala ko woni e mun, on wondo Joomiraado kammuuli din e leyfeeble den, on ko mo hodataa e nder juulirde de yimbe moyyiniri juude mun. ²⁵ Hinaa neddanke wadanta mo, wa si tawii himo hatonjini e godfun, ko on woni Yedoowo mo kala ngurndan e poopaali e kala huunde. ²⁶ Ko immorde e aaden gooto o tagiri leyyi neddanke din fow, yo ben hodu e hoore ndelo leydi ndin fow. Awa o happyino saa'iji mabbe din e ittiri ko be hodata e mun kon, ²⁷ fii no be dabbira Alla, be yi'a mo si no hawri e nder memugol, fii kala o wodsaaki hay gooto e men. ²⁸ Ko fii ko kanko hebirden ngurndan,

waawirden memminaade, ko e makko kadi woodaden. Ko d'un yubboobe gimfi mon goo no wi'i: «Ko en faybe makko kadi.»

²⁹ «Bay non ko en faybe Alla, haanaa ka miijoden wonde Alla no nandi e kaanje e kaalisi maa e kaaye lesaade fotinaa, hara ko e immorde e miijo nedfanke. ³⁰ Hari Allaahu on jogoraano yimbe ben ko be andaano mo kon, kono jooni o daalanii yimbe ben fow e nder nokkeeli din fow yo be tuubu. ³¹ Ko fii o happii jalaande nde o naawirta aduna on peewal, rewrude e on neddo mo o toddii, d'un ko on mo o wadirani fow seeedee timmudo immintingol mo e hakkunde maybe ben.»

³² Nde be nanunoo himo wowla fii ummutal maybe ben, wobbe e mabbe jali mo, wobbe ben wi'i: «Men hedoto ma jande goo fii dun.» ³³ Onsay kanko Puulusa o sortii hakkunde mabbe. ³⁴ Kono fow e mun, d'un hadaali wobbe humoo e makko, gomdina. Tawi no tawaa e ben oo wi'eteedo Denuusi, tawdaado e dental fewjoobe Areyopaasi ben, e debbo no wi'ee Damaari, kajun e wobbe goo kadi.

18

Fii Yaadu Puulusa ndun Korenti

¹ Bawto d'un, Puulusa iwi Atiina, o yahi Korenti. ² O tawi don Yahuudiyankkeejo wi'eteedo Akiila, mo iwdi mun woni Pontii, tawi neebaali ko on yaltidi e sonna mun Piriskiila leydi Italii, sabu ko Kuloodiyusu lando Roomu on yamiri Yahuudiyankheebe ben fow yaltugol Roomu kon. Onsay Puulusa yahi yiidoyi e mabbe, ³ bay tawii

Deftere Kuude Sahaabaabe Ben 18:4lxvii Deftere Kuude Sahaabaabe Ben 18:11

ko mecce goote be mari, o weeri ka mabbe, be woni e gollidugol. Tawi ko wonnoo mecce mabbe ko moyyingol cuudi bagi. ⁴ Tawi kanko Puulusa himo yewtaynood yewtereeji e aseweere kala ka juulirde fii fellintingol Yahuudiyankooobe ben e *Gereekiyankooobe ben.

⁵ Kono bay Silaasi e Timotee iwii Masedonii hewtii, Puulusa jokkii e daaluyee on tun e seeditanagol Yahuudiyankooobe ben wonde ko Isaa woni *Almasiihu on. ⁶ Kono nde tawnoo Yahuudiyankooobe ben no liddaade mo, hoyna, o fiddi conci makko din, o wi'i be: «Yo yiiyan mon dan yantu e hoore mon, min mi laabii. Kono gila jooni ko ka be wonaa Yahuudiyankooobe ben mi yaarata.»

⁷ O iwi dson, o yahi e suudu aaden rewoowo Alla no wi'ee Titiyuusu Yustuusa, tawi kadi suudu makko ndun no badondiri e juulirde nden. ⁸ Onsay oo wi'eteedo Kirispusa, d'un ko ardiido juulirde nden, kajun e beynguure mun nden fow gomdfini Joomi on. Korentiyankooobe duudube kadi hedotonooibe Puulusa gomdfini, *lootaa maande kisiyee.

⁹ Bawto d'un, Joomiraado on daalani Puulusa e nder jemmaare goo e nder koydol, o wi'i mo: «Wota a hulu, yewtu, wota a fanku. ¹⁰ Ko fii min mido wondi e maa, gooto fawataa ma jungo fii wadugol ma ko boni, ko fii mido mari jamaa duududo e nder ndee saare doo.» ¹¹ Onsay kanko Puulusa o daakii hakkunde mabbe e nder hitaande e lebbi jeegoo, himo janna daaluyee Alla on.

12 Wa fewndo on saa'i tawi ko Galiyuunu lamminaa Akaaya. Onsay Yahuudiyankeebé ben immanii Puulusa e nder nanondiral mabbe, be addi mo ka yeeso jaawirdu, **13** e hoore hibe wi'a: «Oo neddo no fellintinde yimbe ben no be rewira Alla e noone no woopondiriri e Sariya on!»

14 Fewndo ko Puulusa udditata hunduko mun kon, tawi Galiyuunu wi'i Yahuudiyankeebé ben: «Ko onon yo Yahuudiyankeebé, si tawiino ko angal peewal goo maa bonnere goo, mi hedotono on e hoore no newori. **15** Kono bay ko yeddondiral fii haalaaji e fii inde e sariyaaji mon onon tigi, yo d'un wonu haaju mon. Mi faaletaake wonande on jaawoowo d'un.» **16** Onsay o yaltini be ka jaawirdu. **17** Tun, be fow be nangi Sosteene, d'un ko ardiido juulirde nden, be woni e piyugol mo ka yeeso jaawirdu. Tawi Galiyuunu haajaaka e d'un.

Fii Yiltitagol Puulusa Antiyoosi-Sirii

18 Laatii Puulusa daakii Korenti d'on kadi ko neebi. Bawto d'un, o waynitii musibbe ben. Onsay o fempii ka wi'etee d'on Kenkere, sabu himo woondunoo woondoore. Ontuma o bakodi e Piriskiila e Akiila e laana ndiyan fii Sirii. **19** Be hewti Efeesi. Puulusa acci d'on be o wondunoo ben, o naatoyi ka juulirde, o yewtidi e Yahuudiyankeebé ben. **20** Ben torii mo wonugol don seeda, kono laatii o jabaali. **21** O waynitii be, o wi'i: «Mi aroyay ka mon si Allaahu on jabii.» Bay o iwii Efeesi d'on e laana ndiyan, **22** o tippoyii Seezariiya. O yahi, o hiwroyii *moftal ngal, onsay o yahi Antiyoosi-Sirii.

Deftere Kuude Sahaabaabe Ben 18:23lxixDeftere Kuude Sahaabaabe Ben 19:2

Fii no Apoloosi Waajori ka saare Efeesi e Korenti

²³ Bay o wonii don seeda, o yiltitii, o jindi e ca'e Galaasi e Firgii den, o wakkilini taalibaaabe ben fow. ²⁴ Bawto dun, Yahuudiyankeejoo waawudo haala, andudo kadi bindi daaluyee on, wi'eteedo Apoloosi jeyaado Aleksandiri hewti Efeesi. ²⁵ Tawi on no jangi fii laawol Joomi on, himo wowliraynood jino tiifungo, himo fejnjinaynood kadi janna no feewiri fii Iisaa, tawi e hoore d'un fow ko ko Yaayaa lootaynood kon tun o andi. ²⁶ Onsay o yewtiri pellital ka nder juulirde. Bay Piriskiila e Akiila hedike mo, be yaadi e makko, be fejnjinaynoodi mo no woniri non tigi fii laawol Alla ngol.

²⁷ Kono bay tawii Apoloosi no faalanoo yahugol Akaaya, musibbe ben wakkilini mo, be windani kadi taalibaaabe ben wonde yo be wernu mo no moyyiri. Bay o hewtii don, o nafi ben gomdfinirbe sabu sulfu Alla on, ²⁸ e hoore himo yeddondiraynood e Yahuudiyankeeben ka tumbondiral no tiidiri, e himo banginira bindi din wonde ko Iisaa woni Almasiihu on.

19

Fii no Puulusa Janniroyi ka saare Efeesi

¹ Fewndo ko Apoloosi on woni Korenti, tawi Puulusa kajun tayitoyii leyde dowje den, haa o hewtoyii Efeesi, o fotti don e taalibaaabe goo. ² O wi'i ben: «Hara on hebbi Ruuhu Seniido on wa ko gomdfindon?»

Ben jaabii mo, be wi'i: «Menen hari hay men nanaali wonde Ruuhu Seniido no woodi.»

³ Onsay o wi'i be: «Awa ko honno lootiranodon?»

Ben kadi jaabii mo, wi'i: «Ko no Yaayaa lootiraynoo non.»

⁴ Puulusa wi'i: «Yaayaa ko fii tuubuubuyee looti, e hoore dun himo wi'aynoo yimbe ben yo be gomdin aroyoowo baawo makko on, d'un ko Iisaa.» ⁵ Bay be nanii din kongudi makko, be *lootaa maande kisiyee e innde Iisaa Joomi on.

⁶ Onsay Puulusa *fawi juude mun d'en e hoore mabbe, Ruuhu Seniido on ari e mabbe, be woni e wowlugol e *haalaaji janani, wowla ko Alla longini be. ⁷ Tawi ben yimbe ko wa be sappoo e dido.

⁸ Onsay Puulusa naati ka juulirde, o yewtiri don pellital. E nder lebbi tati himo yewtidude e mabbe o fellintinana be ko yowitii e fii *laamu Alla ngun. ⁹ Kono bay wobbe wonii e sattinkinagol e angal gomdingol e aybingol laawol Joomi on e hakkunde jamaa on, o sortii hakkunde mabbe, o yetti taalibaabe ben o wadi be feere, o woni e yewtidugol e mabbe jande woo ka dudal oo wi'eteedo Tirauusu. ¹⁰ Dun neebi yeru duubi didi, haa kala hodudo *Aazii humpitii fii daaluyee Joomiraado on, dun ko Yahuudiyankeeben e *Gereekiyankeeben fow.

¹¹ Tawi Allaahu on no wadaynoo kaawakeeji moyyi hawniidi rewruude e Puulusa, ¹² haa ka tawata hibe yahaynoo be yetta disaaje maa lince de Puulusa meemaynoo d'en, be adda, be wada e nawnube ben, ben ndikka, jinnaaji bondi din kadi yalta e mabbe.

¹³ Yahuudiyankeebé goo, jindaynoobe wi'a no radoo jinna, woni e jantagol e hoore ben be jinnaaji woni e mun innde Iisaa Joomi on, hara hibe wi'a: «Mi yamirii on yaltugol e innde Iisaa, on mo Puulusa woni waajaade fii mun!» ¹⁴ Tawi ben wadaynoobe d'un ko be njeedido, ben-le ko be bibbe oo wi'eteedo Sekubaa, tawaado e hooreebe *yottinoobe sadaka Yahuudiyankeebé ben.

¹⁵ Ngin jinnawii jaabii be, wi'i: «Mido andi Iisaa, mido andi kadi ko hombo woni Puulusa, kono onon ko on hombe?» ¹⁶ Onsay on neddo mo ngin jinnawii woni e mun yani e maabbe, o waawi be fow e hoore doole tiifude, haa ben dogi yalti e ndun suudu be bornaaki, e hoore hibe barminaa.

¹⁷ Kala Yahuudiyankeeojo e Gereekiyankeeojo hodudo Efeesi andi fii d'un, kulol nangi be be fow, onsay innde Iisaa Joomi on mawninaa. ¹⁸ Onsay buy e arube e gomfinde ari qirritii, weebiti boneeji di be wadfunoo. ¹⁹ Bawto d'un, yimbe buy wadaynoobe mbilankaaku, addi defte mun, be sunni de yeeso fow. Coggu majje on jittaa, tawaa ko tammaaji kaalisi guluuji cappandé jowi. ²⁰ Ko nii, daaluyee Joomiraado on woni layirde semba e hoore doole.

²¹ Bawto d'un Puulusa ebbani fii yahugol Yerusalaam, hara ko Masedonii e Akaaya o rewri. O wi'i: «Si mi iwii don, bee mi hewtoya Roomu.» ²² Onsay o immini wallindirteebe makko dido Masedonii, d'un ko Timotée e Arastuusa, kanko o lutitti Aazii don seeda.

*Fii no oo Siyaakeejo wi'eteedo Dimitiriyusu
Imminiri Gere*

²³ Onsay jiiboldu tiifundu wadī sabu laawol Joomi on. ²⁴ Tawi no e nden saare siyaakeejo wi'eteedo Dimitiriyusu, tafaynoodo rewirkoy tosokoy tafiraakoy kaalisi, hara ko nandintinaakoy e rewirdu allaajo mabbe debbo wi'eteedo *Artemiisi on. Tawi dñun no wondannoo e be o tafidaynoo ben tono tiifudo. ²⁵ On moobindiri be o tafidaynoo ben, kambe e be be kafidunoo mecce goote ben, o wi'i be: «On fow hidon andi, fii men on ko e dee golle doo humii, ²⁶ awa kadi hidon yi'ude, hidon nanude ko woni feyyude kon, hara hinaa Efeesi doo tun, fayda ko e nder Aazii on fow wonde, oo wi'eteedo Puulusa no murtinde jamaa dñuufudo, fellintinira be wi'ugol wonde allaaji moyyiniraadi juude nedfsanke wonaa allaaji. ²⁷ Dun non hinaa fii hayfingol mecce men den tun, kono ko libugol fii nduu rewirdu oo allaajo debbo mawdo wi'eteedo Artemiisi e boorugol teddungal makko ngal, on mo Aazii fow e aduna on fow woni rewude.»

²⁸ Bay be nanii dñin kongudi, be heewi tikkere, be nangi e ewnagol, wi'a: «Artemiisi Efeesiyanikoobe ben ko mawdo!» ²⁹ Onsay saare nden fow jiibondiri, be wubbidi, be saalori bee Masedoniyanikoobe be Puulusa jindidaynoo, dñun ko Gayusi e Aristarke, be nabori be ka fijirde mawnde. ³⁰ Puulusa kadi faalaa hollitaade jamaa on, kono laatii taalibaabe ben jabaali. ³¹ Hay wobbe e hooreebe Aazii ben, be tawata ko yibbe makko kanko Puulusa, be nuli wobbe e makko ko jeeja mo fii wota o yahu ka fijirde mawnde.

³² Tawi wobbe no ewnoo godsun goo, beya kadi no ewnoo godsun goo, ko fii jiibaare nden no woni hakkunde dental ngal, e hoore dun burbe ben andaa wuren ko hondun moobindiri be.

³³ Onsay wobbe e hakkunde jamaa on lowi oo wi'eteedo Aleksander mo Yahuudiyankeeben feyyini yeeso dental ngal. Kanko Aleksander o towni jungo, tawi himo faalaa sifanaade jamaa on. ³⁴ Bay beya andii ko o Yahuudiyankeejoo, fow ewnodi wa saa'iiji cfidi, hibe wi'a: «Artemiisi Efeesiyankeebe ben ko mawdo!»

³⁵ Onsay hoore kaydi on dahi yimbe ben, o wi'i be: «Ko onon yo Efeesiyankeebe, hara ko hombo woni andaa wonde saare Efeesi nden ko ngaynaakoore rewirdu oo allaajo debbo mawdo wi'eteedo Artemiisi, awa kadi ko nde ngaynaakoore nandolla makko iwrudo ka kammu on? ³⁶ Bay dun hinaa ko yeddinii, wonee deeyube, hara on wadiraali huunde hawjere.

³⁷ Ko fii on addii bee yimbe, be tawata bona ka hormorde, be hoynaa kadi allaajo men debbo on. ³⁸ Si tawii non Dimitiriyusu oo, e siyaakeebe be o kafidi mecce ben no galiddi e goddo, haray no woodi naawirdi e naawoobe lamminaaabe fii mun, yo be wullito e ben. ³⁹ Si tawii non hidon mari godsun ko beyditii e dun, haray ko ka dental ardinaangal ngal dfundon moyyintee. ⁴⁰⁻⁴¹ Ko fii hidon waawi hebude feloore fii nduu murtaldu wafundu hande, bay dalil woo alaa mo holloyen ko hondun wafirden nduu jiiboldu.» Bay o gaynii wowlude d'un, o yilti jamaa on.

20

Fii Yaadu Puulusa Masedonii e Gereesi

¹ Bay murtaldu ndun accii, Puulusa banniti taalibaabe ben. Bay o gaynii be wakkilinde, o waynii be, o immii, o fokkitani yahugol Masedonii. ² O tayitoyi den leyde e hoore himo yewta yimbe ben nooneeji no be wakkilora, onsay o hewtoyi Gereesi. ³ Onsay o kodii d'fon lebbi tati, hari himo woniri yettugol d'fon laana ndiyan, yaara Sirii. Kono nde tawnoo Yahuudiyankeebe ben no ebbani mo janfa, o aadii yiltitagol Masedonii. ⁴ Hari ko o wondi ko d'owta mo, ko oo biddo Piruusi mo Biriyata wi'eteedo Sopateere, e Aristarke e Sekondiisu, on ko mo Tesalonii, e Gayuusi, on kadi ko mo Derbata, e Timotee e Tikiiki e Torofiami, bee fow ko be iwdi *Aazii. ⁵ Ben woni yeeso, be habboyii men Turuwaasi. ⁶ Menen kadi, bay *Juldeere Bireedi de Aldaa e Lewen nden feyyii, men bakii e laana ndiyan Filipii. E nder balde jowi men tawoyi be Turuwaasi, men wadi d'fon balde jeedidi.

Fii Wurniteede oo wi'eteedo Etikuusi

⁷ E asewe kiikiide, men moobondiri fii naamidugol. Nde tawnoo Puulusa ruttoto bimbi nden jande, o yewtidi e tawanoobe ben, o junni yewtere makko nden haa tumbere jemma. ⁸ Tawi lampuuiji d'uudufi no ka suudu dowdowru ka men mottondirnoo d'fon. ⁹ Tawi kadi suka no wi'ee Etikuusi no joodinoo e damun tosokun^Z e on koore tammo. O yetti d'oyngol

^Z **20:9** 20.9 «Damun tosokun» ko ko wi'etee «fineeter» kon fewndo doo.

luggungol e nder ko Puulusa juutini yewtere nden kon, o accitii ka koore ton sabu doyngol ngol, o yani. O imminaa, tawi o maayii. ¹⁰ Onsay Puulusa tippii, o ugginii e hoore makko, o yetti mo, o tambii, o wi'i: «Wota on aanu, ko fii himo wuuri.» ¹¹ Bay kanko Puulusa o yawitoyii, o tayiti bireedi on, o naami. Bawto d'un, o yewti kadi ko juuti haa wa ka peeral fajiri. Onsay o yahi. ¹² Bawto d'un, suka on nattaa ko o wurdo, d'un wonani be welo-welo mawngo.

Fii Iwugol Puulusa Efeesi Yaha Miletii

¹³ Onsay menen men hikkanii men yeeso, men bakii d'on e laana ndiyan fii yahugol Asoosi ka men haanunoo yiitidude e Puulusa d'on, bay hari kanko o aadike wonde o seppay. ¹⁴ Bay o tawoyii men Asoosi, men yawni mo ka laana fii yaadugol e makko Mitileeni. ¹⁵ Bay men iwii d'on, men jokki baharu on haa men hewtoyi bimbi nden nande yeeso Kiyoo. E pallal hikkungal d'on ngal kadi, men meemoyi ka wi'etee d'on Samoosi. Bawto ngal pallal d'on kadi, men hewtoyi Miletii. ¹⁶ Tawi Puulusa no mijinoo feyyugol Efeesi tun hara daraaki, fii wota o tongo e nder Aazii on. Ko fii hari himo hawji hewtoygol Yerusalaam fii Juldeere *Pentakosta nden, si tawii d'un no waawi mo gasande. ¹⁷ Ko onsay, ko o woni Miletii d'on, kanko Puulusa o immini ko yahana ardotoobe *moftal ngal Efeesi. ¹⁸ Bay ben arii, o wi'i be: «Hidon andi ko honno mi wondiri e mo'on yero ko mi woni doo kon, gila pande mi tippi Aazii. ¹⁹ E hoore d'un mi kurkanike Joomiraado on, e hoore yankinaare fow, e nder

Deftere Kuude Sahaabaabe Ben 20:20lxxviDeftere Kuude Sahaabaabe Ben 20:31

gondi, e hakkunde ndarndeede wonandun lan janfaaji immorde e Yahuudiyanke'en. ²⁰ E baawo suudugol on hay huunde, mido fejjinande on, janna on e hakkunde fow e ka cuudi kala ko wondani on e nafa, ²¹ e seedintinangol Yahuudiyankeeben e *Gereekiyankeebe ben fii tuubangol Alla e gomdingol Iisaa Joomi men on.

²² «Jooni yo mi yahu Yerusalem, bay Ruuhu Allaahu on no habbitii e d'un, e hoore mi andaa ko heboytammi ton. ²³ Ko woni tun, gila saare hebi e saare, *Ruuhu Seniido on no seedintinande lan wi'ammi wonde, kabbi e satteendeeji no sabbii lan. ²⁴ Kono mi wadaa ngurndan an d'an ko godfun, wa si tawii hicfan hitti e an, fii tun yo mi timmin jinduruuji an din e golle de mi hebiri Iisaa Joomi on den, d'un ko seeditagol fii Kibaaru Moyyo fii moyyere Alla nden.

²⁵ «Jooni mido andi, on yi'itataa lan hande kadi, dun ko onon bee be mi rewi hakkunde mun, mi waajii fii *laamu Alla ngun. ²⁶ Ko d'un wadi, mido seedaade hande wonde si goddo e mon halkike, haray wonaa min wadi. ²⁷ Ko fii mi suudaali on hay huunde, mi banginanii on ebboore Alla nden fow. ²⁸ Jooni reenee, reenidon hoore mon e wuro ngo Ruuhu Seniido on wadi on e hoore mun ngon, fii no ayniron moftal Alla ngal o hebiri yiiyan biddo makko on tigi. ²⁹ Mido andi si mi iwoyii doo, caapaali hunyufi aroyay hakkunde mon di tawata accytaa wuro ngon. ³⁰ Awa kadi wobbe hawtoyo e hakkunde mon, hara hibe wowla haalaaji boyliidi fii poofugol taalibaafe ben e maabbe. ³¹ Awa on wattanoyay yiila, anditon, e nder duubi tati jemma e palorma

mi accaali waajagol mo kala e mon e hoore gondi.

³² «Jooni mi yettii on, mi halfinii Alla e daaluyee moyyere makko nden, ko on mari bawgal fii mawningol on e yedfugol on ndondi wondude e yimbe Alla ben fow. ³³ Mi him-manaali kaalisi e kanjje e conci hay gooto. ³⁴ Onon tigi hidon andi ko juude an den mi golliri fii ko mi hatonjini e mun kon e ko wondibbe an ben hatonjini e mun kon. ³⁵ E nder dun fow, mi hollii on yo on gollir nii fii yo on wallito lo'ube ben, anditon kadi kongudi Iisaa Joomi on ko o wi'i kon kanko tigi wonde: «Ko okkugol buri moyyude edii okkoreede.» »

³⁶ Bay o gaynii yewtude dun, onsay o jiccii fii du'ondirgol e mabbe be fow. ³⁷ Onsay be fow be hirbii mo kanko Puulusa, be lunni e hoore gondi tiisudi. ³⁸ Ko burnoo be sokolinde kon, ko ko o wi'unoo be kon wonde be yiitataa mo hande kadi. Onsay be dowtiti mo haa ka laana ndiyan.

21

Fii Yaadu Puulusa ndun Tiiri e Seezariiya

¹ Bay men sertii e mabbe, men bakii don e laana ndiyan, men fewni haa Koosi. Bimbi nden nande men yahi Rodeesi. Bay men iwii don kadi, men yahi Patara. ² Bay men tawii don laana lumbooha yaara Fenisi, men bakii don, men yahi. ³ Bay men battike Siipuru, onsay men acciri don ka nano, men yaari telen Sirii fii tippinoygol ko laana kan rondii kon Tiiri. ⁴ Bay

men tawii taalibaabe ben don, men woni balde jeedidi. Immorde e Ruuhu Allaahu on be wi'i Puulusa: «Wota yahu Yerusalem.» ⁵ Bay den balde jeedidi timmii, men yahi. Onsay kambe fow e rewbe mabbe ben e bibbe mabbe ben, be downti men, men yaadi haa men yalti saare nden, d'un ko ka sera ndiyan, men jicci, men du'ondiri. ⁶ Onsay men waynondiri e mabbe, men bakii ka laana, kambe be yiltitii ka mabbe.

⁷ Bay men gaynii ko yaaretee laana ndiyan kon, d'un ko gila Tiiri haa Potolemaayi, men hiwrondiri e musibbe gomdsinbe wonbe d'on ben, men wondi e mabbe nallal.

⁸ Bimbi nden pande, men yahi men hewtoyi Seezariiya, men naatiri ka suudu Filiipu oo waajotoodo fii Kibaaru Mooyo on, tawdaado e njeedidoobe ben, men weeri ka makko.^a ⁹ Tawi himo mari jiwbe nayo haaloobe ko Alla longini d'un be andaali gorko. ¹⁰ Nde tawnoo men wadii d'on balde buy, haaloowo ko Alla longini d'un wi'eteedo Agabuusi, iwrudo ka diiwal Yahuuda, ari tawi men. ¹¹ O yetti dattol Puulusa ngol, o habbitii juude e koyde, o wi'i: «E hino ko *Ruuhu Seniido on wi'i kon: «Oo neddo jeydo ngol dattol, Yahuudiyankeebe ben habbiray mo nii Yerusalem, be wattu mo e juude be wonaa Yahuudiyanke ben.» »

¹² Bay menen e ben yimbe hodube e nden nokkuure men nanii d'un, men jeeji Puulusa fii wota o yahu Yerusalem. ¹³ Kono Puulusa jaabii men, wi'i: «Ko hondun wulloton, bonnon mi bernde? Ko fii min hinaa fii habbegol tun mi

a **21:8** 21.8 Sah. 6.1-6

hebulanii, kono ko hay maayugol Yerusalaam fii innde Iisaa Joomi on.»

¹⁴ Nde tawnoo o jaabali yilteede e ko o anniyyii kon, men habbitaaki hande kadi, kono men wi'i: «Yo kodduruyee Joomiraado on wadu!»

¹⁵ Bay den balde don feyyii, men ebbindii, men yahi Yerusalaam. ¹⁶ Taalibaabe goo be Seezariiya dowti men ka goddo no wi'ee Mansuuna mo Siipuru, on ko taalibaajo gila ko neefbi, fii ko werna men.

Fii Hewtugol Puulusa Yerusalaam

¹⁷ Bay men hewtii Yerusalaam, musibbe ben jaabbori men weltaare. ¹⁸ Bimbi nden jnande menen e Puulusa men ari ka Yaaquuba, ardotoobe *moftal ngal kadi fow ari don. ¹⁹ Bay Puulusa gaynii be hiwraade, o nangi e fillitanagol be, fensita ko Allaahu on wadi e hakkunde be wonaa Yahuudiyanke ben e nder golle makko den. ²⁰ E nder ko be hedii mo kon, be mawnini Alla, e hoore dfun be wi'i mo: «Musiddo, a yi'ii ittiri guluuje guluuje Yahuudiyankeebi ko gomdfini, e hoore be fow hibe habbitii e Sariya on. ²¹ E hoore be yeetaama wonde hisda jannude Yahuudiyankeebi wonbe e hakkunde be wonaa Yahuudiyanke ben fow wota be jokku Sariya Muusaa on, dfun ko wi'ugol be wota be sunnin faybe maabbe ben e wota be jokku naamuji din. ²² Hara ko hondun wadeten? Ko fii pellet be anday wonde a arii. ²³ Ko dfun wadi si men wi'ete yo a wadu ko men wi'u-maa kon. No e hakkunde amen yimbe nayo woondubé woondoore. ²⁴ Yettu ben, labbindinodaa e

mabbe, fawtodaa njoddi fembagol mabbe ngol, d'un fow anday goonga alaa e ko be wowlanaa kon fii maa, kono an kadi hisa doftii Sariya on. ²⁵ Kono fii be wonaa Yahuudiyanke, gomdinbe ben, men tawi no moyyi ka men windana be, yo be reeno e tebbeeli sakkanaadi sanamuuij e yiyan e mummunteeji jiibudi e jinaa.»

²⁶ Bimbi nden nande, Puulusa yetti ben yimbe nayo, o labbindinodi e mabbe, o naati ka *juulirde mawnde. O fejnini ko honde tuma e nalaadfe den labbinagol mabbe ngol timmata, sadaka mo bee e mabbe wadee.

Fii no Puulusa Nangiraa

²⁷ Ka balde jeedidi den timmata d'on, bay Yahuudiykeebe be *Aazii ben yi'ii mo ka juulirde mawnde, be yuuni jamaa on fow, be fawi mo juude, ²⁸ e hoore hibe ewnoo, wi'a: «Isra'iilayankeebe*, wallee men! E hino neddo wondo jannude fow on nokku woo nokku fi liddagol jamaa on, liddoo Sariya on, liddoo kadi ndee nokkuure. E hay o naadii *Gereekiyankneebe ka juulirde mawnde, o tuuninii ndee nokkuure hormorde!» ²⁹ (Ko woni sabu d'un ko tawde hari be yiidiino mo e oo Efeesiyankoojo wi'eteedo Torofiami ka saare, haa be sikki wonde Puulusa naadii mo ka juulirde mawnde.)

³⁰ Onsay saare nden fow memminii, yimbe ben dogi iwri e cende den fow, be nangi Puulusa, be poodi mo, be itti ka juulirde mawnde, baafe den ombaa kisan. ³¹ Wa ko be ebbata fii warugol mo, tawi hooreejo dental suufaafe Roomu ben nanii wonde jiiboldu wadii e nder Yerusalem fow.

32 Don kisan, o yetti suufaaabe e yeesoobe mun, be wubbani ben ebbunoobe warugol Puulusa. No be yiirunoo on hooreejo e ben suufaaabe, be acciti piyugol mo.

33 Onsay on hooreejo badii mo kanko Puulusa, o nangi mo, o yamiri yo be jolku mo jolokoje didfi. O landii non ko hombo woni oo e ko hondsun o wadi. **34** Kono tawi e nder jamaa on, wobbe no ewnoo wi'a goddfun, beya kadi no wi'a goddfun goo, tawi kanko hooreejo on o waawaali andude ko woni haqqiqa fii murtaldu ndun. Onsay o yamiri yo be nabu mo ka daaka suufaaabe ben. **35** Wa ko Puulusa yawata bordi din, suufaaabe ben kutii mo tambii sabu hunyeendi jamaa on. **36** Ko fii hari konu yimbe ben no jokki mo, no ewnoo, wi'a: «Waree mo!»

Fii Yewtere nde Puulusa Yewti Jamaa Yerusalaam on

37 Wa ko kanko Puulusa o naadetee ka daaka suufaaabe ben, o landii hooreejo dental suufaaabe ben, o wi'i: «E hara a newnanay lan yeetagol ma goddfun?»

On jaabii mo, wi'i: «Hida waawi haala Gereeki? **38** E hara hinaa an woni oo Misirayankoojo, wonudo sabu nduu murtaldu ko feyyi koo, dogidi e bee ittoobe ko'e guluuje nayo ka wulaa?»

39 Kanko Puulusa o wi'i mo: «Min, ko mi Yahudiyankeeo mo Tarsiisu, dun ko e nder Silisii, jeyaado e saare nde tawata wonaa hayfunde. Mi jeejii ma newnanan yewtugol jamaa on.»

40 Onsay on hooreejo newnani mo. Kanko Puulusa o immii, o darii ka hoore bordi, o

yeyani jamaa on jungo, deeyaango tiidungo wadi. Onsay o hewtini be yewtere nden e haala Yahuudiyanke, o wi'i:

22

¹ «Ko onon yo musibbe an e baabiraabe an, jooni hedsee mi yewta on fii jaabannde an nden.»
² Nde be nanunoo ko e haala Yahuudiyanke o woni be yewtude, deeyaango ngon burti kadi.

Onsay Puulusa wi'i: ³ «Min ko mi Yahuudiyankkeejo hebaado Tarsiisu, dun ko e nder Silisii, kono ko e nder ndee saare doo mi ne'aa. Ko e fee Gamaliyiila kadi mi jangi fii jokkugol Sariya baabiraabe men ben tigi. Hari mido huminoo e Alla fota wano wonirdon non on fow hande. ⁴ Mido cukkotonoo ben jokkubé laawol Iisaa haa wobbe maayori, mi habba, mi soka worbe e rewbe. ⁵ Yottinoowo* mawdo sadaka on e dental mawbe ben fow ko seedee an e dun. Mi hendorii be hay bataake fii musibbe Yahuudiyankéebe wonbe Damaasi ben. Onsay mi yahi fii habbugol jokkubé ngol laawol wonbe ton ben, mi adda Yerusalaam fii donkingol be.

⁶ «Wa fewndo ko mi woni ka datal, bay mi badike Damaasi, dun ko wa naange e hoore, tun ndaygu moolanaangu iwri ka kammu, hunditi lan. ⁷ Mi yani ka leydi, onsay mi nani hawa no wi'ammi: ‹Saawulu! Saawulu! Ko fii hondun wondaa mi cukkanaade?›

⁸ «Mi jaabii: ‹Ko an hombo nii Joomi an?›

«O wi'immi: ‹Ko min woni Iisaa jeyaado Naasirata, on mo wondaa cukkaade.› ⁹ Ben wondunoobe e an yi'uno ngun ndaygu, kono be alaano nanude hawa on Wondo lan wowlande.

Deftere Kuude Sahaabaabe Ben 22:10lxxxiiiDeftere Kuude Sahaabaabe Ben 22:20

10 «Onsay mi wi'i: ‹Ko hondun mi wadata, yaa an Joomi?›

«Joomi on jaabii lan, wi'i: ‹Immo yahaa Damaasi, ko don be yeetoto-maa kala ko haanudaa wadfude.›

11 «Tawi mi alaa yi'ude han kadi, ko fii hari jalbeendi ngun ndaygu wuminii lan. Onsay wondunoobe e an ben dowimmi haa mi hewti Damaasi.

12 «Tawi godso no d'fon no wi'ee Hanaani-ya, on ko gorko dewo doftotoodo Sariya on, mo Yahuudiyankeeb'e wonbe Damaasi ben fow joganii kongol moyyol. **13** On ari darii takko an, wi'immi: ‹Ko an yo Saawulu musid'so an, wuntu!› E on saa'i tigi mi wunti, mi yi'i mo.

14 «O wi'immi kadi: ‹Alla baabiraabe men ben subike ma fii yo a andu faale makko on e fii yo a yi'u Feewudo on, nanaa kongudi iwrudi ka hunduko makko din. **15** Ko fii a wonay seeditantoodo mo e yeeso yimbe ben fow fii ko yi'udaa kon e ko nanudaa kon. **16** Jooni non ko hondun wondaa nennanaade? Immo *lootedaa maande kisiyee, labbinedaa junuubaaji maa din e nder jantagol innde makko nden.› »

17 Puulusa wi'i kadi: «Bay mi yiltitike Yerusalaam, e nder ko mi torotoo Alla kon ka *juulirde mawnde, mi fejjinanaa godfun.

18 Onsay mi yi'i Joomi on, o wi'immi: ‹Hittin yaltugol Yerusalaam, ko fii be jabataa seeditoore maa nden fii an.› **19** Kono mi wi'i: ‹Joomi an, hibe andi kambe tigi wonde mi yahayno gila e juulirde hebi e juulirde fii piyugol soka ben gomdinbe ma. **20** Awa fewndo kadi be

hibbi yiyan Astefaana dan, dun ko on seeditantonoodo ma, hari min tigi mido d'fon e mido jabi dun. Awa kadi hari mido joganii ben wonbe mo warude conci mun din.» ²¹ Kono o wi'immi, «Yahu, ko fii mi imminte ka wosdi, dun ko haa e be wonaa Yahuudiyanke ben.» »

²² Laatii be hedii mo kanko Puulusa haa e ngol kongol d'fon, onsay be ewnii, be wi'i: «Yo sifa oo neddo itte aduna! O haanaa wuurude!» ²³ Be beydi sonko, be ferii kadi conci mabbe din, e hoore hibe bugoo kadi mbullaari dow.

²⁴ Onsay hooreejo dental suufaabe ben yamiri yo be naadu Puulusa ka nder daaka suufaabe ben, be landora mo cabbi fii andugol ko hondun wonaa sonkireede nii fii makko. ²⁵ E nder ko be habbata mo kon fii foccugol mo, kanko Puulusa o wi'i yeesoojo sufaabe wonnoodo d'fon on: «E hara hidon newnanaa foccugol jeyaado e laamateeri Roomu, mo on jaawaali toode?»

²⁶ Bay on yeesoojo nanii ngol kongol, o yahi, o wi'oyi hooreejo dental ngal: «Ko honno gerdataa, ko fii oo neddo ko jeyaado e laamateeri Roomu.»

²⁷ Onsay on hooreejo ari wi'i mo kanko Puulusa: «Yeeto lan, e hara ko a jeyaado e laamateeri Roomu?»

O jaabii: «Hiiyii, ko mi dun.»

²⁸ Kanko hooreejo on o wi'i mo: «Min ko kaalisi buy mi itti fii yo mi wonu jeyaado e laamateeri Roomu.»

Puulusa kadi wi'i mo: «Min non mi jibina ko mi d'un.» ²⁹ Onsay kisan landotonooße mo ben diri, hooreejo dental ngal kadi huli, bay o andii

Puulusa ko jeyaado e laamateeri Roomu, awa kadi o wadii haa o habbaama.

Fii Yewtere Puulusa nden yeeso Dental Mawbe ben

³⁰ Jango mun, nde tawnoo kanko hooreejo dental suufaafe Roomu ben himo faalaa andude e haqiqiqa ko hondun Yahuudiyankeebé ben wonnoo mo toojirde, o hoynitani mo, o yamiri kadi hooreebe yottinoobe sadaka ben e dental fewjoobe ben fow mottondirgol. Onsay o addi Puulusa, o joddini mo yeeso mabbe.

23

¹ Bay Puulusa tenyinii dental fewjoobe ben, o wi'i: «Musibbe, ko e hoore bernde laabunde mi wonirani Alla haa handeere ndee.» ² Tun *yottinoowo mawdo sadaka on, d'un ko Hanaaniyya, yamiri wonbe takko makko ben bantagol mo.

³ Puulusa kadi wi'i mo: «An kadi, Allaahu on bantoto ma yo maadi rawninaandi! Hida joodii naawirgol lan Sariya on, e hin-le a bonnirii Sariya on ko yamirdaa yo be banto lan kon!»

⁴ Wonnoobe don ben wi'i: «A hoynii yottinoowo mawdo sadaka fii Alla on!»

⁵ Onsay Puulusa jaabii, wi'i: «Musibbe, hari mi andaa wonde ko yottinoowo mawdo sadaka on nii, ko fii no windii: Wota mo wowla yeesoojo jamaa mun on ko boni.» b

⁶ Bay kanko Puulusa o faamii wonde feccere e wonnoobe don ben ko fedde *Saddusiyaaabe e ndeya feccere kadi ko fedde *Fariisiyaabe, onsay kanko Puulusa o ewnii ka hakkunde

b 23:5 23.5 Egg. 22.27

dental fewjoobe ben, o wi'i: «Musibbe, min ko mi Fariisiyaajo bii Fariisiyaajo kadi. Ko sabu tanyinaare ummutal maybe ben wadi si mido jaaweede.» ⁷ Bay kanko Puulusa o wi'i dun, yeddondiral wadi hakkunde Fariisiyaabe ben e Sadduusiyaabe ben, onsay mbatu ngun senditii. ⁸ (Tawi Sadduusiyaabe ben no wi'a ummutal alaa, malaa'ika alaa, awa kadi ruuhu alaa. Fariisiyaabe ben kanun no wi'a dun fow no woodi.)

⁹ Sonko njano wadi, wobbe e yeesoobe dental Fariisiyaabe ben hawtii, be immini yewtoore tiidunde, be wi'i: «Men yi'aali bone woo e hoore oo neddo. No gasa non hara ko ruuhu maa malaa'ika wowlani mo.» ¹⁰ Nde tawnoo yeddondiral ngal no tiidude tun, hooreejo dental suufaabe ben huli wota be seekitu Puulusa. O yamiri suufaabe ben tippagol, ittoya mo hakkunde mabbe, be naba mo ka daaka suufaabe ben.

¹¹ E on jemma hikkiido don, Joomi on badii Puulusa, wi'i mo: «Wakkilo, ko fii wano seeditoraa non fii an Yerusalaam, bee seeditoroyaa non kadi Roomu.»

Fii Janfa Yahuudiyankeebé ben e hoore Puulusa

¹² Bay weetii, Yahuudiyankeebé ben wadi janfa, be woondi wota be naamu hay huunde maa be yara, doo e be warude Puulusa. ¹³ Ben ebbunoobe kan janfa no burnoo cappande nayo. ¹⁴ Be yahi, be tawoyi hooreebe yottinoobe sadaka ben e mawbe ben, be wi'i be: «Men aadike e hoore woondoore tiidunde wonde, men

naamataa men yarataa hay huunde fannin men waraali Puulusa. ¹⁵ Jooni nanondiree e dental fewjoobe ben, yidon e hooreejo suufaaabe ben, faaminanon mo wonde on ndaaray fii nduu muraadu Puulusa hara ko no woniri non, fii no o addira mo yeeso mon. Menen haray medsen hebulii warugol mo doo yo o hewtu.»

¹⁶ Kono laatii biidso bandiraawo Puulusa on nani hibe yewta fii kan janfa, o yahi o naatoyi ka daaka suufaaabe ben, o humpiti d'un Puulusa. ¹⁷ Puulusa kadi noddi goddo e yeesooabe suufaaabe ben, o wi'i on: «Dowtu oo ka hooreejo dental suufaaabe ben, ko fii himo jogii ko o hollita mo.»

¹⁸ On yeesoojo kadi yetti mo, dowti mo ka on hooreejo, o wi'i mo: «Ko oo kasoojo wi'eteedo Puulusa noddimmi wi'immi yo mi dowtu oo suka ka mon, himo mari godfun ko o yeetoo on.»

¹⁹ On hooreejo kadi jogii mo jungo ngon, be pottitii sera, o wi'i mo: «Ko hondun jogidaa ko yeetodaa mi?»

²⁰ On suka jaabii mo, wi'i: «Yahuudiyankeebé ben nanondirii fii toragol on yo on nabán be Puulusa jango ka yeeso dental fewjoobé ben, wa si tawii hibe faalaa humpitaade ko laabi fii nduu muraadu makko. ²¹ Awa wota on jabu ko be toroytoo on kon, ko fii buri yimbe cappande nayo hakkunde mabbe no ebbi janfa e hoore makko. Hibe aadii e nder woondoore wonde be naamataa be yarataa doo e be warude mo. Hibe hebulanii non d'un. Jooni ko newnugol mon ngol tun be hedii.»

22 Onsay hooreejo dental suufaaabe ben newnitani suka on, e hoore o wi'i mo wota o wowlan hay gooto kon ko o humpiti mo don.

Fii no Puulusa Feyyiniraa Seezariiya

23 Kanko hooreejo on o noddi kadi dido e hakkunde yeesooobe suufaaabe ben, o wi'i be: «Hebulinee suufaaabe teemedde dido e doginoobe pucci cappande njeedido e be conkenje teemedde dido fii ko yaha Seezariya hande jemma ka saa'i jeenayabo. **24** Ebbon kadi pucci ka Puulusa yawa, nabon mo lawnnon haa ka Felikiisa yeesoojo diiwal ngal.» **25** O windirani nii kadi lando on batakuru, o wi'i:

26 «Salminaango an min Kuloodu Lisiyaasi, haa e mo'on onon Felikiisa, yo yeesoojo tedduuso.

27 «Awa oo neddo mo mi nabani on, ko Yahuudiyankeebe ben wonnoo ko nangi mo fii warugol. Nde mi humpitinoo wonde ko o jeyaado e laamateeri Roomu, mi ardi e mojobere suufaaabe, mi jattini mo be. **28** Nde tawnoo mido faalaq andude ko e hoore hondun be wonnoo mo toojirde, mi nabi mo e yeeso dental fewjoobe mabbe ben. **29** Mi tawi toope mabbe den ko e banje yeddondire fii Sariya mabbe on. Kono tawi ella woo fawaaki mo fodduudo e wareede maa sokeede. **30** Bay mi andinaama janfa no ebbaa e hoore oo neddo, mi imminani on mo kisan, mi yamiri ben toopube mo yo be wullito e hoore makko ka mon.»

31 Onsay, suufaaabe ben wadi ko be yamiraan kon, be yetti Puulusa, be nawri mo jemma haa Antipatiri. **32** Bimbi nden jande be yiltitii ka daaka suufaaabe ben e hoore be accu be pucci

ben yaadii e makko. ³³ Bay ben hewtii Seezariiya, be jonni yeesoojo diiwal ngal batakuru ndun, be watti Puulusa e juude makko. ³⁴ Bay kanko yeesoojo on o jangii batakuru ndun, o landii Puulusa ko mo o diiwal hongal. Bay o andii ko mo o Silisii, ³⁵ o wi'i: «Nde toopube ma ben aroyi woo mi hedoyto ma.» Onsay o yamiri yo be maroy Puulusa ka suudu laamu *Heroodu lando on.

24

Fii no Puulusa Nabiraa ka Yeesoojo Diiwal ngal

¹ Balde jowi bawto d'un, *yottinoowo mawdo sadaka on, d'un ko Hanaaniya, ardi e mawbe seedaafe e yewtoowoc no wi'ee Tertuula. Be wullitii e hoore Puulusa ka yeesoojo on. ²⁻³ Bay kanko Puulusa o noddaama, oo wi'eteedo Tertuula nangi toopirde mo nii, wi'a: «Yaa an Felikiisa lando teddudo, ko sabu mon men hebiri oo buttu timmudo, ko faamu mon ngun kadi woni sabu si dee waylande fii nafa oo jamaa wadi. Meden jabidi di, di fow ka woni woo e hoore anditangol on fota. ⁴ Kono fow e mun, men faalaaka on tonguede haa neeba, mi torike on tun, tippude e newaare mon nden, yo on newnan men hedifodon men seeda.

⁵ «Men taw oo neddo ko gerenteejo, memminoowo yeddondire e hakkunde Yahuudiyankeebe aduna on fow. Ko o yeesoojo fedde Naasirayaabe ben kadi. ⁶⁻⁷ O etike hay no o

C 24:1 24.1 Oo «yewtoowo» doo ko andudo sariya Roomiyankoobe ben.

Deftere Kuude Sahaabaabe Ben 24:8xc Deftere Kuude Sahaabaabe Ben 24:17

tuuninira *juulirde mawnde nden. Onsay men nangi mo.d ⁸ Onon tigi Felikiisa hidon waawi mo landaade kanko Puulusa, andon fii ko men tooniri mo kon fow.»

⁹ Yahuudiyankeebé ben bambani mo kanko Tertuula, be wi'i: «Ko nii tigi woniri!»

¹⁰ Onsay Puulusa yetti haala kan, bay yeesoojo on jonnirii mo haala kan baayugol mo, o wi'i:

«Mido andi wadii nii duubi buy ko onon woni naawoowo e hoore oo jamaa. Awa ko e nder hoolaare mi weebitirta jaabannde an nden. ¹¹ Wadaali nii buri balde sappoo e didi gila mi yahi Yerusalaam fii rewoygol Alla, hidon waawi tefude d'un non onon tigi. ¹² E hoore d'un be tawaali mido yeddondira e goddo maa mido yuuna yimbe, d'un non woni ka juulirde mawnde, maa e deya juulirde, maa ka nder saare. ¹³ Be waawataa kadi hollude ko hondun be toonirimmi. ¹⁴ Mido qirritaade yeeso mon wonde ko Alla baabiraabe an ben mi woni rewude, e hoore jokkugol laawol ngol be wi'i ko fedde ngol. Mido gomsini kadi kala ko windii ka Sariya e ka defte annabaabe ben. ¹⁵ Awa kadi mido mari on tama'u e fee Alla, wano kambe kadi be tijjori non: on-le ko fii ummutal feewubé ben e boyliibe ben. ¹⁶ Ko d'un wadi si min kadi mi etoto fii hebugol bernde nde aldaa e feloore yeeso Alla e yeeso yimbe ben.

¹⁷ «Bay wadii duubi buy mi artaali ka leydi an, mi arti fii addangol yimbe an ben kaalisi

d **24:6-7** 24.7 Bindi goo no beyditi d'un ka lannoode aaya on:
Kono tawi Lisiyaasi hooreejo sufaabe ben naatii o jattiri mo e juude amen doole.

Deftere Kuude Sahaabaabe Ben 24:18xci Deftere Kuude Sahaabaabe Ben 24:27

fii ko be wallitora, e fii weebitangol Alla dokke.
18 Ko onsay be tawimmi ka juulirde mawnde e hoore ko mi labbiniido. Mi wondaa kadi e yimbe maa murtaldu. 19 Kono ko Yahuudiyankeebi be *Aazii goo haanunoo arude hollitoo yeeso mon, be liba haala e an, si tawii hibe jogii godfun ko be fawa e an. 20 Si hinaa d'un, yo bee doo wowlu ko ella hombo be tawi mido wadi wa fewndo ko mi addaa yeeso dental fewjoobe ben. 21 Si hinaa taw hara ko fii ngol kongol ngol mi ewninoo e hakkunde mabbe tun, mi wi'i: Ko sabu ummutal maybe ben wadi si mi wadaa naaweteedo yeeso mon hande!»

22 Nde tawnoo Felikiisa no humpitii fii laawol ngol moyya, o yamiri be yiltagol taho, o wi'i: «Nde hooreejo dental suufaabe ben ari woo, d'un ko Lisiyaasi, mi ndartay muraadu mon ndun.»

23 O yamiri kadi yeesoojo suufaabe ben yo o maroy Puulusa e hoore hoynangol mo seeda, hara o salaaki kadi be Puulusa ben kurkanoo mo.

24 Bay balde seeda feyyii, kanko Felikiisa o ardi e beyngu makko, d'un ko Duruusiila, tawi on debbo ko Yahuudiyankeeo. Kanko Felikiisa, o immini ko yahana Puulusa, o hedii mo fii ko yowitii e gomdsingol Iisaa Almasiihu on. 25 Nde tawnoo Puulusa ko fii peewal e waawugol hoore mun e fii naawoore aroyaynde nden wonnood yewtude, kulol hebi Felikiisa, o wi'i: «Hida waawi yahude taho! Nde mi hettindoyii woo, mi noddete.» 26 E himo tanyininoo kadi wonde Puulusa yeenay mo, ko d'un wadi si himo imminaynoo ko yahana mo soono woo fii yo be yewtidu. 27 Duubi didi feyyiri nii. Bawto

dun Felikiisa lontiniraa Perkuusi Festuusa. Nde tawnoo kanko Felikiisa himo faalaa sulfinande Yahuudiyankeebe ben, o acci Puulusa ka kaso.

25

Fii Yewtere nden hakkunde Puulusa e Festuusa

¹ Bay kanko Festuusa o hewtii e ngal diiwal Seezariiya, o woni dson balde tati si o yahi Yerusalem. ² Onsay hooreebe *yottinoobe sadaka ben e mokobaabe Yahuudiyankeebe ben yahi ka makko, wullitii e hoore Puulusa. ³ Be torii mo, be jeeji yo o sulfinan be, o addana be Puulusa Yerusalem, tawi hibe ebbunoo janfa no be warira mo ka laawol. ⁴ Kono Festuusa jaabii be, wi'i: «Puulusa no sokii Seezariiya, awa min kadi mi yiltoto ton ko neebaa.» ⁵ O wi'i kadi: «Mido waawi yaadude e wobbe e hooreebe mon ben, si on nedso no wadi bone, be wullitoo e hoore makko!»

⁶ Laatii kanko Festuusa o wondaali e maßbe buri balce jeetati haa sappo, onsay o yiltitii Seezariiya. Bimbi nden nande bay o jooslike ka naawirdu, o yamiri yo Puulusa adde. ⁷ Bay on addaama, Yahuudiyankeebe iwrubé Yerusalem ben hundi mo, be libi e hoore makko toope duudude tiidude, de be waawataa fensitude fii mun. ⁸ Puulusa jaabori nii, wi'i: «Mi wadaali ella liddiido Sariya Yahuudiyankeebe ben, maa *juulirde mawnde nden, maa lando mawdo Roomu on.»

⁹ Nde tawnoo kanko Festuusa himo faalaa sulfinande Yahuudiyankeebe ben, o jaabii Puulusa, o wi'i mo: «Hida faalaa yahude Yerusalem naawedaa ton e tawnde an?»

¹⁰ Puulusa jaabii mo, wi'i: «Mido ka yeeso naawirdu lando mawdo Roomu on, ko ton mi haanaa jaaweede. Mi wadaali Yahuudiyankeebe ben ella woo, wano gelordfon non onon tigi foto. ¹¹ Kono si mido mari ellaaji, e si mi wadii kuude fodduude e mayde, haray mi salotaako wareede. Kono si tawii goonga woo alaa e toojne de be toojimmi den, haray hay gooto waawataa lan wattude e juude mabbe. Dun haray yo mi feyyu ka *Seezar lando mawdo Roomu on.»

¹² Bay Festuusa yewtidii e be o fewjodata ben, o jaabii Puulusa, o wi'i: «Bay a feyyinii hoore maa ka Seezar, ayahay yeeso Seezar.»

Fii no Puulusa Addiraa yeeso Agiriipa

¹³ Balde seedfa bawto d'un, Agiriipa lando on e Bereniise hewti Seezariiya fii hiwragol Festuusa. ¹⁴ Nde tawnoo be wonay don balde buy, Festuusa weebitani on lando muraadu Puulusa ndun, o wi'i: «Felikiisa no accunoo cfoo godso ka kaso. ¹⁵ Fewndo non ko mi yahi Yerusalaam, hooreebe yottinoobe sadaka ben e dental mawbe Yahuudiyankeebe ben wullitino e hoore makko kanko Puulusa, tawi hibe landii happangol mo. ¹⁶ Kono mi jaabii be, mi wi'i: «Roomiyankooбе ben woowaa warigol nii tun, ado be tumbindirde toonube ben e toonaado on, e newnangol on toonaado fii no o jaabora d'en toojne mabbe.» ¹⁷ Onsay mi ardi e mabbe doo, tawi mi faalaaka juutinde muraadu ndun. Bimbi nden pande kisan mi joddfini naawoore nden, mi yamiri yo on neddo adde. ¹⁸ Bay toonube mo ben hewtii, laatii be fawaali mo kuude

bonde woo, wano mi sikkirnoo non. ¹⁹ Tawi yeddondiral wongal hakkunde mabbe e makko ngal ko yubbondirngal e fii diina mabbe kan tun, e aaden maydo goo kadi no wi'ee Iisaa, mo Puulusa kapun wi'i no wuuri. ²⁰ Tawi min mido jibii fii sifa nden yewtere. Onsay mi landii mo si tawii himo faalaa yahude Yerusalaam, o jaawoyee ton fii d'un. ²¹ Kono Puulusa feyyini nden yewtere yeeso fii yo muraadu makko ndun wonu e andal lando mawfo Roomu on. Onsay mi yamiri yo be maru mo haa nde mido feyyina mo ka lando mawfo Roomu on woo.»

²² Onsay Agiriipa wi'i Festuusa: «Min kadi mido faalaa hedfaade on neddo.»

Festuusa kadi jaabii mo: «A hedoto mo jango.»

²³ Bimbi nden jnande Agiriipa e Bereniise ardi e hollitaare mawnde, be naatidi e hooreebi suufaabe toowubé ben e mokobaabe saare nden ka suudu tolnidru. E yamiroore Festuusa, Puulusa addaa. ²⁴ Onsay Festuusa wi'i: «Ko an yo Agiriipa lando, e onon fow yo wondube e amen, on yi'ii oo neddo mo fii mun wadi haa jamaa Yahuudiyanke on Yerusalaam fow e doo kadi ari toriimi, hara hibe wi'a wonde o haanaa hande kadi wurugol. ²⁵ Kono min mi faamii o wadaali hay huunde ko foddi e wareede, kono laatii kanko tigi o feyyini hoore makko ka laamu dow-dowwu, mi tawi no moyyi nabugol mo. ²⁶ Kono mi tawi, mi alaa hay huunde ko mi windana hooreejo dow-dowjo on, hara ko ko haqinqini fii makko. Ko d'un wadi si mi weebiti mo yeeso mon, tentinii yeeso mon onon Agiriipa yo lando on, fii hebugol goddun ko mi winda nde lande

den lanni. ²⁷ Ko fii mi taw wa si tawii no boylii ka naba kasoojo, hara hollaali ko ella hondfun woni e hoore makko.»

26

¹ Onsay Agiriipa wi'i Puulusa: «Hida new-nanaa yewtangol hoore maa.»

Ontuma Puulusa towni jungo, o fuddfii jaabaade, o wi'i: ² «Hande mido weltori hebugol feere weebitangol on jaabanne an nden, yo onon Agiriipa Lando, fii dee toojje de Yahuudiyankeeben libi e hoore an fow. ³ Ko fii hison andi haa yaltoyi naamuuji Yahuudiyankeeben ben fow e yeddondire mabbe d'en fow. Ko d'un wadi si mi torike on, jebbilagol hedoo lan.

⁴ «Yahuudiyankeeben ben fow no andi ko honno mi wuuirnood Yerusalem e ka leydi an gila ka fuddoode cukaaku an. ⁵ Hibe andunoo lan gila ko neebi, hibe waawi non seeditaade. Mido wuuirnood wa *Fariisiyaajo, mo fedde mun burnoo cataade e diina amen kan. ⁶ Jooni non, mido naaweede sabu tama'u fodaari ndi Allaahu on fodi baabiraabe amen ben ndin. ⁷ Bolondaaj* amen din sappoo e didi, din duumiidi e rewugol Alla jemma e nalorma, no tanyinii yi'ugol laatagol ndin fodaari. Yaa an Lando, ko fii nden tanyinaare Yahuudiyankeeben toonirimmi. ⁸ Ko honno waawudon mijorde wonde Alla immintintaa maybe ben?

⁹ «Min tigi hari mido mijoo wonde mido haani rewude pehe d'en fow fii liddagol ndee innde Iisaa, oo jeyaado Naasirata. ¹⁰ Ko d'un mi wadi

Deftere Kuude Sahaabaafe Ben 26:11xcvi Deftere Kuude Sahaabaafe Ben 26:18

Yerusalaam. Min tigi mi sokii gomdinbe mo buy ka kasooji, wano hooreebe *yottinoobe sadaka ben newniranimmii non. Nde be naawetenoo fii wareede woo, min kadi tawayno mido wonani nden fewjoore. ¹¹ Awa kadi mi jokkayno be soono woo e juulirde d'en fow fii donkingol be, mido bittinaynoo be fii no be yeddira gomdfinal mabbe ngal. E nder ko mi monantoo be haa feyyita kon kadi, mi cukkotono be haa ka ca'e janane.

¹² «Ko e nder d'fun mi yahi Damaasi e hoore nelal e yamiroore hooreebe yottinoobe sadaka ben. ¹³ E nder yaadu ndun tumbere palorma, mi yi'i jalbeendi no hundi lan, min e be mi yaadaynood ben ka d'atal, d'fun ko ndaygu iwrungu ka kammu, burngu naange ngen jalgude, yo Lando on. ¹⁴ Men fow men yani ka leydi. Onsay mi nani hawa no wi'ammi e haala Yahuudiyanke: «Saawulu! Saawulu! Ko fii honfun wondaa mi cukkanaade? Ko fii no mettan-maa fii dartorgol wa ngaari dartotoondi soggirdu jom mun.»

¹⁵ «Mi jaabii mo: «Ko an hombo nii, yaa an Joomi an?»

«Joomi on jaabii lan, wi'i: «Ko min woni Iisaa, on mo wondaa cukkaade. ¹⁶ Kono immo darodaa e hoore koyde maa d'en. Ko fii e hino ko mi feeniran-maa kon: Mido subaade ma fii yo a wonu kurkaadu an, e yo a wonu seedee piiji di yi'udaa din e hoore an, e di mi hollay-maa din. ¹⁷ Mi jattinoyte e hakkunde oo jamaa Yahuudiyanke, e be wonaa Yahuudiyanke, be mi imminoyay maa haa e mun, kambe be wonaa Yahuudiyanke ben, ¹⁸ fii udditugol gite mabbe

Deftere Kuude Sahaabaabe Ben 26:19xcvii Deftere Kuude Sahaabaabe Ben 26:27

den, be yiltoo ka nibe, be arda ka ndaygu, be iwa e laamu Ibiliisa, be fewta Alla, be heba yaafuyee junuubaaji, be tawdee e yimbe Alla ben, bay be gomdinii lan.»

¹⁹ «Ko dfun wadi yo Agiriipa Lando on, si mi salaaki csoftaade ko mi fejninanaa iwruude ka kammu kon. ²⁰ Mi fuddorani fejninandol bee be Damaasi taho, si mi arani bee be Yerusalaam, haa nabani e diiwal Yahuuda ngal fow, e be wonaa Yahuudiyanke ben, fii yo be tuubu, be ruttoo e Alla, be wada kuude hollude wonde be tuubii. ²¹ Awa ko fii dundoo Yahuudiyankeeben yaniri e an ka *juulirde mawnde, haa be etii no be mulirammi.

²² «Kono haa hande Alla no wallimmi, ko dfun wadi si mido darii, mido seeditaade e yeeso sewbe ben e mawbe ben, e hoore mi alaa wowlude hay huunde ko wonaa ko Muusaa e annabaabe ben wi'unoo waday kon ²³ wonde *Almasiihu on tampoyay, awa kadi o attee im-mintineede e hakkunde maybe ben, o banginana jamaa Yahuudiyankeeben e be wonaa Yahuudiyanke ben, ndaygu ngun.»

²⁴ Nde tawnoo ko nii o wonnoo jaaborde, Festuusa ewnii no tiidiri, o wi'i: «Puulusa a feetii! Gandal maa tiidungal ngal feetinii ma!»

²⁵ Puulusa jaabii mo, wi'i: «Yaa an Festuusa teddudo, mi feetaa. Ko kongudi goongaaji holniidi mi yewti. ²⁶ Lando on no humpitii fii koo ko wadi, mi yewtiray mo woni pellital. Ko fii mido hoolii o majjaaka huunde, bay dfun wonaa e qunuutu wadi. ²⁷ Agiriipa Lando on,

wonaa hidon gomdini annabaabe ben? Mido andi pellet hidon gomdini be.»

²⁸ Onsay Agiriipa wi'i Puulusa: «Hida sikka ko e nder saa'ihun nii waawataami wattude *Almasiyyaajo?»

²⁹ Puulusa kadi jaabii mo, wi'i: «Woni ko jooni woni ko onsay, ko mi torii Alla, ko yo onon e hedsiibe lan ben fow hande, on wa'u wano mi wa'i nii, hara hinaa e sifa d'ee jolkande d'oo.»

³⁰ Onsay lando on e yeesoojo diiwal ngal e Bereniise e joosodunoobe e maßbe ben immii.
³¹ Ko be pottitotoo, be woni e wi'indirgol: «Oo neddo wadaali hay huunde ko foddi e wareede maa jolkeede.»

³² Agiriipa kadi wi'i Festuusa: «Si oo neddo feyyinaano hoore mun ka lando mawdo Roomu on, hanno himo haanaa acciteede.»

27

Fii no Puulusa Fokkitiri Yahugol Roomu

¹ Bay wonii aadaama men bakoto don e laana ndiyan fii yahugol Italii, be yetti Puulusa e kasooobe goo, be watti e juude Yuliyusu, d'un ko yeesoojo dental suufaaabe jeyaangal ka lando mawdo Roomu on. ² Men bakii don e laana iwruka Adiramiyuuna rewoyayka Aazii. Men yahi, tawi meden wondi e Masedoniyankoojo wi'eteedo Aristarke mo Tesalonii.

³ Bimbi nden nande, men hewti Siduuna. Sabu ko Yuliyusu jogornoo Puulusa no moyyiri non, o newnani mo kanko Puulusa yahugol ka yibbe makko ben, ben wadana mo faale makko on.

⁴ Bay men iwii don, men takkii suriire Siipuru

nden, ko fii hari hendl ndun no alindaade men.

⁵ Bay men takkike daande baharu hundudo Silisii e Pamfilii on, men hewti Miira, dun ko e nder Lisii. ⁶ Yeesoojo konu on tawi d'on laana iwruka Aleksandiri, yahayka Italii, o yawni men d'on.

⁷ Tawi e nder balde buy ko doy men woni yaarude, men battori ndee saare Kinidii karanhan. Kono nde tawnoo hendl ndun jabaali men jokka ngol laawol, onsay men takkii sobbundu Salamonee ndun, men acciri Kereeti ka jaamo. ⁸ Bay men serindorii d'on karahan, men hewti e nokkuure no wi'ee Darorde Labaadse, dun ko takko ndee saare wi'eteende Lasaayata.

Fii no Kenii ngin Sorori be e no Laana kan Lancori

⁹ Bay saa'i juutudo feyyii, tawi yaadu amen ndun ka nder ndiyan wondii e nawaare, ko fii hari saa'i korka kan feyyii. Ko dun wadi si Puulusa hajii be, ¹⁰ wi'i: «Mi yi'ii wonde nduu yaadu nder ndiyan gasataa e baawo masiibo e kasaara, dun non hinaa fii laana kan e dolle d'en tun, kono fii wonkiji men din enen kadi.»

¹¹ Kono yeesoojo dental suufaafe ben hoolori doginoowo laana kan e yeesoojo makka on edii o hedfaade yewtereeji Puulusa din. ¹² Nde tawnoo ngal dingiral laade ndiyan moyyaa ndungu, burbe ben e mabbe aadii yo be yahu be hettoya si tawii no gasa, ka wi'eteed d'on Feniika, e ngal dingiral laade wongal Kereeti hikkorngal hirnaange jaamo e hirnaange nano, fii yo be feyyin d'on ndungu ngun.

¹³ Onsay kenun wifi iwri ka sengo jaamo, be sikki wonde be hebii ko be faandinoo kon. Onsay be towni darnirdun laana kan, be serindii binde Kereeti. ¹⁴ Kono bawto d'un seeda, kenii moolanaangii wifi sortori ka suriire, ngin no wi'ee kenii funnaange nano. ¹⁵ Laatii laana kan waawaali tiindaade hendu ndun, ndu nabi ka, menen kadi men acci ka nabi men. ¹⁶ Men yaari non haa men bakitori ka sengo jaamo wirnitirngo surihun tosokun no wi'ee Kawda, ka men wawtii laakun danditorkun kun don e hoore karahan. ¹⁷ Bay kun yawnaama, men hebi feere yettugol boggi din, habba laana kan. Nde tawnoo kadi meden hulnoo saggoygol ka njaareendi Sirtisi, onsay men tippini darnirdun laana kan ka nder ndiyan, ko nii men yaari. ¹⁸ Nde tawnoo kenii ngin no yeypude men fota, bimbi nden pande men woni e bugagol dolle den ka ndiyan. ¹⁹ Nande timmunoo nden balde tati, gollooibe ben yettani hoore mun aalaaji gollirdi ka laana din, be bugii ka ndiyan. ²⁰ Tawi e nder balde buy, hinaa naange hinaa koode woni ko yalti. Tawi kenii ngin burtu tabitude tiida haa men tayii hisugol few.

²¹ E hoore d'un, tawi neebii men jaamaali. Onsay Puulusa hawtii darii e hakkunde yimbe ben, o wi'i:

«On jabanayno lan, hara en iwaali Kereeti, d'un on dadayno oo masiibo e oo kasaara. ²² Jooni mi beydii on wakkilinde, ko fii on fow wonkiiji mon din daday, ko laana kan tun woni dadataa. ²³ Ko fii oo Alla Jeydo lan, on mo mi rewata, malaa'ikaajo mun on arii e an e oo

jemma, ²⁴ o wi'immi: «Wota a hulu yo Puulusa, ko fii bee darodaa yeeso lando mawdo Roomu on. Awa kadi Alla yedete sulfu fii be wondudaa ka ndiyan ben fow.» ²⁵ Ko dun wadi, si mi wi'ay on wakkilee, ko fii mido hoolii ko Alla wi'immi kon wadiray non. ²⁶ Kono fow e mun, bee saggoyen e suriire.»

²⁷ Ka jemmaare sappoo e nayabere gila hindu ndun woni men bugondirde e on baharu Adriyatiika, golloobe ka laana ben sogitii badagol amen leydi ndin tumbere jemma. ²⁸ Onsay be yollisawru ebbirdu ndun, be tawi luggeendi ndin ko sogone cappande jeetati. Bay men wodsfitike dson seedfa, be yolliti ndu kadi, be tawi luggeendi ndin ko sogone cappande jeegoo. ²⁹ Nde tawnoo hibe hulunoo yi'ugol ka laana kan lancotoo e kaaye, onsay be bugori darnirde nay laana kan baawo, tawi ko be habpii woo ko weetugol ngol. ³⁰ Tawi golloobe ka laana ben no faabbude no seedira e makka. Onsay be tippini laakun danditorkun kun ka nder ndiyan, wa si tawii hibe yahude wadsoya darnirde laana kan yeeso makka. ³¹ Onsay Puulusa wi'i yeesoojo suufaabbe ben e suufaabbe ben: «Wattanee yiila, ko fii si bee yimbe wonaali ka nder laana gaa, haray on waawataa dadfude hande kadi.» ³² Onsay suufaabbe ben tayi boggi laakun danditorkun kun, be acci kun yoolii.

³³ Ado weetude, Puulusa wakkilini fow fii jaamugol e hoore himo wi'a be: «Ko hande woni nalaande sappoo e nayabere nden hidon habpii e hoore on jaamaali hay huunde haa jooni. ³⁴ Mi wakkilinii on jooni jaamugol, ko fii

dun no haani fii no dadiron, awa kadi hay gooto e mon cukulol hoore mun hayrataa.» ³⁵ Bay o gaynii wi'ude dun, o yetti bireedi on, o jarni Alla yeeso mabbé be fow. Onsay o senditi, o nangani naamugol. ³⁶ Bay be wakkilinaama, be fow be jaami. ³⁷ Tawi wonnoobe ka laana ben fow ko be yimbe teemedde dido e cappande njeedido e njeeegoo. ³⁸ Bay wonii be jaamii haa, be hayfiniri laana kan bugagol naametee on ka baharu.

³⁹ Bay weetii, laatii be anditaali leydi ndin, kono be haccii salndu baharu on e pencyen mun, be fottani nawrugol ton laana kan si no hawri. ⁴⁰ Onsay be tayi boggi darnirde laana kan din, be acci de ka ndiyan, be acciti kadi kabbi ardorde laana kan. Onsay be fonti bagi wondo on ka leggal laana kan, be fewtini e hendu ndun, be yaari ka pencyen salndu baharu on. ⁴¹ Kono be hawroyi e mowre njaare e hakkunde waameeji dici, be acci laana kan saggi don. Hakkee ko yeoso laana kan irii, tawi ka waawataa dillude, awa kadi hakkee ko morloode ndiyan den tiidunoo baawo laana kan lancii. ⁴² Tawi kadi suufaabe ben no miijinoo warugol kasooobe ben, fii wota hay gooto e mabbé fubbo laawoo. ⁴³ Kono tawi yeesoojo suufaabe ben no aadii dandugol Puulusa, o falli be wadugol kon ko be ebbi. O yamiri yo wawbe fubbaade ben atto ukkaade fii hettoygol gada, ⁴⁴ heddiibe ben kadi huutora pecce maa godsun e kunte laana kan. Ko nii fow hewtiroyi gada e hoore jam.

Fii no Puulusa Hewtiri ka Suriire Malta

¹ Bay men dadii, men andi wonde suriire nde men woni e mun nden ko Malta wi'etee. ² Yimbe hodube don ben holli men teddungal mawngal, be banniti men fow, be hubbi yiite sabu ndiyan dan e jaangol ngol. ³ Onsay Puulusa yetti donkun ledde, ukki ka yiite. Kono sabu nguleendi yiite ngen, kuuraari sortii ton sinji jungo makko ngon. ⁴ Bay ben yimbe nden suriire yi'ii ngin kullii no sinji mo jungo ngon, be wi'indiri: «Wa jooni oo neddo ko ittoowo hoore, ko fii ko karahan o dadiri ka baharu, kono naawoore nden accataa o wuura.» ⁵ Kono latii Puulusa pidfii kullii ngin ka nder yiite e hoore o hebaali bone woo. ⁶ Tawi ben yimbe ko habbii woo ko yi'ugol ka o buuti maa ka o yanata, o maaya kisan. Kono bay be habbige haa, be yi'aali hay huunde ko hebi mo, be yiltitii, be wi'i ko o allaajo.

⁷ Tawi nokkuure no moggo d'on, nde burdo teddude e suriire nden no wi'ee Pubiliyuusa jeyi. On jabbi men, o werni men don e hoore giggol e nder baldse tati. ⁸ Tawi ben Pubiliyuusa no nawni, waalii nguli-bandu e dogu-reedu. Onsay Puulusa naati ka makko, *fawi juude d'en e hoore makko, o toranii mo Alla, o ndikkini mo. ⁹ Bawto d'un nawnube ben ka suriire fow ari e makko, o ndikkini ben kadi. ¹⁰ Onsay be wadani men teddungal njanal. Bay wonii men fokkitii kadi, be wadani men dokke de men handi e mun.

Fii no Puulusa Hewtiri Roomu

¹¹ Bawto kodagol amen e nder lebbi tati, men yawi d'on e laana iwruka Aleksandiri,

Deftere Kuude Sahaabaabe Ben 28:12civ Deftere Kuude Sahaabaabe Ben 28:20

ruumunooka e nden suriire, maandiniranooka sanamuujji funeeji din. ¹² Bay men hewtoyii Sirakuusa, men woni don balde tati. ¹³ Bay men iwii d'fon, e nder ko men takkotoo kon, men hewti Regiyuuna. Bimbi nden jande hendu ndun immori ka jaamo baawo amen, e nder balde didi tawi men hewtii Pusolii. ¹⁴ Men tawi d'fon musibbe goo, ben torii men wondugol e mabbe d'fon balde jeedidi, ko nii men yaari Roomu. ¹⁵ Musibbe wonbe e nden saare, humpitinoobe fii amen ben, ari haa e ndee nokkuure fottirde wonde Apiyusu e haa e ngoo hodo wi'eteengo Cuudi Tati Hobbe, fii fottugol e amen. Bay Puulusa yi'ii be, o jarni Alla, o beydi wakkilaare. ¹⁶ Bay men hewtii Roomu, Puulusa newnanaa wonugol feere wondude e suufaajo goo ko ayna mo.

Fii no Puulusa Waajori Roomu

¹⁷ Balde tati bawto d'un, kanko Puulusa o nodditi mokobaabe Yahuudiyankneebe ben. Bay wonii be moobondirii, onsay o hewtini be ndee yewtere doo, o wi'i: «Musibbe, e baawo wadugol an jamaa on hay huunde maa dartagol aadaaji maamiraabe men ben, mi wattama e juude Roomiyankoobe ben, mi sokaa gila Yerusalaam. ¹⁸ Bay ben gaynii landaade lan, be faalaa lan accitude, bay be yi'aali e an huunde ko foddi e mayde. ¹⁹ Kono Yahuudiyankneebe ben dartii. Mi tawi min kadi bee mi hewta lando mawdo Roomu on e hoore mi mijaaki toojude jamaa an on. ²⁰ Ko fii d'un mi faaliranoo on yiirude, mi yewta on, ko fii ko sabu

Deftere Kuude Sahaabaabe Ben 28:21cv Deftere Kuude Sahaabaabe Ben 28:27

tanyinaare *Isra'iilayankeebe ben mi jolkiraa
ngal jolokowal.»

²¹ Ben kadi jaabii mo, wi'i: «Men hendaaki bataake woo iwrude ka diiwal Yahuuda fii maa, awa kadi hay gooto e musibbe ben araali hewtini men godfun maa wowlu-maa ko boni. ²² Kono meden faalaa andirde ma ko miijidaa. Ko fii meden andi ndee fedde ko liddondirteende ka woni woo.»

²³ Onsay be bugitii e palaande goo. Bay wonii nden palaande nde be haldi hewtii, dsuudube ari ka makko buri aranun. E nder ko o sifotoo kon, tawi himo seeditaade fii *laamu Alla ngun, awa kadi himo rewrude e Sariya Muusaa on e defte annabaabe ben fii holnugol be fii Iisaa, d'un wadi gila bimbi haa kiikiide. ²⁴ Wobbe felliti sabu ko o wowli kon, wobbe ronki hoolaade. ²⁵ Bay wonii be fokkitii e baawo nanondiral mabbe, Puulusa beyditi dii kongudi doo, o wi'i: «Ruuuhu Seniido on yewtiri baabiraabe mon ben haqiiqa, rewrude e annabi Isaaya, o wi'i:

²⁶ ‹Yahu e oo jamaa, wi'aa:
On nanay, kono on faamataa,
on ndaaray kadi, kono on yi'ataa.

²⁷ Ko fii dee berde oo jamaa wonii yoorude,
be uddii noppi mabbe din,
awa kadi be ombii gite den,
sakko be yiira gite mabbe den,
maa be nanira noppi mabbe din,
maa be faamira berde mabbe den
haa be tuuba, mi sellina be.^d

^d **28:27** 28.27. Isa. 6.9-10

Deftere Kuude Sahaabaabe Ben 28:28-29cvideftere Kuude Sahaabaabe Ben 28:31

28-29 Kanko Puulusa o beyditi, o wi'i: «Andee, oo kisiyee Alla addanaama be wonaa Yahuudiyanke ben, awa-le kambe be hedoto mo.» e

³⁰ Bawto d'fun, Puulusa daakii ka o woni d'on e nder duubi d'is'i timmudi, e hoore himo tolna kala araynoodo ka makko. ³¹ O waajoo fii laamu Alla ngun, o jannira kadi fii Iisaa Almasiihu Joomi on pellital timmungal e baawo hadeede woo kadi.

e **28:28-29** 28.29 Bindi goo no beyditi d'un ka lannoode aaya on:
Bay o wi'ii be d'un, kambe Yahuudiykeebe ben be yilitii e hoore hibe yeddondira ko tiidi hakkunde mabbe.

**Version Pular Fuuta-Jallon
The New Testament in the Fouta-Jallon Pular
language of Guinea**

copyright © 2010 Pioneer Bible Translators

Language: Pular

Translation by: Traducteurs Pionniers de la Bible

Contributor: Pioneer Bible Translators

This translation, published by Pioneer Bible Translators, was published in 2011.

If you are interested in obtaining a printed copy, please contact wab.admin@pbt.org.

The translation was completed in collaboration with Christian Reformed World Mission.

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

 You include the above copyright and source information.

 You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-02-06

PDF generated using Haiola and XeLaTeX on 11 Nov 2022 from source files dated 29 Jan 2022

024b8126-79ef-5039-bc54-7d61889f8ae6